

Muassislar:
O'zbekiston Yozuvchilar uyushmasi,
O'zbekiston yoshlar ittifoqi

1982-yildan chiqa boshlagan.

Tahrir hay'ati:
Sirojiddin SAYYID
Alisher SA'DULLAYEV
Minhojiddin MIRZO
Iqbol MIRZO
Nodir JONUZOQ
G'ayrat MAJID
O'razboy ABDURAHMONOV
Kengesboy KARIMOV
Abatbay DANIYAROV
Shuhrat SIROJIDDINOV
Bahodir KARIMOV
Sobir O'NAR
Ilhom TO'XTASINOV
Rustam MUSURMON
Farrux JABBOROV

Bosh muharrir v.b.:
Nurilla ChORI

Mas'ul muharrir:
G'iyosiddin O'NAROV

Muharrir:
Dilnoza RUSTAMOVA

Rassom:
Rustam ZUFAROV

Manzilimiz:
Toshkent shahri, Chilonzor tumani,
Bunyodkor ko'chasi, Adiblar xiyoboni,
O'zbekiston Yozuvchilar
uyushmasi binosi.
Indeks 100066

E-mail: yoshlik-jurnali@umail.uz
Veb sayt: www.yoshlikjurnali.uz
Tel.: (0371) 231-20-58, 231-20-59

Navbatchi muharrir: G.O'narov



3

Dilmurod Quronov
Cho'lponning mangu
savoli

7

**Temirpo'lat
Tillayev**
Paymona



28

Abduolim Ergashev

Ketayotir oy pari, gala
qizdan ilgari...

42

32

Alisher Alikulov
Tomchi-tomchi bo'lib
tommoqda ko'ngil...



50
Nodirabegim Ibrohimova
 Voz kechilgan kitoblar



55
Shahzod Ergashaliyev
 Ufqqa tutash yo'l




Farrux Hasanov
 Har lahzani qo'ydim muzlatib

58

Nurmuhammad Abduzoirov
 Yomg'irlar ko'ksiga
 qo'yging kelar bosh...

61

76
Vasiliy Shukshin
 Yakshanba kun kampircha...



59

Iqbol Yusuf
 Muhabbat yo'llari aldoqli...



34

Nasrullo Ergash
 Sog'inch – eng uzun she'r



38

Raxshona Ahmedova
 Tushunarsiz sevgi izhori



48

Xurshida Nishonova
 Tushlarimdan boshlanar ishqing...



CHO'L PONNING MANGU SAVOLI



**Dilmurod
QURONOV,**
filologiya fanlari
doktori,
professor

XX asr boshlarida ulug' yurt-doshimiz Cho'lpon "Adabiyot nadir?" degan savolni o'rtaqa tashlagan va shu nomli maqolasida unga baholiqudrat javob izlagan edi. Agar biz diqqat bilan kuzatsak, insoniyat ongini tanigandan beri ushbu savol u yoki bu tarzda muntazam qo'yilib kelishiga guvoh bo'lamiz. Qizig'i shundaki, bu savolga har bir davr o'zicha javob beradi, boz ustiga, bir davrda yashayotgan odamlarning javoblari-da bir-biridan jiddiy farqlanadi. Tugal va uzil-kesil javob berilishi mumkin bo'lmagan "Adabiyot nadir?" savolining hozirgi kunda ham kun tartibida turgani tabiiy. Bugungi kunda mazkur savol tegrasidagi bahslar "adabiyot san'atmi yoki ong sohasimi?", "adabiyot ijtimoiy bo'lishi kerakmi yoki yo'qmi?", "adabiyot ommaviy bo'lishi kerakmi yoki elitarmi?" kabi asosiy masalalarni o'z ichiga oladi.

Biz o'zimiz bilishni istagan narsa haqida tugal hukm chiqarishga moyilmiz, oxirigacha tugal anglab bo'lmaydigan, oxirigacha muayyan ta'rif-u qoidalar asosida tushuntirib bo'lmaydigan murakkab hodisalar mavjudligini tan olgimiz kelmaydi. Holbuki, mavjud narsa-hodisalarning

aksariyati, jumladan, adabiyot ham, ana shunday murakkab, ziddiyatli tomonlarni o'zida jam etgan hodisa sanalishi kerak. Yuqorida qo'yilgan savollardan birinchisiga – "Adabiyot san'atmi yoki ong sohasimi?" degan masalaga to'xtalsak, bu narsa ancha ravshan ko'rinadi.

Keyingi yillarda, sho'ro davrida o'ta yalang'och ijtimoiylashgan adabiyotga, uni ommani kommunistik ruhda tarbiyalash va sh.k. maqsadlarga bo'ysundirish amaliyatiga aks ta'sir tarzida adabiyotni "sof san'at" sifatida tushunish, unda faqat san'at hodisasinigina ko'rish tamoyili kuzatiladi. Holbuki, adabiyotda faqat vositani ko'rish qanchalik xato bo'lsa, unda "sof san'at"nigina ko'rish ham shunchalik xatodir. "Sof san'at" tarafdarları adabiyotning ijtimoiy ong sohasi ekanligini inkor qiladilar, juda insof qilganlari adabiyotning bu jihatiga e'tiborsizroq, ko'z yumib qaraydilar. Biz aql va

hisni bir-biriga ko'pincha zid qo'yamiz, holbuki, bu narsa vujudimizda aql va hisning bir paytda mavjud bo'lishiga, ikkisining birlikda inson ruhiyatini tashkil etishiga xalaqit bermaydi. Bas, nega endi inson ruhiy faoliyatining mahsuli bo'lgan adabiyot ularning ikkisini o'zida jam qilolmas ekan?!

Bu masalani badiiy ijod tabiatidan kelib chiqib tushunish va tushuntirish o'ng'ayroq ko'rinati. Adabiyotning ilk namunalari sanaladigan asotir(mif)larni, afsonalarni esga olaylik. Axir, "Avesto"dagi rivoyatlar yoxud qadim grek yoki misr afsonalari tabiatni, insonning paydo bo'lishi, uning o'limi sirlari va sh.k. muammolarni bilishga intilish natijasi emasmi? Albatta, hozirgi insonning tafakkur darajasi ham, adabiyot va san'atning rivojlanish darajasi ham ko'z ilg'amas darajada uzoqlashdi. Lekin badiiy ijodga turtki beradigan birlamchi omil hamon bilish ehtiyoji bo'lib qoldi. To'g'ri, keyingi davrlarda yaratilgan asarlarda doim ham ijodkor bilishga intilayotgani asotirlardagi kabi ravshan sezilmasligi mumkin, lekin uning yaratilishiga bevosita mana shu ehtiyoj turtki bergen. Deylik, bir ijodkorni jamiyatning mavjud holati yoki rivojlanish tamoyillarini bilish (ko'proq romanlarda), boshqa birovini o'zni anglash

orgali Haqni tanish (tasavvuf she'riyati), tag'in birini qalbidagi kechinmalarini (ya'ni, o'zini) anglash va shunga o'xshash umumiyl nomi BILISH ataluvchi ehtiyoj ijodga undaydi. Faqat shunisi borki, keyingi davrlarda yaratilgan asarlarda bilish ehtiyojining ravshan sezilmasligi ijodkor tarafidan anglangan narsaning asarda boshqacha yo'sinlarda ifodalanishi bilan izohlanishi mumkin. Deylik, ijodkor o'zi anchadan beri yecholmay kelayotgan, o'zi anglashga intilayotgan masalaning yechimini tabiat manzarasida, hayotdagi biron-bir holatda, hodisa va shu kabilarda ko'rishi, ya'ni, o'sha narsada hikmat ko'rishi-da mumkin. Ijodkor o'z asarida o'sha narsani (manzara, holat, hodisa va sh.k.) aks ettirishning o'zi bilanoq ehtiyojni qondiradi. Qatag'on davrida insonning qadrsizlangani, butun boshli jamiyatning totalitar tuzum oldidagi ojizligi-yu kishilarning o'zgalar fojiasiga tomoshabin bo'lib turgani haqida o'ylagan va azob chekkan A.Qahhor "O'g'ri"da tasvirlangan voqeada, mustabid tuzum sharoitidagi ijodkor qismatini Oybek "Na'matak"dagi manzarada ko'rgan bo'lsa ne ajab?! Aytmoqchimanki, shu asarlarni yaratish bilan har ikki ijodkor ruhiyatida paydo bo'lgan bilish ehtiyoji qondirildi. Zero, ijod onlarida har ikkisi ham o'zini o'ylatgan masalani o'zicha hal

qildi, muayyan bir to'xtamga keldi. Albatta, bu asarlarni har birimiz o'zimizcha tushunamiz, sababki, biz ulardagi obrazlar tilini o'zimizcha mantiq tiliga ko'chiramiz – anglaysiz. Biroq bu narsa asarning yaratilishiga turtki bo'lgan bilish ehtiyojining genetik jihatdan ijtimoiy xarakterga egaligini inkor qilolmaydi. Badiiy ijodga turtki beruvchi bilish ehtiyojining turli sath va navdag'i ijtimoiy munosabatlar asosida vujudga kelishi badiiy asarning, demakki, badiiy adabiyotning ham genetik jihatdan ijtimoiy xarakterga egaligidan dalolatdir.

Misolga olingan har ikki asarda ham bir narsaning mohiyati boshqa narsa orgali anglanayotganiga shohid bo'layotirmiz. Har ikki ijodkor ham o'zlarini o'ylatgan muammolarni anglash uchun hayotga aynan taqlid qilgani, hayotdan nusxa ko'chirgani yo'q. Zero, bir narsaning mohiyatini ikkinchi narsada ko'rish uchun aqlning o'zi kamlik qiladi, buning uchun ijodkorda avvalo san'atkorona nigoh, san'atkorga xos "qalb ko'zi" bo'lishi lozim. Ruhning alohida va betakror holati bo'l mish ijod onlarida san'atkorga o'zi izlagan mohiyat ayon bo'ladi, ya'ni, bilish ehtiyoji faqat ijod jarayonidagina qondiriladi. San'atkorning ijod onlaridagi holati, uning zo'riqib ishlayotgan ongi-yu jumbush

urgan qalbi esa asar matnida muhrlanadi. Modomiki badiiy ijod bilishga qaratilgan jarayon ekan, demak, badiiy adabiyot ham ongga aloqador hodisa, faqat bunda bilishning san'atga xos yo'lidan boriladi. Bungacha aytilganlarga tayaniб, adabiyot ikkiyoqlama hodisa, u san'atga ham, ijtimoiy ongga ham birdek aloqadordir degan xulosaga kelish mumkin.

Adabiy bahslarda tez-tez ko'tarilib turgan "adabiyot ijtimoiy bo'lishi kerakmi yoki yo'qmi?" masalasi ham sho'ro davri adabiy siyosati ta'sirida yuzaga keldi, o'tkirlashdi. Adabiyotning ijtimoiy ekanligini inkor qilish ma'qul bo'lмаганидек, uning individual-shaxsiy hodisa ekanligini ham inkor etib bo'lmaydi.

Adabiyotshunoslikka oid asarlarda, darsliklarda "badiiy adabiyotning predmeti – inson" deb ko'rsatiladi. Biroq mazkur fikrni tor tushunish, uni mutlaqlashtirish unchalik to'g'ri bo'lmaydi. Chunki adabiyot insonni alohida emas, balki jamiyat, tabiat bilan uzviy aloqada o'рганади. Modomiki

adabiyotning predmeti ham, uning yaratuvchisi ham inson ekan, adabiyotning ijtimoiy bo'lmasligi mumkin emas. Biroq yaratilishi jihatidan, dunyoga nuqtai nazar, o'sha dunyo tufayli paydo bo'lgan hissiyotlar, fikrlar nuqtai nazaridan tom ma'noda shaxsiy hodisadir.

Ma'lum bo'ladiki, badiiy asarda ijtimoiylik va shaxsiylik qorishiq holda zuhur qilar ekan, faqat bu o'rinda ijtimoiylik va shaxsiylik nisbati har bir konkret asarda turlicha bo'lishini, turlicha zuhur qilishini e'tiborda tutish lozim bo'ladi. Deylik, ijtimoiylik darajasi epik va lirk asarlarda jiddiy farqlanadi, ba'zan lirk asarda ijtimoiylikdan asar ham yo'qday ko'rindi. Ayrimlar, xususan, "sof san'at" tarafdarları ayni shu holni mutlaqlashtirmoqchi bo'ladilar, she'riyat faqat ko'ngil ishi bo'lishi kerak degan gaplar eshitiladi. Xo'sh, insonning ko'nglidagi tuyg'ular, iztirob-u quvonchlar kelib chiqishi jihatidan ijtimoiy emasmi? Misol tariqasida A.Oripov "Bahor kunlarida

kuzning havosi" misralari bilan boshlanuvchi she'rini olib ko'raylik. Asarda lirk qahramonning muayyan bir holati, kayfiyatigina qalamga olingen she'r mana bu misralar bilan boshlanadi: "Bahor kunlarida kuzning havosi, Tanimni junjitar ogshomgi shamol. Nega mucha g'amgin nayning navosi, Nega qalbim to'la o'kinch va malol?" She'rda tabiat manzarasi tasvirlanadi va shu asosda mahzunlik kayfiyati ifodalanadi. Biroq, "bahor kunlarida kuz nafasining esish"idan kelgan mahzunlik – obraz, mana shu holatning yuzaga kelish sabablari o'zgacha bo'lishi ehtimoldan yiroq emas. Mazkur she'r 1967-yilda yaratilgan edi. Nechun endi A.Oripov bahor kunlaridagi kuz havosi haqida gapiradi? Gap shundaki, she'r yozilgan payt 50-yillar oxiridan jamiyat hayotida kuzatilgan uyg'onish, nisbiy erkinlikning 60-yillar o'rtalaridan qaytadan bo'g'ilá boshlagan davriga to'g'ri keladi. A.Oripov jamiyatning bir a'zosi sifatida, erkka tashna ijodkor sifatida bu holdan

Inson so'zni san'atkorona ishlatgan zamonlardan buyon ko'plab savollarga javob izlaydi. Gohida topgan javoblaridan quvonadi. Ammo yana bir mucha vaqt o'tib, topgan javobidan qanoatlanmay, yana o'z-o'ziga savol beraveradi. Ana shunday savollardan biri ulug' shoir Cho'pon tabiri bilan aytganda: "Adabiyot nadir?"

Qo'li qalam tutgar ijodkor borki, o'zicha ADABIYOTning nima ekaligini tushunishga va tushunturishga harakat qiladi. Buzningcha, har kishining tushunishga bo'lgan istagi yaxshi, ammo tushuntirishga bo'lgan intilishi gohida noo'rindek, negaki, sohaning mohirlari, mutaxassislari borligini unutmaslik kerak. Shu bois, jurnalmizda "Adabiyot nadir?" rukni tashkil etib, unda adabiyotshunos olimlarni, adib-u shoirlarning magolalarini chop etib borishni niyat qildik.

Dastlabki muallif – filologiya fanlari doktori, nazariyotchi olim Dilmurod Qur'onovdir. Professor D.Quronovni bir hovuch adabiyot odamlari juda yaxshi bilishadi. Domla shu yil qutlug' oltmish yoshni qarshi oldi. Ilim kishisi uchun bu yosh "g'arq hosilga" kirgan palla, ko'plab shogirdlar tayyorlaydigan, yillar davomida zahmat chekib yiqqan ziyyosini xalqiga beradigan xabarchi epkindir. D.Quronovni tahririyatimiz va ko'p sonli jurnalxonlar nomidan tabriklaymiz hamda uzoq yillar "Yoshlik"ning mualliflaridan bo'lib yurishini isaymiz.

iztirob chekadi, azoblanadi. Jamiyatning ko'zi ochiq a'zolarini iztirobga solgan bu ijtimoiy dard shoirning shaxsiy dardiga aylangan, dardning shaxsiylanish darajasi shunchalarki, biz she'mi "ko'ngil she'riyati" deyishga-da, uni "sof san'at" namunasi sifatida baholashga-da moyilmiz.

Yaqin yillardagi va qisman hozirda ham bahslarga sabab bo'lib turgan masalalardan yana biri "Adabiyot qanday bo'lishi kerak?" degan savol tegrasida aylanadi. Mazkur bahsda tomonlarning biri "adabiyot ommaviy bo'lishi kerak" degan fikrni, ikkinchisi, "adabiyot xos kishilarga mo'ljallangan bo'lishi kerak" degan fikrni oldinga suradilar. Ikkinci tomonning ommaviylikka qarshi turgani adabiyotning jo'nlashuvidan norozilik bilan, birinchi tomonning xoslargagina mo'ljallangan adabiyotga qarshiligi bu holda adabiyotning jamiyatdagi ahamiyati susayadi deb hisoblashi bilan izohlanadi. Zikr etilgan bahsning yechimi, bizningcha, murosadadir. Shu o'rinda murosaning foydasiga ayrim fikrlarni qayd etib o'tish joiz.

Birinchisi. Hammaga ayonki, badiiy adabiyotni iste'dodlar yaratadi. Iste'dod esa ommadan ko'ra teyranroq qalb ko'ziga egaligi, tafakkur darajasining undan yuqoriroq

ekani bilan farqlanadi. Baski, chinakam iste'dod yaratgan asarning darajasi ham ommadan yuqoriroq bo'lmos'i tabiiy va shunday bo'lishi kerak ham. Ikkinci tomondan, shu adabiy-madaniy zaminda yetishgan iste'dodning ommadan ko'z ilg'amas darajada uzoqlab ketishi ham mahol, shu bois ham "atayin ommaga moslab yozish" degan da'vo yo yolg'on, yo iste'dodsizlikni xaspo'shslash uchun bahonadan boshqa narsa emas. Demak, bahsdan chiqadigan birinchi xulosani "bizga chinakam iste'dodlar, iste'dod bilan yozilgan asarlar kerak" tarzida ifodalash mumkin.

Ikkinchisi. Badiiy asar juda murakkab hodisa, konkret asarni hammaning birdek tushunishi, birdek suyushi va unga birdek qimmat berishi mumkin emas. Badiiy asar tubsiz ummon misoli, yuzasida yurgan nari borsa mavjlar-u jozib qudratni ko'rар, biroq uning tubida olam-olam sir-sinoatlar yashirin, uning tubida-da butun boshli bir hayot kechadi. Kimdir bu ummonning yuzasidagina yuradi, kimdir sayozroq, kimdir chuqurroq sho'ng'iydi, baski, badiiy asar bir paytning o'zida turli toifalarga – ham ommaga, ham xoslarga mo'ljallangan bo'ladi.

Uchinchisi. Kishilarda didning turlicha ekanligi fakt, bu hol bilan faqat murosa

qilish mumkin, xolos. Besh qo'l barobar emas, kimdir chuqur ruhiy tasvirga boy asarni, kimdir intellektul jihatdan yuksak asarni, kimdir ko'ngilochar asarni, kimdir detektiv, kimdir jangari asarlarni suyadi. Xohlasak xohlamasak, adabiyot maydonida ham raqobat bor. Agarki hozir yengil-yelpi asarlarga qiziqish kuchaymoqda ekan, bu yuksak didli adabiyotning aybi. Demak, bahslashish emas, jizzakilik qilish, ommaning didsizlashayotganidan zorlanish emas – chinakam adabiyotni, badiiyati yuksak asarlarni yaratmoq kerak.

Badiiy adabiyot – inson faoliyatining mahsuli. Inson faoliyati esa keng va serqirradir. Inson faoliyati bir-biriga bevosita yoki bilvosita bog'liq bo'lgan "mehnat faoliyati", "ruhiy faoliyat", "estetik faoliyat" kabi jihatlarni o'z ichiga oladi. Boz ustiga, ruhiy faoliyatning o'zi "aqliy", "hissiy", "ruhoniy" faoliyat qirralarini namoyon etadi. Badiiy adabiyot insonning go'zallik qonunlari asosidagi ijodiy-ruhiy faoliyati mahsulidir. Shunday ekan, badiiy adabiyotni ta'riflashda biryoqlamalikka yo'l qo'yish, uni faqat ijtimoiy ong yoxud faqat san'at hodisasi sifatida tushunish predmetning mohiyatini jo'nlashtiradi, bizni uning tabiatini anglashdan uzoqlashtiradi.

PAYMONA



Temirpo'lat
TILLAYEV



Бир ҳафтадирки, чол ажал билан олишади, муттасил дам қисмадан жони азобда. Касал хуруж қилган пайтлар унинг қоқсуюк,чуваккина юзи талоқдек кўкариб, даҳшатли тарзда бўғриқиб кетади. Оғзини катта-катта очиб, ютоққанча энтикар экан, чолниг бўйин, пешона, чекка томирлари ўқлоғдек бўртиб чиқади. Хуруж пасайгач, даҳшатли азобда тўлғонган қоқсуюк вужуд тўшакка беҳол чўзилади. Энди унинг рамақижон ранг-рўйидан бирор ифодани англаш мушкул. Чолниг шифтга термулиб қолган сўниқ кўзлари сополдек қотган, боқишилари лоқайд ва маъносиз.

Бу дарди бедаволиги етмагандек, кунмакун чолниг силласини қуритиб, адой тамом қилаётган очлик, яра устига чипқон бўлди.

Кейинги икки кун ичиди чол ўқтин- ўқтин хушини йўқотиб, алаҳлай бошлади. Дамқисмаси кучайиб, юзлари момоталоқ бўлиб кетган чол, аччиқ-аччиқ ўнграбни, гужанак бўлиб қолар, бирор фурсат ўтиб, енгиллашгани заҳоти алаҳлай бошларди. У гоҳ баланд чийилдоқ овозда, гоҳ ёнидаги одам ҳам этишмайдиган даражада шивирлаб, кимнидир сўкар, дарғазаб бўлар ва яна зум ўтмай кимдандир кечирим сўрай бошлар, тўсатдан ўтичини гиппа бўғиб, тағин кимнидир койишга тушди. Унинг нималар деяётганига дафъатан тушуниш анча мушкул эди. Фақат Усмонқул отасининг нималар деб алаҳсиётганини ўзича сезарди. Отаси умрида жуда кўп ҳарбу зарб кўрган одам; энг аввал воҳадаги чўнқайма босмачига қарши от сурган, кейин бу ёғи қулоқлар билан қирпичноқ бўлган. Эҳтимол, шу жанг жадалларда бирор-бир бегуноҳнинг қонига зомин бўлган бўлса, ажаб эмас. Тўғрими, нотўғрими отасининг дарғазаб сўзларидан қон хиди уфуриб турган телба-тескари алаҳсирашини эшигтан Усмонқулнинг “дushman кўнглига” дафъатан шу ўй келди.

Бугун, айни субҳисодиқ палла уйдан, икки дунё ўртасида ётган отасидан бирров хабар олиб кетгани келган Усмонқул, отаси ётган уй эшигини очиб ичкари кирганда,

чол тўшакда тўлғанганича энтикиб-энтикиб, ютоққанича нафас олар, аммо кўз косаларининг кенгайиб кетганидан, ҳар энтиканида оғзини катта-катта очиб ютоққанидан маълум эдики, ҳавога тўймасди. У эшик очилиб, ичкарига кимнингдир кирганига ҳам эътибор бермади. Чол чўтдек озғин қўлларига суюниб, кўкрагини баланд кўтарди ва куч билан инграганича ютоқиб ҳаво симирди. Шу баробар кўкрак ғижими бироз ёзилгандек бўлди ва оғир сўлиш олиб бошини ёстиқقا ташлади.

Чол ўқинч ва маломатга тўлар бир нигоҳ билан кўз остидан эшик оғзида пайдо бўлган Усмонқулга боқди. Усмонқул сесканиб кетди. Лекин зум ўтмай чол ўғлидан кўзини узди; унинг қорачиқлари чаппа айланиб, кўз косаси оппоқ бўлиб оқариб қолди. Кўзлари шифтга битиб, даҳшатли тарзда бақрайиб қолган отаси томон Усмонқул жонҳолатда оқсоқланганча талпинди.

– Ҳа, ота! Ота, сизга нима бўлди?!

Чол сассиз, садосиз жим ётарди. Ҳатто нафас олаётганини билиш маҳол эди. Мурдадек тош қотган отасининг устига энгашган Усмонқулнинг юрагининг тубида нимадир чирт узилгандек бўлди. Наҳотки, отасидан ажралган бўлса? Усмонқул отасининг кўксига кўл юбориб, юрак уришини англашга улгурмади, туйқусдан чол оғир уғ тортиб юборди ва қониб-қониб ҳаво симирди. Усмонқул яна бир сесканиб тушди. Чолниг терс айланиб кетган қорачиқлари жойига қайтди ва тепасида энгашиб турган Усмонқулга маъносиз боқди. Чол маъносиз ва сокин кўзлари билан тепасида тик қотган ўғлига узоқ термулиб қолди.

Усмонқул отасининг бу интихосиз термулиши, ҳаёт шами лаҳза сайин сўниб бораётган инсоннинг ёруг жаҳон билан, яқин одамлари билан сўнгги видолашуви эканлигини билди ва жойидан қўзғолмай отасининг кўзларига тик боқиб тураверди, зора дунё билан видолашув олдидан, майли унинг дийдорига бир бора тўйсин.

Чол Усмонқулдан кўзини олмай қурушқоқ лабларини ялаб тамшанди ва бирдан алаҳлай бошлади. У Усмонқулдан кўзини олмай паст, лекин ғазабнок овозда сўзлай кетди:

– У, ёвуз Жабборбек, чўнқайманинг ялоқхўри Даврон қасами! Бунинг ҳаммасини ўзинг ичингдан тўқигансан. Қизил командирни Равшан қўшкаллага сотган ҳам, ота-бала маълимни улоқ қилиб чопиб, устига чолдевор йиқитган ҳам, Хожини сотқинликда айблаб Оқмирза ўғрига оттирган ҳам, Қора фирқани қопга солиб қутурган Қашқага ажал жардан ирғитган ҳам сен ўзинг! Ҳа, сенинг ўзинг, ўзинг! Мени ёнингга тортма, барибир бефойда! Менинг имоним бутунлигини, сенинг бу ифлос ишларингга ҳамтовоқ эмаслигимни элим, элатим билади! Эл билмаган нарса йўқ. Лекин сен элни ҳам пичоғинг этидан ўтиб, сугига етгунча доғда қолдирдинг-а, Даврон қасами?! Отилишидан кўрқиб ўкирма-э баччағар!

Ўлганингдан кейинги элнинг қарғишидан кўрқ! Ўлишдан кўрқиб мунча ўкирасан? Жон ширин-а? Сен қонига зомин бўлганинг ҳам жони ширин эди. Лекин улар ўлими олдидан сенга ўҳшаб зор қақшамаган бўлсалар керак. Улар ўлими олдидан сен палиднинг андишасиз юзига тутпуришга куч тоганлар, мен бунга ишонаман. Улар элнинг шундай жўмард одамлари эди-я?! Лекин сен уларни қирчиллама ёшида қийдинг. Лекин эл билди! Бўлди! Эл билди!!

Усмонқул ҳамон жойидан жилмай, алаҳлаганича гоҳ дарғазаб бўлаётган, гоҳ ўкинаётган отасига термулиб турарди. Чол бемаъно сокин кўзларини ўғлидан олмасдан гапираётган бўлса-да, лекин Усмонқулни кўрмасди, у ҳамон ҳаётида аллақачонлар бўлиб ўтган воқеаларни, воқеалар не замонларни бир-бирига қориштириб, гоҳ секин шивирлаб, гоҳ тўсатдан шиддат билан бақириб алаҳсиради. Лекин Усмонқул отасининг узуқ-юлуқ сўзларидан шуни сездими, гап Каримқул ҳосилот ва унинг отаси Даврон қасами устида борарди. Даврон

қасамининг узоқ ўтмишда босмачиларнинг хуфёна жосуси бўлганини ва охир-оқибат Элсарой қишлоғида ўша йиллари содир бўлған кўпгина жиноятларда, жумладан, қизил командир Мамаюсуповнинг ўлдиришида, шахрисабзлик ота-бала муаллимларнинг улоқ қилиб чопилишида, элсаройлик коммунист Қора фирқанинг дарёга иргитилишида қўли борлиги сезилиб қолгач, эл ҳукми билан отиб ташланганини эшитган эди. Лекин худди шу Даврон қасами отасининг яқин ошнаси бўлганини, айби очилиб қолгач, ошнасини жиноятларга ҳамшерик қилмоқчи бўлганини билмас эди.

Чол ҳамон алаҳсиради; энди у Каримкулни лаънатларди: Уҳ, Каримқул аглаҳ, илоннинг боласи, чаёнбачча! Карвонимнинг мункиганини билдинг-а? Ҳали Усмонқулим сафардан қайтсин, сени ҳам улоқ қилдиришим бор. Ув, сен Даврон қасамининг тезаги!

Сенинг отанг ўша, Даврон-да, Даврон-а?!
Ўҳ, Даврон! Ўшанда мен сенга ишондим-а? Ўз тилинг билан айтдинг: “Элоға, менга қўшил, менинг отам оққан ариқ бўлиб, бой бўлиб ўтган бўлса, сенинг отанг ҳам қўнғирови Ҳисорга етган тuya етаклаб ўтган. Сен менга қўшил, бу ялангоёқлардан чиқсан элбоши большовойларни исини чиқармай даф қилалилк!” ўз тилидан отилган сен ёвузни ўшанда мен сотмадим. Қайишдим. Бу шаштидан тушар дедим. Ўшанда шу гапларингни Мамаюсуповга ё Қора фирқага айтганимда-ку сени Одамбормаснинг хаворига чиқарип отарди-я! Қара-я, сен учун имонимни ютдим-а, Даврон? Имонимни бер! Бер имонимни?! – чол ожиз қичқириб, эзгин бир сўлиш олди; бўғин-бўғин бўлиб терс-терс ёрилган қурушқоқ лабларини ялаб, тамшанди. Лекин шу заҳоти жон ҳолатда яна боягидек паст ва қахрли овозда алаҳлай бошлади.

– Ҳа, қара-я, Даврон қасамининг ҳаром пешобидаги Каримқул элбоши, элбошилар ўтиб-ўтиб элбошилик сенга тегди-да?!

Сотқин отанг Даврон қасамини мен ўлдиримадим, лекин норасида Сарвини сен ўлдиридинг! Ҳа, сен ўлдиридинг! Ўлдиридинг-а?! Бечора боламнинг бўз кўйлаклари Айронтепанинг тошлоқ, заранг ерига судралабериб парча-паррон бўлиб кетган экан-а!

– Шундай деб чол ҳўнграганича силкиниб-силкиниб йиглай бошлади. Унинг хотинчалиш бу йигиси ниҳоятда аянчли эди. Лекин чолнинг кўзларига ёш инмади.

Отасидан бу сўзларни эшитган Усмонқул эса турган жойида тош қотиб қолди.

Чол аянчли йигидан тўхтади-ю, яна тўхтаб-тўхтаб гапира бошлади: ўшанда мен касал бувасига яримжон энасига тактак машогини териб келмоқчи эди у норасида.

Сен бўлсанг, аблах, палид, имонсиз, раҳмсиз сен бўлсанг, уни тутиб олгансан! Сарви қизим, Сарви раҳматлик ўзиям неча кундан бери туз totмай юрганидан, оёқлари чалишиб сендан қочолмаган шўрлик қизим! Сен бўлсанг, ҳароми, сен бўлсанг уни ушлаган-у, мендан бир вақтлар эл сўраган мендан, энди сен Усмонқули урушга кетиб ва ўзи қартайиб қаноти қайрилган мендан, бу кўргуликлар етмаганидек, Худо тос пешонасидан уриб, олти ойдан бери бир қанжиқ, бир дард деб боши ёстиқдаги мендан, бир замонлар кўпнинг йўлига бақон ташлаб, ўзининг қонхўрлигидан қонга беланган отанг Даврон қасамининг қасосини олгансан-а, беражм ёвуз?!

Эй, Худо, эй, Худо, бир бегуноҳ гўдакни ҳўқиз аравага танғиётган золимнинг қўлларини нега шол қилмадинг?! Айт, нега?!

Эй, Худо ҳўқиз арава ортида вужуди парча-паррон бўлган боламни, Айронтепа ўнгирида юрган бесар ҳўқизлар шохлаб ташлабди, айюҳанноснинг нафи йўқ, чидамоқдан ўзга чора йўқ деб, менга таскин-тасалли бериб, авраган, ҳосилотнинг берса тўйдирадиган, урса ўлдирадиган Каримбек ҳосилотнинг, Даврон қасамининг ҳаром туки Каримқулнинг ёнини олиб, уникини жуфт

қилганларнинг тилларини нега танглайига ёпишиштирмадинг?! Айт, нега?!

– Чол жазаваси тутиб, даҳшатли туш кўраётгандек алжирап ва шу баробар сўзларни ямлаб талафуз қилар, шунданми энди унинг сўзларига тушуниш тобора қийинлашиб борарди.

Ҳолбуки, энди Усмонқулнинг ҳам қулоғига ҳеч нарса кирмасди. У отасининг ўт ичидаги алаҳсираб алжирашидан, шу дамга қадар, ўзига номаълум бўлиб келган бир сирдан воқиф бўлди-ю, худди шу лаҳзада бутун вужудини куйдириб, танига бир оғриқ кирганини сезди ва инграб юбормаслик учун лабларини қаттиқ тишлади.

Ўша куни чошгоҳга бориб чол узилди...

Кейинчалик, Усмонқул ўша кунни ўйлар экан, бир ёқдан Бозор кал далабегининг гапларига ишониб, Каримқул ҳосилот билан ора очди қилмаганини, билиб-бilmай бирор билан ёвлашганини тўғри деб топар, иккинчи ёқдан ўт-олов ичидаги алаҳсираб, отасининг Сарви деб ўксиниб йиглаганини эслар экан, юрагининг бир бурчагида Каримқул ҳосилотга нисбатан қул остида қолган чўғдек ожиз милтиллаган иштибоҳ уйғонар ва унинг кучсиз, лекин жисмини сим-сим титратадиган оғриғига дош беролмай қийналарди.

Ўша куни Усмонқул отасининг оғзидан бу гапни эшитгач, бошидан қайноқ сув кўйгандек сезди ўзини. У инграб юбормаслик учун лабларини қаттиқ тишлаганича ҳамон ғулдириб алаҳсираётган отасини ҳоли қолдириб, ташқарига чиқди.

Ўчоқ бошида чойгуш остига тапти қалаётган хотинининг кўзи Усмонқулга тушди-ю, юраги шув этиб кетди; наҳотки Сарвининг бобоси ўлган бўлса?

– Ҳа, Сарви, тинчликми? – Қизи ўлган бўлишларига қарамасдан ҳамон у эрини қизининг номи билан чақиради.

Усмонқул хотинига етмай тўхтади ва гўё оғриқ азобига чидай олмаётган одамдай юзларини тириштириб, кучаниб сўради:

– Мехри, ростини айт? Шу гап ростми?
Сарвининг ўлигини ўз кўзинг билан
кўрганимидинг?

Эрининг изтиробига тўла бу сўровидан хотини ҳамма гапга тушунди. У Усмонқулнинг иссиққонлигини, агар шу гап рост деса унинг бир балони бошлишини, лекин урушдан яримжон бўлиб қайтган Усмонқулдек ётарга тўшаги, ёпинарга кўрпаси йўқ одамнинг, оёғи узангода турган, ўзини ҳарна Элсаройнинг улуғи деб юрган Каримқул билан беллашолмаслигини, мабодо, Худо кўрсатмасин, беллашгудек бўлса, чала чопилишини биларди. Шунинг учун эрининг қон ва қасос тўла кўзларидан кўзини олиб, бошини ҳам қилди ва оғир уф тортиб:

– Йўқ. Сарвининг бобоси бекорга шубҳа қиляпти. Қизим бечорани ҳўқиз шохлагани рост бўлса керак. Ҳа, рост!.. деди паст овозда ва негадир ўпкаси тўлиб йиглаётган юборди...

Ховлига Бозоркал далабеги кириб келганида, Усмонқул хотинининг ёнига бориб чўнқайган ва ўзини босолмай йиглаётган хотинини юпатмоққа тутинган эди.

Уларнинг бу ҳолидан беҳабар Бозоркал кичкина жуссасига ярашмаган тезликда пилдираб одатича бақириб-бақириб кириб келарди.

– Ов, Усмонқул мироҳўр, бу урушга бориб дейман, тоза хотинжони бўлиб қайтибсанми-а?!

Кавалериядаги рус жийрони деб ўйлама бу ўзбекнинг аёли? Тап этдинг миниб кетабергани!

Бозоркал эр-хотин бошига етиб келиб, иккаласининг ҳам кўзида ёш кўргач, ўринсиз хушчақчақлиги тумандек тарқаб кетди. У ўзининг бемаврид ҳазилидан хижолат тортгандек бўлди, кафтдек кичкина ва текис пешонасини тириштириб, ўйлаб қолди. Кўлидаги қизил даста қамчи билан телтагини ечмай, энсаси аралаш бошини қашиди.

Усмонқул ўрнидан туриб, Бозоркалга ўгирилди. Бозоркал Усмонқулнинг ўзига юз бурганини кўриб дадилланди.

– Ҳа, Усмонқул бу нима йиги? – деди у ҳамон бошидаги рўмолини юзига тўсиб, пиқ-пиқ йиглаётган хотинга имо қилиб. Усмонқул Бозоркалнинг саволига жавоб бермади. Лекин ўзи Бозоркал томон бир қадам ташлаб тўхтади ва ички бир ўтинч билан сўради:

– Бозор ака, тўғрисини айтинг, фақат тўғрисини. Сиз биласиз, ҳаммасидан хабарингиз бор, менинг қизим Сарвини ҳўқиз шохлагани ростми ё... ё... бошқа...

Бозор кал Усмонқулнинг муддаосини сезди ва ўзининг бошидан ҳам ҳуши учди: кутилмаганда юраги тагга тортиб, Усмонқулнинг қизининг ўлимни учун гуноҳкор санаар, лекин Каримқулнинг зууми сабаб, ўшанда ҳам, ҳозир ҳам, бундан кейин ҳам, умуман абадий тил тишлаб юришга мажбур эди. Ахир улуғ ўлаат Элсаройда Бозор калга ўхшаган парти кетиб, шарти қолган чолнома кал, кал тугул урушдан оғир енгил ярадор бўлиб қайтган соғ ёшлар йўқми? Бор! Лекин улар элбоши Каримқул ҳосилотга содик маҳрам, кўз илғамас Одамбормас даштларидағи фалла далаларига далабеги бўлолмайдилар. Шу сабаб, Бозоркал Усмонқулнинг муддоасини сезди-ю, Усмонқулнинг гапини бўлди:

– Нималар деяпсан, Усмонқул иним, раҳматлик қизингни ана у оқдум одамхун ҳўқизнинг чангалидан ўзим ажратиб олганман. Ишонмасанг, бошимда Худо бор. Ўшандаям отанг тушмагур Каримқулга зуум қилиб, “Набирамни сен ўлдирдинг”, деб туриб олди.

Ўзинг биласан Усмонқул туҳмат худонинг аршидан улуғ. Гумон-имон!

У ёғини айтсанг, шу Каримқулга отангнинг нима хусумати бор, билмайман?

Элсарой элининг баҳтига шу Каримқул ўлмасин. Ўзи оч қолса ҳам, элни тўқлашни ўйлади, бечора.

Сизларга унинг ёмонлик соғинганини мен ҳеч эшитганим йўқ. Биласан, сени Айронтепадаги буғдойзорга ҳам ўзи айтиб қўйдирди. Буям сенга қайишганидан.

Одамлар бир ҳовуч дон-дон деб ўйлаётганидан хабаринг бор. Отангнинг алаҳсиб айтган гапларига ишониб, Каримқул билан ёвлашишинг ақлнинг иши эмас. Алаҳсираш бу тушдай гап. Тушга, биласан, нималар кирмайди.

Мана ҳозир ҳам сеникига шу Каримқулнинг тайинлови билан бирров хабар олгани кирудим. “Оқсоқол Усмонқулнинг отасидан боҳабар бўлиб туринг, кексайган, касалманд одам. Янаям нон чуччик пайтлар. Усмонқул ҳам урушдан яримжон бўлиб қайтган одам. Каловланиб қолмасин тагин”, деганди кеча дала бошида менга Каримқул.

Каримқул ака шундай элтарвар одам, Усмонқулбой. Сен шайтонга ҳай бер, у ҳақда бўлмағур хаёлларни бошингдан чиқариб ташла! – Бозоркал сўзлашдан тўхтаб, аввал изтироб ичидан сукутда қотган Усмонқулга бошдан-оёқ бир қур назар солди ва кутилмаганда бақириб, таҳдид билан гапира бошлади.

– Ҳой, Усмонқул худодан тўғри тила, ҳали ёшсан. Сенинг бола-бақранг ҳам, дови давлатинг ҳам тоғу тошларда турибти. Ҳа, иним Усмонқулбой шуни бил сен. Ҳаммасидан ҳам мана бу келинни ўкситма! – Бозоркал кўпдан юрагига тугиб юрган бу гапларни тўқиб солгач, бояги қўрқувни унтиб, бироз енгиллашгандек бўлди...

Усмонқул Бозоркалнинг ўғитига қулоқ тутди. Ўша куни чошгоҳга бориб Усмонқулнинг отаси ўлганини эшишиб, энг биринчилардан бўлиб Каримқул етиб келди. Чолни кўмиш учун лозим бўлган барча катта-кичик ишларга бош-қош бўлиб турди. Буни кўриб, Усмонқул Бозоркалнинг ўғитига қулоқ тутиб, тўғри қилган эканман, отам гумон билан алаҳсираган, гумон-имон, деб ўйлади...

Лекин кейинчалик Усмонқул ўша кунни ўйлар экан, бир ёқдан Бозоркал далабегининг гапларига ишониб, Каримқул ҳосилот билан ора очди қилмаганини, билиб-бilmай бирор билан ёвлашмаганини тўғри топар, иккинчи ёқдан эса, отасининг

ўт-олов ичидаги алаҳсиб, Сарви деб ўксиниб ўйлаганини эслар экан, юрагининг бир бурчагида Каримқул ҳосилотга нисбатан кул остида қолган чўғдек ожиз милтиллаган иштибоҳ уйғонар ва унинг кучсиз, лекин жисмини сим-сим титратадиган оғриғи дош беролмай қийналарди. Баъзи пайтлар бу оғриғ бутун кун-у тун уни тинч қўймасди. У жizzаки ва ҳафсаласиз бўлиб қолди. Усмонқул қоровулликдан жуда кеч, кўпинча тун ярмидан оққанидан кейин қайтар ва яна тонг юлдузи сўнмай далага отланарди. У ҳатто тушида ҳам қизини, ўзи урушга кетаётганида бижирлаб гапириб тинмайдиган, баъзи кечалари араз уриб, ярим кечада Усмонқулнинг қўйнига кириб, чучмал ва ёқимли сут хидига уни буқтириб, ухлаб қоладиган дундиқ қизчасини кўрадиган бўлиб қолди. Негадир қизи унинг тушига саккиз ёшли эмас, тўрт ёшлигига бўлиб киради.

Кўпинча у Айронтепа этагини айланиб юрар экан, зил-замбил ўйлардан калавасининг учини йўқотиб қўяр, ҳаммасидан ҳам ёмони, лаънати контузиянинг асоратими, бир пасда боши қизиб, фувуллай бошлар, бу ҳам етмагандек, шу баробар қоқ миясидан бошланган куйдирги ҳарорат бутун вужудига ёйиларди. Бундай чоғлар Усмонқул сирқирай бошлаган, андуҳ тўла юрагини чангаллаганча бу зил-замбил ўйлардан чалғиши илинжида тагидаги қирчаниги Оқбургунга зуғум қиласди:

– Чух, ув ҳаром қоттур! Мунча имилламасанг, еганингни оқла-да лаънати! Чух, чух, чух! – деб Усмонқул отнинг биқинига секин-секин пошнасини нуқар, қўлидаги қамчисини ҳавода ўйнатиб, урмоқقا чоғланар, лекин ҳавони шув этиб кесган қамчи Усмонқулни этагига келиб тегар эди. Шундай бўлса-да, қаттиқ пошналарнинг оҳиста-оҳиста ниқувидан, этик қўнжининг кутилмаганда шатирлаб кетишидан сесканган от, иримига бўлса ҳам лўқиллаб бироз жадаллашган бўлар, лекин бир фурсат ўтмай яна ўзининг бояги бир маромдаги

мадорсиз юришига ўтарди. Усмонқул эса отнинг йўртишига алаҳсиб, бир дам юрагини кемираётган ўйлардан фориғ бўлгандек бўлар, лекин от секинлашиши билан яна ўша оғир ва аламли ўйлар бало-қазодай бостириб келарди. Ҳаммасидан ҳам даҳшатлиси шунда эдики, у ўйлаган сари ўзига мудҳиш бир ҳақиқат аён бўлиб бораётганини сезар ва унинг зилдек юкидан ваҳмга тушарди.

“Йўқ, мумкин эмас, отам ўша куни касалнинг зўри билан алаҳсиради, деб ўйларди Усмонқул отнинг жиловини қўйиб юбориб, энди у ўзининг от устида кетаётганини унутарди.

– Ҳа, отамнинг гумон билан алаҳсигани рост. Ахир, бу мумкин эмас! Ахир, Каримқул бу ёвузликни қилмайди. Отасининг қасосини олгани бекор! Ахир, кўнглида кири бор одам, Усмонқул урушдан қайтган кун ҳаммадан аввал келиб ҳол сўрармиди? Янаям унга қайшишиб, ҳафта ўтмай уни Айронтепага қоровул этиб, Бозоркалдан манави отни бериб юборармиди? Ахир, кўнглида кири бўлса, отасини жоназасида ҳамма ишга ўзи бош-қош бўлармиди?!

Йўқ, отасининг касалнинг зўридан алаҳсирагани рост!”

Айронтепани айланадиган ўзига маълум йўллардан бир маромда юриб бораётган от, эгасининг кутилмаганда овоз чиқариб мингирилаганидан сергакланиб, қулоқларини дикрайтириб, бироз секинлади. Усмонқул отнинг бу холатига эътибор ҳам қилмай, ўзича мингирилади: ҳа, отамнинг алаҳсирагани рост. Алаҳсираган. Отам... алаҳсираган!

Усмонқул изтироб ўтида қоврилиб, отасининг алаҳсираганига, қизини Каримқул ўлдирмаганига ўзини ўзи ишонтиришга, юрагини эзаётган шубҳалардан кутилишга ҳаракат қиласр ва ҳатто бир қадар бунга эришарди ҳам. Лекин шу ишонч ва шу таскин, тассали манзил этган юрагининг туб-тубида бир туйғу яшардики, баъзан бенигоҳ бу туйғу бош кўтариб, Усмонқулнинг ҳозиргина ором топган жисмини чармок урган дараҳтдек

кўйдириб, жизғанак қилиб ташларди. Бундай ҷоғлар ғазаб ва қаҳрдан кўзларига қон тўлган Усмонқулнинг бўғзига бир сўз келиб тиқиларди: қасос, қасос, қасос!!!

Каримбекнинг Усмонқуллар хонадонига бўлған кек ва нафрати ҳам анча эски ва ғазабли эди. Унинг юрагини тош каби босиб ётган нафрят ва алам йиллар ўтиши билан кўпайса кўпайибди, камаймабди, йигилса, йиғилибди, сочилимабди, газаклаб иллатласа, иллатлабди, соғаймабди. Буни у ўша Усмонқулдан қолган чўлпанани ўлдириб қўйган куни сезди. У ўша кунгача бошига келган барча дард-ситамларни унудим, ким қилган бўлса, яратганга солдим, деб юрарди. Бу тасаллиси, бу йўриғи ҳато экан. Буни у ўзи эл бошига хукм бўлиб келди-ю, тушунди. Мадомики, ўзи ёр бўлиб, оёғинг узангига етибдими, сен хўрлаганларни, топтаганларни унтишингга ҳаққинг йўқ! Томирингда бобомерос қонинг гуптириб турар экан, бу беш кунлик дунёда сенга азоб берган, бошингга не бир қора кунларни солғанларни унтиб, улар олдида нафас ютиб, жим кетишинг эркакнинг иши эмас. Бу қасосли дунё!

Айни шу кунларда Каримбек мана шу ақида билан яшар, ҳолбуки, унинг бундан ўзга чораси ҳам йўқ эди. У фақат шу ақидагагина суюниб, ўзининг мудҳиш жиноятини ҳақ деб топар, тақрор-тақрор шунга ўзини ишонтироқчи бўлар, лекин ўзининг қайта ва қайта алданаётганини ўзича ҳам бўй бермас, юрагининг қай бурчагида фимирилаб турган ботиний бир сезги билан туряди.

Фақат ароқнинг ўткир таъсиридангина буларнинг ҳаммасини унтиш мумкин эди. Шунинг учун ҳам унинг белида пичоқ ўрнида уруш эсадлиги кичкина сув бидончасида стирт юрарди. Аслида кайф устида Усмонқулнинг қизрасини ҳам таранг, ҳатто жон аччиғида чариллаб йиғлашига ҳам қарамай аравага тиркаб боғлаганди. Кайфи тарқагач, Каримбек ўзининг мудҳиш жиноятини англаганди. Лекин энди кеч. Фақат битта йўл бор – ҳаммасини унтиш керак, фақат унтиш керак!

Кейинчалик Каримбек унутиш билан ҳам иш битмаслигини, азоблардан қутилиш учун бирор бир жүяли йўриқ, ақида кераклигини англади. На чора, ақида ҳам топди.

Ақида ва спирт, спирт ва ақида – Элсарой қишлоғининг ҳосилоти Каримбекнинг фақат ўзигагина маълум зирхли ниқоби бўлиб қолди.

Каримбек от устида Одамбормас даштни айланниб юрар экан, баъзан ўзини юрагининг тубидаги ўша ботиний бир туйфуга, ҳаммаси ёлғон-ёлғон деб ҳайқираётган ўша ички бир овоз ҳукмига топширади. Бундай чоғлар у ҳамон ўзининг Усмонқулнинг хотини Мехринисони унупотмаётганини, уни унутиш мумкин эмаслигини, Усмонқулнинг қизрасини ҳам отасининг қасоси учун эмас, йўқ шу аёлнинг вақтли висолига етмаганлиги учун, дуркун-дуркун қизлар олмадек қўйнига келиб киришни хоҳлаб турган бир пайтда, бева (ҳали у вақт Усмонқул урушда эди) бир аёл бўй бермаганига, ҳатто уни ҳосилот Каримбекни назар-писанд қилмагани учун, унинг ифлос йўриғига юргагани учун ўлдирганини тан оларди.

Аслида ҳам шундай бўлган эди. Отасидан эрта етим қолган Каримбек тенгкурларидан анча олдин эр етди. Шу каби тириклик ташвишларини ҳам у ўз тенгларидан хийла олдин бошлади. Қанча ур-йиқит билан эндиғина оёққа турган колхознинг қўйини боқди, тўғрироғи, чўлиқ бўлиб, машхур Шафоат чўпонга эргашди.

Заранг таёғини елкага ташлаб, Одамбормаснинг оёқ етмас кенг-кенг ҳаворларида бодраб ўтлаб юрган сурув бошида ўтирган Каримбек зерикишдан тарс ёрилай дерди, ўшанда. Лекин кўнишибдан, чидашдан ўзга чора йўқ, етти қора кўзнинг тақдирни шунга боғлиқ. Бундай чоғлар хаёлларнинг борлигига шукур қиласан, киши.

Ўзидан икки кўклам кичик Мехринисо шу тариқа илик марта унинг ҳам дунёсига кириб борди. У келиндек ийманиб, қимтиниб, нозланиб, тоф ортидан чиқиб келаётган

куёшга боқиб, Мехринисони ўйларди. Баъзан у келиндек уятдан, меҳрдан-муҳаббатдан лов-лов қизариб уфқ бағрига бош қўяётган куёшга боқиб, Мехринисони ўйларди.

Ёқимли, хузурбахш, энтиқтирувчи ўйларнинг адоги йўқ эди ўшанда.

Ҳатто у шундан кейин икки марта Мехринисони яқиндан кўрди.

Биринчи марта тўй баҳона қишлоққа энганида кутилмаганда у қишлоққа кираверишдаги кўча муюлишида олдидан чиқиб қолди. Каримбек буни ўзича хаёл қилганди. “Қани энди шу топда тақимига тушган ўрим соchlари ерни ўтиб, ясанган-тусанган Мехринисо чиқиб қолса”, деб ўйларди у қишлоққа яқинлашар экан. Ҳеч бири мантиққа тўғри келмаса-да, бўз бола Каримбек қизни ясанган-тусанган ҳолда тассавур қилган эди ўшанда. Лекин унинг ҳам ўзича бунга асоси бор эди, Мехринисо кимсан колхоз актини – Қобул шўронинг қизи ахир. Тасодифни қаранг, кўча муюлишида шундай ўйлар оғушида келаётган Каримбекнинг қаршисидан лоп этиб неча кун, неча ойлардан бери ором бермай юрган гўзал қиз чиқиб қолса бўладими.

Қиз ҳам уни – етимча бўз бола Каримбекни таниди. Ораларидаги масофа ҳали анча бўлишига қарамасдан бўз бола нигоҳидаги алланечук эҳтиромли туйфунинг илиқ ва ўткир тафтини сезди: дув қизарди. Юрагининг тасур-тусури ўзига ҳам сезилди: хижолат бўлиб бошини қуий солди.

Каримбек ҳам ҳаяжонланиб кетди. Ҳатто у қиздан ҳам ёмон аҳволга тушди. Қизнинг уялганидек бошини ҳам қилганини кўриб, ўзи ҳам беихтиёр ерга боқди.

Қиз унга етмай ўзини кўча биқинидаги бир табақали очиқ эшикка урди. Бу уй Қора фирманини эди. Каримбек отасининг шу Қора фирманинг хуни учун отилганини билар ва бу хонадонга нисбатан юрагида кучли нафрат туйиб яшарди. Шу сабаб ҳозиргина қиз кириб кетган, ҳамон бир

табақаси очилиб турған эшик олдидан жимгина ўтиб кетишдан бошқа илож тополмади.

Кейинчалик, түрт тарафи ҳам уфқларга туташиб кетган Одамбормас даштида сурув орқасидан юрар экан, у ўзининг ўшандаги қиз олдида бошини ҳам қилганини кечиролмасди. Эҳтимол, тик қараб бораверганида, қизнинг бурилаётганини кўриб, уни тўхтатар эди. Кейин “Мехринисо, мен сени яхши кўраман. Мен сени кун чиқаётганда ўйлайман, мен сени кун ботаётганда ўйлайман! Кейин яна нима дер эди? Ҳа, яна шундай дер эди: Мехринисо, жонгинам, тўғрисини айт, сен ҳам мени ўйлайсанми?” кейин яна нима дер эди? Ҳа, яна бундай дер эди...

Бўз бола Каримбекнинг қизга айтадиган жуда кўп гаплари бор эди. Афсус, ҳаммаси юрагида қолди. Лекин ана шундай ширинармонлар оғушида унинг зерикарли кунларига файз кирди. Энди унинг учун бийдай даштда бир маромда кечадиган кунлар жон эгови бўлмай қолди.

Ширинармонлар оғушида маст бўлиб юрган Каримбекни тақдир яна бир бор сийлади. Лекин бу охирги сийлов эканлигини у ҳали билмас эди. Сурувга қон сийма касали теккач, у шошилинч қишлоққа борадиган ва колхоз активларини бундан хабардор қилиши, ҳатто лозим бўлса, уларни эргаштириб келиши керак эди. Бу одамлар орасида қишлоқ шўросининг котиби Қобил шўро ҳам бор эди.

У йўлга отланганида қуёш терак бўйи кўтарилиган эди. Бу паллада ҳамма иш жойида бўлишини Каримбек биларди, лекин шундай бўлса-да, у от бошини Қобил шўронинг уйи томон бурди. Унинг муддаоси, иложи бўлса, Мехринисони кўриб гаплашиш, ҳеч бўлмаганда дийдорига тўйиш. У азиз авлиёларни тилдан қўймай, Худони бирорвга бермай, Мехринисонинг уйида бўлишини, чақирганда, чотқиллаб, кокилларини силкитиб, ўзи чиқишини худодан ёлвориб сўрарди. Кетишга чоғлана туриб, Каримбек сув сўраса, Мехринисо бўлса, учиб кириб уйдан сув тўла

кўзани олиб чиқиб, оёқларининг учи билан кўтарилиб, чақмоқ кўзларини сузиб, ширинармассум билан уялиб, қимтиниб сув тўла кўзани узатса, Каримбек боши узра кўзани кўтариб сипқорар экан. Мехринисо унга меҳр билан термулиб турса, сувга қонган Каримбек эгардан энгашиб, кўзани узатса, узатаётисиб... узатаётисиб, олмоққа чоғланган қизнинг оппоқ қўлларидан оҳиста ушласа, ушласа, ушласа, ушлаб тураверса! Каримбек ўй таъсирида ҳаяжондан энтикиб кетди. У ҳозир ўзининг отда бораётганини ҳам унугтан эди.

Каримбек Қобил шўронинг дарвозаси олдида овоз берганига ҳам анча бўлдики, ичкаридан ҳеч ким дарак бермади. Энди у сабри чидамай дарвозани қамчи дастаси билан қоқа бошлади: тақ-туқ, тақ-туқ, тақ-туқ,... Барибир ҳеч ким чиқмади.

Каримбек яна овоз бериб чақириди, яна қамчи билан таққиллатди, ичкари жим.

Начора, латтаси сувга тушиб, шумшайиб орқага қайтишдан бошқа илож йўқ. Каримбекнинг алами келиб кетди. У от жиловини ортга бураётисиб, алам устида отга шундай қаттиқ қамчи тортиди, буни кутмаган шўрлик от аччиқ кишинаб юборди.

Қишлоқнинг айланма тор кўчаларидан ўтиб, қишлоқ совети томон дарғазаб бораётган Каримбек тўсатдан қувончидан қичқириб юбораётди. Шундок рўпарасида овлоқ кўчада етти-саккиз ёшлардаги болани етаклаб, уч-тўрт ёшлардагисини эса кўтарганича Мехринисо келарди. Қиз аввалги кўргандаги кийимда, бошида бўз рўмол, эгнида ранги униқиб кетган сатин минсак. Укасининг оёғига қараб у жуда секин юриб келаяпти.

– Ов, отанг қаерда? – қизнинг рўпарасига етиб келган Каримбекнинг сўроғи шу бўлди, бошига келгани ҳам шу эди. Қизни кўрди-ю, негадир юраги ҳапқириб, қайнаб бораётган қони, совуб кетди ғазаби каби, демоқчи бўлиб юрган баландпарвоз сўзлари ҳам тумандек тарқаб кетганини ўзи ҳам сезмай қолди.

– Ов, отанг қаерда? – Каримбек ҳеч бундай демоқчи эмасди. Лекин иккинчи

марта ҳам шундай деб юборди. Қиз ортидан югуриб келаётган укасидан кўзини олиб, от устидаги бўзболага боқди. У шундай бир ўткир нигоҳ билан Каримбекка қарадики, бу нигоҳга чидаш, бардош бериш, янам шу қизни ўзи тушларида кўриб чиқадиган бўзболага ҳеч бир мумкин эмас, эди.

Бўзбола Каримбек бўйи етган қизнинг оловли нигоҳида куйди, жизғанак бўлди. Бўзбола Каримбек бўй етган қизнинг сирли, сехрли жодусидан ер билан забун бўлди.

Бўзбола Каримбек бўй етган қизнинг афсунгар ишвасидан тўлди-тўкилди...

Каримбек кейинчалик ўшанда қиз билан нималар деб гаплашганини эслай олмай, узоқ вақт гаранг бўлиб юрди. Ўзича жуда кўп беъмани гапларни айтганман, деб ўйлар, шунга ўзини ишонтиromoқчи бўлар, лекин ўзига ўзи ишонавермагач, албатта, кейинги учрашувимда дилимдаги ҳамма гапни, ҳа, ҳамма-ҳаммасини айтаман деб ўзини овутар эди. Афсуски, бу овунч, овунчлигига юракда лаҳза чўққа айланди.

Каримбек қизни кейинги кўришга улгурмай, бир шум хабар Одамбормас даштини тало тўти қилди. Қобул шуро Элоға батрак билан куда-андага бўлганмиш, қизи Мехринисони Ўсмонқулга берганмиш.

Кўмирдан ҳам қора ўша кечака ҳувиллаб ётган Одамбормас даштининг яйдоқ ҳоварларини ялаб-юлқаб кеч кузнинг совуқ шамоли эсиб чиқди. Баданга нинадек қадаладиган бу совуқ шамол қиличини ялонғочлаб келаётган қора қишдан хабар берарди.

Бундай кечалар қўйларни қўрага қамаса ҳам бўларди. Лекин Каримбек шуро қисматга қасдма-қасд эгардан тушмай даштнинг ичкарисига узоқ-узоқларга сурувни ҳайдаб кетди. Сурув ортидаги отда қунишганича ўтирган бўзбола Каримбек ўша кечака ҳаётида биринчи марта ўз тақдирни ҳақида чуқур ўйга толди. Ўша кечака унинг юрагида одамларга нисбатан қаҳр-ғазаб ҳиссини ўзида жамлаган оғриқ пайдо бўлди ва бу оғриқ тош каби юрак тубига чўкди.

Шип-шийдам дала ўнгирларини ялаб, сарсари кезаётган шамол тонгга бориб таққа тўхтади.

Тоғ боши оқариб, тонг отиб кела бошлади. Куюқ, нам булатларга тўлиб, хўмрайган осмон поёнсиз Одамбормас дашти узра янада пасайиб, бало-қазодай эниб келди. Совуқ шамол тўхтаганига бирон фурсат ўтмай, симсим ёмғир ёға бошлади.

Ҳамон эгар устида қунишиб ўтирган бўзбола Каримбекнинг ёноқларидаги томчи ёмғирми ё кўз ёши эканлигини англаш мушкул эди...

Инсон ҳаммасига кўникар экан, кўнишдан ўзга чора бўлмагандан кейин нима қилсан. Аввалига Мехринисонинг фироғига чидай олмасам керак деб юрди. Лекин кейинчалик бу кўнгил таҳқирига начора кўнди, кўниқди.

Шу орада у ҳарбий хизматга чақирилди. Хизматни ўтаб ўйга қайтди ва Мехринисо қиз туққанини эшилди. Орадан кўп ўтмай Каримбек ҳам уйланди. Лекин хотинининг меҳрига қонмай, яна урушга отланди.

Тошдан яралган бу бош кўрмаган кўргиликлар қолмагандир. Етимлик, муҳтоҷлик, кўнгил таҳқири, уруш – Каримбек кўрмаган яна нима қолди. Хайрият, шуро қисматида худо ярлақаган кунлар бор эканки, ҳар лаҳза ҳаётига ўлим, фалокат ҳавф солиб турган даҳшатли урушдан ўнг қўлининг уч бармоғидан ажраган бўлса-да, тирик қайтди, буям йигитнинг баҳти. Шуро қисматнинг Каримбекдан аригани, яхшилик сари эврилгани рост эди. Баҳтсиз, фурбатли умрнинг айқаш-үйқаш сўқмоқларида улоқиб юрган йигитни тақдир яна бир бор сийлади, Элсаройдан урушга кетган йигитларнинг биринчи тирик қайтган вакили Каримбек ҳосилот этиб тайнинланди.

Каримбек ҳаммасини унутиб, ҳосилотлик жиловини маҳкам тутди. Сенга ишониб шу вазифани бердими, демак, оқла! Ел-югур, ўзингни ўтга-чўққа ур, барибир ўлмайсан. Лекин ҳозир урушда бўлсанг, ўлишинг учун дайди бир ўқ кифоя. Шундай экан, мадордан

кетиб, силланг қуригунича ишлайвер, шундагина ўнг қўлингдаги йўқ уч бармоқнинг оғриқсиз оғригини унугтиб яшайсан!

Каримбек уруш айни қизиб турган ўша йиллар ростдан куйиб-ёниб ишлади. Ишлагандирки, бутун бошли Элсарой қишлоғининг пой-поёnsиз далаларида унган бир туп фалладан, бир тўп шувоққача ва ҳатто одамларнинг уйидаги мол-ҳолдан то кўндаланг чўтгача ҳамма нарса ғалаба учун бўлган ўша кунларда агар лозим бўлиб қолганда ҳеч бир кимса уйидаги, ўзида бор нарсани, Каримбекнинг олдида йўқ дея олмасди. Улар Каримбекнинг синчилигига тан беришган эди.

Ана шундай алғов-далғов кунларда Каримбекнинг юрагидаги эски яра янгиланди, яна у бўзболалик даврининг ширин изтиробини туйиб, Мехринисо васли-висоли билан яшай бошлади. Мехринисо энди анча улғайган, йўғон чўзилган, ингичка узилган шундай оғир кунларда бутун бошли бир рўзгорнинг барча юкини елкасида тутиб яшаётган босик, сабр-тоқатли аёл эди. Унинг эри Усмонқул урушга кетган, мана олти ойдирки, хат-хабар йўқ, қайнотаси тўшакли касал, қизи касалманд, шунга қарамасдан бу аёл бирорга финг демай, баъзилардай айюҳаннос солмай тишини-тишига қўйиб, жимгина яшаетти. Янаям, мусибатли бу кунлар руҳини қанчалик эзмасин, камондек қора қошлардаги назокат, ғам тўла маъюс кўзлардаги меҳр, сутга чайилгандек юзлардаги ҳорғин гўзаллик, ҳар нега қодир сарвдек дуркун қадди-қомат ҳар қандай эркакни ер билан забун қилади.

Каримбекнинг юрагини безовта қилаётган бу ҳислар ер қаъридан ташқарига отилиб чиқиш учун бирор бир туйнук излаётган иссиқ, оловли вулқонга ўхшарди. Каримбек зўр бериб Мехринисонинг васлига етишни ўйлар ва ҳатто етишмогига амин эди.

У ўз ниятини ўтган иили буғдои ўрими айни қизиган кунлардан бирида амалга оширмоқчи бўлди. Бозоркалнинг хабарига

кўра, Мехринисо туманга тушиш учун жавоб сўрабди.

Эгар устида чўнқайганича Бозоркалнинг ҳисботини эшитаётган Каримбек бепарво оҳангда сўради:

- Туманда нима иши бор экан?
- Ҳарбий комисариатга учрашар эмиш.

Каримбек фижинди; “Итирисқи, Усмонқулни суриштироқчи. У бўлса, ўлиб кетгандир ҳойнаҳой. Мабодо, мендан нима шундай олти ойлаб дарак бўлмаганда хотиним суриштирамиди? Йўқ, суриштирамасди, лаънати! Бу Мехри бошқача хотин!” узоқ сукутдан сўнг Каримбек Бозоркалга, ҳосилотдан жавоб кутаётган содиқ маҳрамга бундай деди:

– Майли, жавоб беринг. Лекин келмас кунининг тушгача бўлган нормасини ҳам эртага қўшиб беринг. Шу жойни бўлмагунча жавоб йўқ денг. Кечқурун ўроқ бошига ўзим чиқиб бораман. Бўйруқни айтганимдай бажаринг!

Эртасига Каримбек қишлоқдан хийла узоқ Мўминкалнинг даштида буғдои ўраётган ўроқчиларнинг олдига отланганида оқшом тушаётган эди. У йўлда уч-тўрт ўроқчи аёлларни учратди. Болалик бу аёллар эшакларини қичаб, шошилганича қишлоқ томон кетиб борарди. Каримбек уларнинг орасида Мехринисони кўрмади; негадир илиқ бир туйғудан унинг юраги ҳатқириб кетди.

Каримбек ўроқчилар бошига етиб келганида, аллақачон атрофни қоронгулик қоплаган, лекин одам одамни таниши мумкин эди. Уч-тўрт қиз-жувон жимгина ўроқ ўришар, фақат чалғиларнинг шиф-шиғи оқшом сукутини бузиб, ҳувиллаган далага файз бағишиларди.

Отнинг пишқириғини эшитиб, ўроқчилар ҳосилот келганидан хабар топдилар. Бозоркал Каримбек томон пешвоз юрди. Қиз-жувонлар бир-бирини туртиб шивир-шивир қилишиди.

Ўзи томон шошилиб келаётган Бозоркалга эътибор ҳам қилмай, Каримбек пиқ-пиқ кулишаётган қиз-жувонлар томон термулиб

қаради, лекин уларнинг қайси бири
Мехринисо эканлигини тахминлай олмади.

Каримбек Бозоркалнинг саломига аликсиз, қўйл узатиб, от устида у билан кўришди. Бу қизлар Мехринисога ёрдам қилишаётганини, деярли қўшиб берилган жойни ҳам ҳозир тугатишини, сўнгра қизларни ўзи қўшхонага эргаштириб кетишини ва Мехринисонинг ҳам кеч бўлиб қолганига қарамай қишлоққа кетмоқчи бўлиб турганини Бозоркалдан жим туриб эшилди. Каримбек Бозоркалнинг ишларини тасдиқлаган бўлиб, бош ирғади ва индамай от бошини узоқларда жинчироги лип-лип ёнаётган қўшхона томон бурди.

У от қадамига мос тебраниб, Бозоркалдан узоқлашар экан, севинчини босолмас, ҳар куни сифиб юрган эгар устига сифмай, безовта бўларди. Ҳамма иш унинг қўнглидагидай бораётган эди.

Бўзбала юрагини яралаган, фақат тушларидагина ўпич берган хурлиқо Мехринисонинг бугун у васлига етади.

Тушида эмас, йўқ ўнгida, ҳа, ўнгida қониб-қониб ўпади. Тушида эмас, йўқ ўнгida, ҳа, ўнгida эҳтирос билан қониб-қониб қучади.

Тушида эмас, йўқ ўнгida, ҳа ўнгida биринчи марта ва абадий битта жисму жонга айланади.

Бозоркал ҳам, ҳиринглаётган ўроқчилар ҳам кўз илғамайдиган бўлиб қолгач, Каримбек от бошини унга бурди.

У ўроқчиларни айланиб ўтиб, Мехринисо қайтадиган йўлга чиқиб, у келадиган томонга синчиклаб тикила бошлади. Лекин кўзлари ҳеч нарсани илғамади.

Каримбек узоқ кутиб қолмади. Аввалига ўт-ўланларни босиб-янчиб келаётган эшакнинг шивири, сўнгра синчиклаб қарайвергач қоронгулик ичida элас-элас қора кўринди.

Каримбек отдан тушди ва от қозигини қоқди. Қўлидаги қамчини белбоғига қистириб, қўлларини белига тираганича энди аниктиниқ кўриниб қолган эшакли қаршисида қодирайди.

Мехринисонинг эшаги аллақачонлар қулоғини дикрайтириб, қадамини секинлатган эди. Эшакдаги бу ўзгаришни кўриб, Мехринисонинг юрагига шубҳа оралар ва юраги шув этиб кетди, замон ёмон, илойим, ёмоннинг юзини тескари қилсин. У термулиб олдинга қаради, лекин ҳеч нарсани кўраолмади. Боя Бозоркалнинг “Қўрқмайсанми Мехрибека?” деган сўроғи ёдига тушди.

Мехринисо жаҳл билан эшакнинг бўйнига халачўп билан урди ва овозини чиқариб эшакни ёниди:

– Их, ҳаром улгур! Их, дейман, нима қилиқ бу! Их!

Эшак қулоғини дикрайтганини ёзмади-ю, лекин бироз юришлади. Шу вақт Мехринисонинг кўзи қаршисида қодирайиб турган қора қўланкага тушди ва жони чиқиб кетди. Оз бўлмаса, бақириб юборай деди.

Лекин жонига қўланканинг ўзи оро кирди.

– Мехри, сенмисан?! – бу таниш ўқтам овозни эшитиб, қўрқувдан тош қотиб қолган жувоннинг жисмига жон кирди.

Бу орада ўқтам овоз эгаси аёл томон юрди. Зум ўтмай, жувоннинг тўхтаб қолган эшаги ёнида пайдо бўлди ва икки қадамлар чамаси нарида тўхтади.

Қўройдинда Мехринисо овоз эгасини таниди; ҳосилот Каримқул ака-ку! Таниди-ю, жувоннинг бояги қўрқуви бутунлай йўқолди, лекин баданидан илон ўрмалагандек ўзини ноқулай сезди. Ҳозиргина тўхтаган Каримқулнинг ўзига томон қадам ташлаганини кўриб, ҳосилотнинг муддаосини Мехринисо англади-ю, кутилмаганда дарғазаб ва босиқ овозда бақириб юборди:

– Ҳа! Каримқул ака, нима бу қилиқ?!

Жувоннинг бу қаҳрли сўрови Каримқулни тўхташга мажбур қилди. У ҳаяжондан энтикар, билинار-билинмас ҳансирар, аранг ўзини тутиб турарди.

– Мехри?!.. Мехри?!... Мени қийнама! Ахир, ўзинг ҳаммасини биласан-ку! Бас, шунча куйганим етар, ахир!!!

Мискин бир овозда энтикканча сўзлаётган Каримқул ҳозир шундай бир ҳолатда эдики, энди у ҳеч нарсани эшитмас, ҳар қандай эътиroz билан ҳисоблашмас ва энди уни ҳеч қандай куч бу йўлдан қайтаролмас эди. У шиддат билан Мехринисога яқинлашди, жувоннинг қарғаниб юлқинишига қарамай, уни даст кўтартганча, эшак устидан юлиб олди ва ҳансираганча экинзорга оралади.

Улар узоқ олишди. Бир гилам ўрнидаги экинзор ер билан битта бўлиб кетди. Каримқул ҳансираганча жувонни ўпар, ечинтиromoққа чоғланар, лекин уч бармоқсиз ўнг қўли панд бериб, йиғлаб юлқинаётган, типиричиладиган жувон Каримқулнинг қучогидан отилиб чиқар, лекин бутунлаай халос бўлиб кетолмай яна ваҳшийлашган Каримқулнинг тагига тушиб қоларди.

Охири Каримқул бутунлай ҳолдан кетди ва шу баробар ҳозиргина қонида жўш уриб қайнайётган эҳтирослари сўниб, ҳафсаласи пир бўлиб қолди. Беҳол бир кайфиятда у жувоннинг ён тарафига ўзини ташлади. Лекин ҳиқиллаб йиғлаганча юлқинаётган Мехринисони қўйиб юбормади; унинг елкасидан босиб, ёнига ётқизмоқчи бўлди. Турмоққа чоғланадиган Мехринисо яна ўмганлаб кетди ва Каримқулнинг шундай ёнига ёнбошлаб қолди. Буни кўриб Каримқул шивирлади:

– Мехри, бир пас шундай ёт, кейин қўйвораман!

Кўройдин бўлишига қарамасдан, жувоннинг кўзлари даҳшатли тарзда олайиб кетди ва изидан нафратга тўла шивири эшитилди:

– Ифлос!!!!.. Ҳароми!!!!..

– Майли мен ифлос, мен ҳароми... Фақат сендан илтимос, шу ҳолатда, мана кўриб турибсан кучоқлаб ётганим йўқ, фақат кўлингдан ушлаб турибман, агар қимиirlассанг яна кучоқлашга мажбурман Мехри, кел, шу ҳолатда бироз гаплашиб олайлик! – деди эмранганидек Каримқул.

– Сен билан нимани ҳам гаплашардим?!

– деди йиғламоқдан бери бўлиб Мехринисо; турмоққа чоғланди. Лекин Каримқул куч билан уни қимиirlамасликка мажбур қилди.

– Тўхта, Мехри! Тўхта!.. – деди у вишиллаб, жувоннинг елкасидан босиб.

– Нима ўша итириксги Усмонқулга бизни олмайсанми-а?! Ўша нимёуритадан бизнинг қаеримиз кам-а?!

– Каримқул! – аёл куч билан бир силкиниб олди. – Сен шуни билиб қўй! Сен Усмонқулнинг ҳаром тукига ҳам арзимайсан! Яхши кўрар эмишсан-а! Яхши кўрган одам бундай шармандалиқка қўл урмайди. Замоннинг ноботлигидан фойдаланмайди. Замон сенга йўл берганидан фойдаланиб, сен еган најкосатнинг сассиги юртни бузаяпти..

Бир замонлар яхши кўрган бўлсанг, агар, мабодо, мен ҳам яхши кўргандек бўлсам – у бир замонлар эди. Энди менинг ўша итириксги Усмонқулдан болам – қизим бор. Мен сени қизимнинг ҳалол, покиза ҳаётига сенинг ҳаром-хариш истакларингни алмаштирайми?! Хато қиласан! Сени қизимнинг тирноғига тенг кўрмайман. Ҳали ўйнашлик отаси у ёқда турсин, агар, мабодо, Усмонқулнинг ўлгани рост бўлса, шунда ҳам сен билан эмас, бошқа билан рўзгор тутаман.

Менинг гапим шу. Энди қўлимни қўйиб юбор, мараз!!!

Каримқулнинг жувон билан бироз гаплашишдан мақсади: фурсат ўтиб, сўнган эҳтирослари гупирса, хоҳ гап билан авраб бўлсин, хоҳ куч билан бўлсин (кучга ҳам ишонч йўқ, уч бармоқ панд бераяпти) муродига этишиш эди. Лекин ҳозир у ўзи севган аёлнинг қаҳрли ва шафқатсиз ҳукмини эшигтгач, ҳеч нарса чиқаролмаслигига, фақат аёл олдида яна бир марта шарманда бўлишига амин бўлди ва Мехринисонинг қўлларини қўйиб юборди...

Зим-зиё қоронгу кеча қўйнида ҳувиллаб ётган Одамбормас даштида шамол жимиirlаб турган сон-саноқсиз юлдузларга термулган қўйи Каримқул уятданми, хижолатданми, эҳтимол, қалбининг ягона бойлиги, неча

йиллардан бери муқаддас санаб юрган, ўзи учун азиз бўлиб қолган аёлдан, кутилмаганда, тўсатдан, шармандаларча ажралиб қолганидан изтироб чекмоқда эди. Бу изтироб юки шунчалар оғир эдики, ҳозир унга ўлим ёки ҳаёт деса, ҳеч иккilanмай ўлимни танларди. У абгор бўлган жисмини ердан узиб, ўрнидан турар экан, шундай хulosага келди: “Бу дунёда ё у яшайди, ё мен!”.

Шундан кейин мана орадан роса бир ярим йил ўтяптики, ҳамон иккаласи ҳам яшаб юрибди. Фақат бу орада Мехринисонинг қизи Сарви ўлди, эри Усмонқул яримжон бўлса-да, урушдан омон қайтди.

Ҳали Усмонқулнинг отаси ўлмасдан бурун, чамаси Усмонқул Айронтепадаги буғдойзорга қоровул этиб тайинлангандан йигирма кунлар кейин, Каримқул Айронтепа этагида Усмонқул билан учрашди ва бирбирига юлдузи тўғри келмай ажралиши. Ўшанда Каримқул:

– Усмонқулбой, сизни урушдан шапкўр бўлиб қайтибди, деб эшитдим, шу ростми? Рост бўлса, кундузи бўлмасаям, кечасига роса қийналаётгандисиз! Ҳа, ҳа, ҳа! Эй, шу уруш ҳам, яримжонлик ҳам қурсин-да! – деди.

Бу гапдан Усмонқул дув қизарди ва бирдан жаҳли чиқиб кетди:

– Ҳа, тўғри айтасиз Элбоши, – деди ўшанда Усмонқул. – Уруш қурсин, уруш! Уруш ҳаммамизни яримжон қилди. Бирор танқ остида тупроққа қорилиб, шапкўр бўлди. Яна бирор қора буханкани қўлига тикиб, жондан азиз бармоқларидан ажралиб яримжон бўлди!

Ўшанда икковининг ўртасига Бозоркал тушмаганида бирор кор-ҳол юз бериши аниқ эди.

Ўшанда қони қайнаб Айронтепадан қайтар экан, Каримқул ранглари заъфарон, чўпдай озгин, ёноқ суюклари туртиб чиқсан Усмонқулни ўйлади ва шундай хulosага келди: бетоб отасидан аввал ўлиб кетадиган сиёғи бор нокаснинг. Йишлоolloҳ, бирор ўлдирмаса ҳам, яқин орада ўзи оёқдан ииқилади. Кейин турмоги душвор!

Лекин кейинчалик у яна Усмонқул билан икки-уч марта рўбарў келди-ю, ранглари заъфарон, чўпдай озгин, ёноқ суюклари туртиб чиқсан, ҳилвираб турган бу йигитнинг ўша шапкўр кўзларида чақмоқдек ўткир қатъият ва ўзига ишонч кўрди.

Шундан буён Каримқул баъзан от устида Одамбормас даштни айланиб юрар экан, юраги тубида фақат ўзигагина маълум бўлган ботиний бир туйғу жунбушга келар ва ўзини шу туйғу ҳукмига топширади. Бундай ҷоғлар у ҳамон ўзининг Усмонқулнинг хотини Мехринисони унугулмаётганини, уни унутиш мумкин эмаслигини, Усмонқулнинг қизчасини ҳам, отасининг қасоси учун эмас, йўқ, шу аёлнинг васли-висолига етмаганилиги учун, дуркун-дуркун қизлар олмадек қўйнига келиб киришни хоҳлаб турган бир пайтда шу жувон бўй бермаганига, ҳатто уни ҳосилот Каримқулни оёқости қилгани учун ўлдирганини, ҳаммасидан ҳам ёмони, юракнинг бу ташналигини қондириш учун лозим бўлса яна одам ўлдиришдан қайтмаслигини, таҳқирланган кўнгил шуни тилаётганини тан оларди.

Усмонқулнинг отаси ўлгач, роса бир ойдан кейин буғдойзорга ўроқ тушди.

Ўша кун дунёдаги энг қисқа ва энг унумли кун бўлди.

Ҳали қуёш Ҳисор тоғлари устида бўй бермай, ҳали тонг шудрингларига чўмилиб, намиқиб ётган буғдойзорга қуёш тиф урмай, Одамбормас даштни ўроқчи қиз-жувонларнинг қий-чуви тутиб кетди. Одамбормас – Элсарой қишлоғиинг кун чиқарида ястаниб етган бепоён дашт.

Қишлоқдан чиқиш билан бошланадиган бу яйдоқ ернинг бир учи уфқлар бағрида қишин-ёзин оптоқ қорга бурканиб, қўр тўкиб турган залворли Ҳисор тизмаларининг этаклари билан, бир чети эса Фузор кенгликлари билан туташиб кетган.

Усмонқул қоровуллик қиладиган Айронтепта лалмиси Одамбормаснинг Фузор ерлари билан ёндош энг чекка бўлаги

бўлганидан, бу майдонга ўроқчилар етиб келганида қүёш тоғ устида юз очар эди. Узоқлиги важданми бу даштга жўнатилган ўроқчиларнинг аксари эркаклар: парти кетиб, шарти қолган чоллар, ерга урса кўкка саптчидиган ёш-яланг ўсмир болалар.

Аёллар ҳам йўқ эмасди. Лекин улар, чамаси, ўроқчилигига қараб эмас, кечқурун қишлоққа қайтишда оёқ уловларининг яровлилига қараб жўнатилганди.

Ўша куни Усмонқул ўзини бир ойдан бери қийнаб ётган барча изтироб, барча андухларни бир чеккага йифишириб, ўрим ташвишига боши билан шўнгиди.

Ўша куни Усмонқул яримжонлигини ҳам унтиб, ўзини ўтга-чўққа уриб ишлади.

Бундан бирор икки кун олдин, Бозоркалнинг тайинлови билан ўриб келган луҳларни эшиб, бовлиқ тўқиди. Сўлиб тобига келиб қолган луҳлар Усмонқулнинг этчили қўлларида бир зумда узунлиги бир қулоч келадиган, соч ўримилик силлиқ ва пишиқ бовлиқларга айланарди. Бозоркал Усмонқулнинг бовлиқларини қуватини синамоқчидек қўллари билан тортиб-тортиб кўрди. Зинг қилиб эшилган бовлиқларнинг шунчалар мустаҳкамлигига ҳайрон қолди чоғи, у бовлиқнинг бир учини оёғи билан босиб, икки қўллаб юқорига тортди, бовлиқ узилмади. Унинг бу ишларини қузатиб турган Усмонқулга қараб тиржайди ва бошини сарак-сарак қилиб:

– Бало экансан, Усмонқул мироҳур! – деди.

Бозоркалнинг бу мақтавидан Усмонқул ийиб кетди, гуллола иссиғида куйиб, бирор ҳафталардан бери тириклик ташвиши билан бўлиб, устара тегмаган тикондек тик босган ҳорғин чехрасига табассум ёйилди.

Усмонқул Бозоркал эргаштириб келган болаларга ҳам бовлиқ эшишни, эринмасдан миридан сиригача обдон тушунтирди. Ҳозиргина қўли келмаётган болалар, астасекин бу ишнинг ҳадисини ола бошлади. Кейинроқ этчили ҳаракатлар билан, Усмонқул билан бароварига бовлиқ эшавердилар.

Усмонқул тайёр бўлган бовлиқларни бир болани ёнига олиб, иккаласи бир қучоқдан кўтариб, ўроқчилар томон юрди.

Қўёш терак бўйи кўтарилиган, унинг ҳарорати баданга нинадек санчила бошлаган эди. Кўп ўроқчилар иссиқ пана илинжида, бошларини оқ сурп ва гардилар билан танғиб олишган, иссиқ бироз ўтган бўлса керакки, қорайиб ҳамма ўроқчилар чопон ва синсақларини ечиб, кўйлакчан бўлиб олган эди.

“Эрталабки ишда хосият кўп, деб ўйларди Усмонқул анча жойни ўриб кетган ўроқчиларнинг ортидан боқиб, чамаси, ўроқ шу забтидан сусаймаса, бугун Айронтепа яримлайди”.

Бу йил ҳосилнинг чўғи ёмон эмас эди, Усмонқул бир қадам жойдан бир бовлиқни тўлдиради. Утулган бовни тиззалари билан босиб-босиб зинглар, сўнгра бовлиқнинг икки учини бир-бирига шундай абжирлик билан чатар эдики, ҳозиргина ҳурпайиб ётган буғдои поялари, қарабсизки, ихчам ва лўнда, тегиб кетаверса ҳам бўладиган боғга айланарди.

Усмонқулнинг бу ишини ҳам Бозоркал қуруқ қолдирмади: унинг ишбилармонлигига қойил қолганини рўй-рост айтиб, ҳавас билан тамшанди.

– Усмонқул, сенинг бу қўлинг гулки иним! Илойим дард кўрмасин-а! Усмонқул тушга яқин кенг майдонда дўппайиб ётган сон-саноқсиз боғларни Айронтепа ўнгридаги эски хирмонга келиб югурни ташиётган ёш ялангга бош-қош бўлиб, ўзи ҳам улар билан тенгма-тенг ишлади. Тушга бориб хирмонда бошоқлари шовдираб турган буғдои бовлиқларидан ясалган катта ғарам пайдо бўлди.

Ўроқчилар агил-тагил тушлик қилдилар ва яна ҳамма ўзини бараварига ишга урди.

Усмонқул улкан доира шаклидаги хирмон ўртасида туриб, хўп ҳайдайтган ёш-ялангларни бошиқтира бошлади. Аввалига улар, буғдои ғарамини бузиб, улкан доира

шаклидаги боғларни ёзиб ташлашди. Сўнгра бу боғлар устига тўртта от келтириб, уларни ёнма-ён қўйишиди ва бир-бирига тиркаб боғлашди. Ёнма-ён тиркалган тўрт от шу улкан доира бўйлаб бир маромда айланада бошлади. От туёклари остида инчалаётган буғдой боғлари борган сари нимталаниб, ер билан битта бўлаётир. Доиранинг сиртқи энг чекка томонидаги отга миниб олган ўн-ўн бир ёшлардаги занжидай, узун бўйли, ориқина болакай, чух-чухлаб отни ниқайди ва ёшига мос бўлмаган, дўриллаган овоз билан қўшиқ айтиб, унумлироқ ишлашга чорлайди.

Қора-қора қулогинг қалқон бўлсин жонивор,
Сенинг босган изларинг талқон бўлсин жонивор.
Майда жоним, майда ҳу, майдада-я, майдада.
Анови товнинг боврида кийик ётар,
Тўрт оёгин боврига жийиб ётар.
Чор деворнинг орасинда сўлгин-сўлгин,
Оҳ, нетайин қора қўзим қуйиб ётар.
Майдада жоним, ҳу, майдада-я, майдада.
Тенг-тенг босган, тенг босган, ҳу майдада,
Тўрт оёгин тенг босган ҳу майдада-я майдада.
Мехнатининг зўридан о майдада-я,
Орқа-бошин чанг босган майдада,
Майдада жоним, ҳу майдада-я майдада.
Кибладан турган довул,
Қииналиб қўнади овул.
Майдажон деб қичқирсанам,
Эшиштмайди кар қулоқ,
Майдажон ҳув, майдада.
Қарчигай қора булат,
Қаноти аъло бўлур.
Ёшлиқда берган қўнгил.
Айрилмас бало бўлур,
Майдажоним, ҳу майдада.

Шу улкан доира ўртасидаги бир парча ялангликда турганча Усмонқул қўлидаги паншаха билан отлар айланган сари кенграйиб бораётган, шу бир парча ялангликни кенгайтиради, паншаханинг учи билан нимталаниб оёғи сотига тушган буғдой пояларини отларнинг оёғи остига ирғитади.

Шу куни оқшом жуда эрта тушди. Лекин одамлар бугун умримнинг биринчи куни бўлишига

қарамасдан анча ишни қилиб қўйишиганди.

Ўроқчилар жўнагач, ҳозиргина гувиллаб турган айронтепа этакларига оқшомги сокин сукунат чўқди. Бу ерлар Айронтепа аталгани билан, аслида, Одамбормас даштнинг бошқа жойларига қараганда хиёл баланд бир қисми. Бу кенгликнинг дўнгсаллиги узоқлардан қараган одамга билинмаса, Айронтепанинг устида юрган одамга билинмайди.

Ҳали хирмонга чиқарилмаган ҳисобсиз боғларни кўздан кечириб, айланиб юрган Усмонқулнинг юраги қувончдан ҳапқириб кетди, кечагина белга уриб, сал ҳепкинга ҳам дengizdek мавж уриб, шовиллаб ётган Айронтепа буғдойзорнинг ўрнида, кенг яйдоқ яланглик очилиб қолган эди.

Бирдан оқшомга қоронгулик чекина бошлади, узоқларда уфқ бағрида қорайиб ётган тоғлар ортидан қизариб, бўзариб ой кўтарилади.

Кўп ўтмай, гўнг ва залворли тоғлардан қаддини даст кўтариб, тиниқлашиб ёрқинлашган тўлин ой бутун Одамбормас даштни ўн етти яшар дуркун қизнинг ҳароратли қўллариdek ёқимли, субҳидам соғилган сутдек илиқ ва ойдин нурига кўмиб юборди.

Кун бўйи тиниб-тинчимаган Усмонқул ҳозиргина юрагида чидаб бўлмас зерикиш түяётган эди, ўроқчилар кетиб, қоронгулик оғушида ҳувиллаб ётган дашт файзсиз ва фариди эди.

Лекин тоғ ортидан ой кўтарилиши баробар, унинг қўнглига ҳам ойдин бир туйғу оқиб кирди. Усмонқулга ҳам таъсир қилди; толиккан жисмидан ҳузурбахш бир ҳовур кўтарилиди.

Усмонқул хирмонга етиб келганида, ой тоғ бошидан найза бўйи

күтарилигандын, борлық сутта чайилгандек ойдин эди. У хирмоннинг бир чеккасида ой нурида жовдираб, товланиб ётган буғдой ўримидан бир ҳовуч олиб, күлларини олдинга чўзиб, кафтидаги буғдойни ой нурига солиб қаради. Усмонқулнинг назаридаги тўқ ва бўлиқ буғдой донлари ой ёғдусида акс бериб, жимиirlаб кетгандек бўлди.

Усмонқул кафтидаги бир ҳовуч буғдойни бурнига яқинлаштириб ҳидлади, димогига чангнинг ўткир тахир ҳиди аралаш, тотли нон таъми урилди. У кўзларини юмиб, ширин бу бўйни узоқроқ туюб туриш илинжидаги кафтидаги сиқим буғдойни қайта-қайта ҳидлади. У тотли нон таъмли бўйни тяр экан, дийдаси бўшашиб, бўғзига оғир бир хўрсиниқ келиб тиқилди, негадир шу топда у ўкириб-ўкириб йифлагиси келарди...

Тун яримга яқинлашди ҳамки, оёғим бориб бошим қайтади, деган Бозоркалдан дарак бўлмади. Усмонқул кўзи тўрт бўлиб, йўл пойларди. Лекин ҳамон Бозоркалдан ном-нишон йўқ. Усмонқул ҳаммасидан ҳам хотинига алағда бўларди, бечора кундан буён оёқ устидан касал. Урушдан қайтгандан бери боши ғам-ғуссадан чиқмаётган, янайм ўзи яримжон Усмонқулга ичи ачиб касалини билдирамай юрибди. Лекин буни Усмонқул билмаса экан? У ҳаммасини билади. Фақат қўлидан ҳеч нарса келмайди, осмон узок, ер қаттиқ, қани эди Усмонқулнинг қўлидан келса, хотинини ҳеч нарсага зориқтирумасди. Лекин ҳозир зориқтирумаслик тугул, урушдан қайтганидан бери, бечора билан тузукроқ гурунг қилишга вақт тополгани йўқ. Қаерданам шу Айронтепага қоровул бўлди-ю, кечаси ҳам, кундузи ҳам шу ерда. Бундай олиб қараганда, бу ҳам замон талаби. Уруш бораяпти, урушга эса буғдой ҳаводек зарур. Усмонқул озми-кўпми урушда қатнашди. Лекин ўша лаънати, “тигр”нинг остига қандай тушиб қолди, контузия бўлди. Кейин яроқсиз деб топилди, майли урушда-ку охиригача туриш бермаяпти, лекин уруш ортида меҳнатдан кечишга ҳеч ҳаққи йўқ ахир. Хотин

билан ширин-ширин сұхбат қуриш бўлса қочмас. Кўнгилхушлик фалабадан кейин ярашади. Усмонқул шу хаёллар билан бўлиб, кўзи илинганини сезмай қолди.

Нагоҳон от кишинишидан у чўчиб уйғонди. Хирмон пойидаги Оқбурун қишлоқ тарафга тикилиб, қулоқларини тиқирайтириб олган эди. От Айронтепага яқинлашашётган Бозоркалнинг шарпасини сезган эди...

Усмонқул хирмон бошига Бозоркални ташлаб, уйига етиб келганида вақт алламаҳал бўлғанди. Унинг кенг саҳнли ҳовлисида гўристон сукти кезар эди. Лой сувоқ томли қатор уйларнинг энг охиргисининг деразасида чироқ милтилларди. У йиллари бир ҳовлида уй бир хонаю, бир айвондан, қолаверса, икки хонадан иборат, қатор уйлар йўқ эди, деярли деразасиз эди. Бу Усмонқул билан хотини ётиб турадиган уй деразаси эди.

Айни шу кунларда чироқ ёғи анқофнинг уруғи баробар бўлса-да, кечанинг кўп қисмини далама-дала кезиб, қоровулликда ўтказадиган Усмонқул, доим уйда, айниқса, отаси ўлгандан бери ёлғиз қоладиган хотини учун ўзини ўтга-чўққа уриб бўлса-да, чироқ ёғи топарди.

Яқиндагина ўлик чиққан, қоронғу кечаларда гўристон сукти кезадиган, кимсасиз, овлоқ бу ҳовлида Усмонқулнинг хотинининг ёлғиз ҳамроҳи ана шу-дераза токчасида ожиз милтиллаётган чироқ эди.

Усмонқулнинг келганини хотинини сезган экан: уй эшигини очган Усмонқулнинг кўзи, ҳозиргина чўчиб уйғонган хотинининг караҳт ва ғамгин кўзлари билан тўқнашди.

Дераза тагига ташланган олақуроқ жундор пўстакка чўккалаган Усмонқул хотинига бокди ва майин овозда ахвол сўради:

– Қандай, яхшимисан?... Нега... рангинг бир ахволда?

Кундан-кунга ранги синиқиб, оёқ устидаги тамом бўлиб бораётган хотини Усмонқулнинг юзидан дардли нигоҳини олиб, бошини ҳам қилди ва синиқ бир овозда пичирлади:

– Аҳволим оғир Сарвининг отаси...
Билмайман, кундан кун ер билан битта бўлиб бораятман.

Бугундан бошлаб оёғим шишиди.
Мехринисо нимадир айтмоқчи бўлиб, бошини кўтариб эрига қаради. Лекин ўзига термулиб турган Усмонқулнинг чўяндек қорайиб кетган ҳорғин, чанг ёғиб турган ранг-рўйига боқиб, тил тишлади, яримжон эрига қайишди, дард устига дардисар бўлгиси келмади.

Усмонқул хотинининг руҳиятини тушунди, бечоранинг ҳамма дарди юрагида, барибир тилга чиқарганидан не наф, йўқни йўндириш қўлидан келмаса! Шундай бўлса-да, Усмонқул хотинининг кўнглини кўтармоқчи бўлди.

– Сабр қил, хотин, кўпти ўтиб, ози қолди, эшитгандирсан уруш ҳам охирлаб қолди. Насиб бўлса, уруш тугасин, ҳаммаси яхши бўлади.

– Шу яхши кунларга етармиканман?!
– Эй, бас-э, танглайнингга тош, нафасингни иссиқ қил! Етмай сенга нима қилибди?

Энди жон бор жойда дард бор.
Умидсизланма бунақа! – Усмонқул хотинининг пиқ-пиқ йифисини кўриб, ўзи кутмагандек бақириб юборди. Сочи узуннинг ақли калта келади дегани ростда! Бу оламда сендан бошқа касал одам йўқми?! Бош ёстиқ-қа тегдими ўлим, ўлим, ўлим! Бошқа гап йўқ!
Ўлим осон нарса, бу дунёда ундан осони йўқ!

Лекин яшаш... яшагандаям тирикликининг оғир-енгилини, аччиқ-чучугини татиб, суюб-суюниб, ҳамдам бўлиб яшаш керак.

Йифиштир йифини!... Бирор-бир ютиминг борми?!

– Атала бор эди, – деди Мехринисо йифидан тўхтаб, қизарган кўзларини рўмолининг ўчи билан артганича.

Усмонқул аталани ҳўрп-ҳўрп ичаркан, кўз остидан тиззаларини қуҷоқлаганича, муштдиккина бўлиб ўтирган Мехринисога қараб, юраги ачишди, шўрликни бекорга хафа қилди, дард ўтгандирки, муштдеккина бўлиб қолибди, қандай дуркун жувон эди, янайм дардини сенга айтмай кимга айтсин, бир

карра хайвонлик қилдинг-а, Усмонқул! Ўнинг иштаҳаси гиппа бўғилди. Лекин эрта тушга қадар, ту ўроқчилар билан овқатлангунчин оч юришини ўйлаб, мажбурлаб бўлса-да аталани тугатди.

– Кўй, хафа бўлма хотин, эртага ҳосилотдан буғдой сўрайман. Бир оқ буғдойнинг нонига тўйсанг, бир нав дармонга киарсан, – деб Усмонқул хотинини кутмай, нонсиз дастурхонни ўзи йифиштиришга тутинди.

Ўроқлик дастурхонни дераза токчасига, ожиз шуъла таратиб турган чироқ ёнига, ўрнидан турмай узалганча қўяр экан, яна бояги гапни такрорлади.

– Албатта, сўрайман! Лозим бўлса, раиснинг олдига ҳам кираман!

Эрининг дардчил бу гаплари
Мехринисонинг ҳозиргина юрагидаги
йифилиб турган аламли андуҳни тарқатиб
юборди. Усмонқулнинг бу эмраниши хотинига
таъсир қилди, бошқоронги хотинларга хос
кўнгил бўшлиқ билан ийиб кетди.

– Сарвининг отаси! – хотинининг
эркаловчи бу майин овозини эшитиб,
Усмонқул ажабланиб хотинига боқди, чакка
соchlари тўзғиб чиқсан, ғамгин кўзлари ичига
ботиб кетган Мехринисонинг рангтар юзига
сўниқ бир табассум ёйилганди. Ўнинг юпқа,
куришқоқ лаблари хиёл таранг тортилиб,
сирли, сеҳрли ва ишвакор нигоҳи беҳад гўзал
эди. – Сарвининг отаси! – деди у яна ўша
эркаловчи овозда. – Кўнглим, ширинлик
тилаяпти, бир ҳафтадан бери асал егим келади.

Пул йўқ деб қўрқманг. Пул ҳам топиб
қўйганман. Онамдан қолган ёдгорлик саккиз
олчинлик жулқурсим бор. Шуни сотамиз.

Усмонқул ҳаммасига тушунди-ю,
қувончдан қичқириб юбораётди. Лекин
энтиkkанича, хириллаб шундай деди:

– Мехри, чинми шу гапинг!.. Чин бўлса...
чин бўлса жонимнинг эвазига бўлса ҳам сен
учун асал топаман. Майли, жулқурс бўлса,
жулқурс-да!

Усмонқул уйдан чиқиб, Айронтепа томон
йўл олганида ой мағриб сари йўл олганди,

демак, тун яримдан оқжан. У қирчани
Оқбурунда тўлин ой ёғдусига чўмилиб ётган
Одамбормас даштнинг ўртасидан кечиб,
Айронтепа сари кетиб бораарди. Отнинг бир
маромида йўртиб боришига ҳамоҳанг у чукур
уйга толганди.

У ўй сураркан, даъфатан, аниги, отаси
ўлгандан бери биринчи марта қўксидаги
оғриқни унутганди. Тўлишган, тиниклашган
тўлин ой бутун Одамбормас даштини, бу
дашт не, бутун борлиқни ўн етти ёшли
дуркун қизнинг ҳароратли қўлларидек
майин ва ёқимли, субҳидам соғилган сутдек
илиқ ва ойдин ёғдуларига кўмиб юборган,
табиатнинг фусункор ва эртакдек сеҳрли
бу палласида ҳамма гўзал эди. Ҳатто, ху
ойдин тун ичра уфқ бағрида қорайиб ётган
тоғлар ҳам ўзининг маҳобатли залвори билан
яқинлашгандек эди, гўё қўл чўзсанг етгудай.

Ёлғиз оёқ йўлнинг икки ёқасида ой нурини
эмисб, оҳиста шовиллаётган буғдойзор эса қут-
барака қўшигини куйлар эди. Саҳар кеча ичра
чўккан теран бу жимликни идрок қиларкан,
Усмонқулнинг хаёли жуда узоқ-узоқларда
қолган уруш даҳшатларига кўчди. “Наҳотки,
шу дамда дунёнинг қай бир бурчагида қирғин-
барот уруш бўлаётган бўлса?! Наҳотки, мана
шундай ой нурига чулғанган далаларда инсон
қони тўклилаётган бўлса дея? ўйларди Усмонқул
атрофга суқланиб боқиб. Лекин начора уруш
бўлаётгани, бундай йироқ ўлқаларнинг
бошоқли далаларида қон тўклилаётгани
мудҳиш ҳақиқат эди. Бу аччиқ ҳақиқатни тан
олишдан бўлак йўл иўқ бўлса-да, Усмонқул
ўзини чалғитиш илинжида эгардан чўзилиб,
бошоқлари секин-секин тебранаётган
буғдойзора бўйини чўзиб синчиклаб
тиклиди, лекин унинг кўзлари ўн қадам
наридаги нарсани аниқ-тиниқ илғамасди,
кулоқлари ернинг, авлод-ажходи суюк суриб
ўтган ернинг хўрсинишини аниқ эшилди.

Тўлин ой ёғдусида элиб ётган
Одамбормас даштнинг тикка кесиб,
Айронтепа сари кетиб бораётган
Усмонқулнинг рухи тетиклашиб, тиниклашиб

борарди. У отаси ўлгандан бери юрагига
чўккан ва ёвсиз оғриқ берадиган бир дардни
бўғинишга алаҳсиб унугтандек бўлувди.
Ҳозир эса, негадир шу топда бу зил-замбил
юқдан бутунлай фориф бўлгандек бўлди.

Нима учун бу далаларда Одамбормас
ортидами, ёки?

– Йўқ, бу далаларда қон тўкилмаслиги
керак, – деб ўйларди Усмонқул от устида
чўнқайиб борар экан. – Бу тутпроқни қон
билан бўяш-ёвузлик!

Урушнинг ўзи мудҳиш ёвузлик.
Ҳаммасига шу лаънати уруш айбдор. Бир
ўлған менинг қизим билан отам. Бир жабр
чеккан менманми? Шу урушдан озор
чекмаган одам бормикан, бу ўлатда?

Уруш – эл бошига тушган азоб-уқубат,
синов.

Эҳтимол, отам адашгандир. Каримбек
ҳосилот ҳам ундаи ёмон одам эмасдир. Одам
одамга ишониш керак. Бозоркал алдамас,
ахир. У рост айтади, ахир. Гумон – имон!
Ҳа, Бозоркал тўғри айтади. Усмонқулнинг
давлати ҳам, фарзанди ҳам ҳали олдинда.
Мехри бошқоронғи, унга қўчқордай ўғил
туғиб беради. Ўшанда ҳамма андуҳларни
унутади. Ҳаммасини ҳозирдан унудиши
керак. Унутмаслик, гумон имонда яшаш
ношукурлик!

Оқбуруннинг қадамига мос шу тариқа
ўйлаб борар экан, Усмонқул ўзини бир ойдан
бери қийнаб юрган азобни унудти, у қасосдан
кечди.

Айронтепа этагига етиб келган Усмонқул
энг аввал хирмонда кимларнингдир
ҳансирашаётганини, сирли шивир-шивир
келаётганини эшилди. Кўнглига ғулғула
тушган Усмонқул Оқбурунни қичаброқ
ҳайдади...

Хирмондаги буғдой ўқмидан ўн қадам
берида, хирмон чеккасида турган арава
олдида пайдо бўлган отлиқни кўриб, кўли-
кўлига тегмай буғдой халталаётган иккала
йигит ҳам тош қотишиди. Улар жуда секин,
эшилтилмас даражада ҳансирашарди. Икки от

кўшилган аравага ўн халталар чамаси буғдой юкланган эди. Отлар тун ярмидан ошганига қарамасдан қон суриш билан овора пашша ва суналарни думлари билан қувиб, олдинги оёқларини ўқтин-ўқтин ерга уриб депсинарди.

Усмонқул от арава олдида тўхтади ва биринчи бўлиб овоз берди:

– Ов, йигитлар, хўш, бу нима қилиқ?! – деди бақирмасдан, лекин таҳдид билан.

Ўгриларнинг новчароги энг аввал ўзиға келди ва қўлларини бир-бирига уриб, кафтини қоққанича, Усмонқул томон юриб, гап қотди:

– Энди, қоровул ака, биз ҳам бегона эмасмиз, қариндошмиз!

Йигитнинг бу дадил ва эркин гаплари Усмонқулни ҳайрон қолдирди, нима бало ҳаракатидан уни танийдигандек, ким бўлди экан бу қариндош?

– Келинг, аввал қўришайлик! – Усмонқул ҳали бир фикрга келмай, йигит унинг қаршиисига етиб келган ва бир қўли билан Оқбуруннинг жиловини ушлаганича, бир қўлини кўришмоққа узатиб турарди.

Усмонқул кўришмоққа кўл узатди. Қўли сиқилар экан, Усмонқул йигитнинг ниҳоятда бақувват ва чайир эканлигини сезди. Лекин йигитнинг қўлини қўйиб юбормай, энгашиб қўзлари ич-ичига ботган қайроқдек иягини қуюқ тук босган, ўттиз ёшлардаги қора тус бу йигитнинг тиржайган афтига синчилаб қаради. Танимади.

– Хўш, қариндош, бу нима қилиқ?! – деди Усмонқул йигитдан қўлини тортиб олар экан, яна бояга гапини тақрорлаб.

– Энди, ака ўзингиздан қолар гап йўқ. Биласиз, ҳозир ингичка узилган, йўғон чўзилган палла. Ишонсангиз ейман, ичаман деган ўн оғиз менга кўз тикиб ўтирибди, – деди йигит ялинчоқ овозда.

– Ахир, сиз ўйлайсизми, элоғаси! Ахир, бу кўпнинг, элнинг ҳақи! Яна гапирмоққа чоғланган йигитнинг гапини чўрт кесди Усмонқул ва қаҳр билан бўйруқ қилди. – Қани, мана бу аравадагиларнинг ҳаммасини хирмонга тўкинг тезроқ, қани бўлинг?...

Бу далабеги қаёқقا кетди экан?!

Сиз эса, ўтирманг иним, тезроқ халталарни бўшатинг! Бўлмаса ҳозир, ҳув қўшни қоровулларга овоз бераман. Кейин кайфингиз қочади!

Лекин йигит Усмонқулнинг отининг жиловидан туттанча ялина бошлади:

– Жон, ака, келинг, тил топишайлик! Сизниям қуруқ қўймаймиз! Истасангиз, тенг яrim, дангал йигитман!

Бу гапни эшитиб, Усмонқулнинг жони халқумига келди. Ахир, шу фалла пишиб туриб, отаси очдан ўлди-ку, ахир, шу фалла пишиб туриб, хотини, оғироёқ хотини уйда очлиқдан адои тамом бўляяпти-ку, ахир, шу фалла пишиб туриб унинг ўзи бутун кун тун бўйи очлиқдан лаби газарид юрибди-ку, нима деяпти бу фаламис, ахир, бу Усмонқулнинг эмас, кўпнинг ҳақи-ку!

Усмонқул шиддат билан отдан тушиб, халта юклоглиқ арава томон юрди.

Худди шу пайт буғдой уюми олдида, халтани ушлаганича, ҳамон тош қотиб турган нариги йигит ёнида, отлиқ пайдо бўлди. Бу ҳосилот Каримбек эди. У Бузтурғайнинг эгарида қодирағанича, жаҳл билан арава томон юрган Усмонқулни тўхтатди.

– Ув, Усмонқул мироҳўр, тўхтанг!

Усмонқул овоз эгасини таниди:
Каримбек!

Таниди-ю, тўхтаб орқасига ўгирилди.
Кеча қанчалик ойдин бўлмасин, у
Каримбекнинг юз-кўзини кўрмади. Фақат отлиқ шарпасини англади.

– Мироҳўр, гап бундай. Бу йигитлар бизнинг ғузорлик жиянлар бўлади. Иккаласи ҳам гапи қайтмаган ўқтам йигитлар. Ишонаберинг қуруқ қўйишмайди, – деди Каримбек ўзига термулиб қолган Усмонқулга қамчи дастаси билан тек қотган йигитларни кўрсатиб.

– Нималар деяпсиз Элбоши! –
Усмонқулнинг овози титраб чиқди. Лекин кутилмаганда унинг хаёлига чироқ шуъласида ранги узилиб бораётган

касалманд хотинининг “Эртага бозорда жулқурсни олиб чиқинг, зора бироз пул бўлар”, деб ёлворгани тушди. Лекин шу заҳоти у хаёлини йигиб олдию, баттар миясига қонурди ва бақириб юборди.

– Нималар деяпсиз, ахир... ахир бу кўтнинг ҳаққи-ку?

Каримбек беттисанд кулди ва тишининг орасидан заҳархандалик билан жавоб қилди.

– Нима, кўтнинг ҳақи тутиб оладими?!

Ув, мироҳур кўтни қўйинг, кўтнинг ташвиши бизнинг бошимизда! Сиз ўзингизни ўйланг, ўзингизни!

– Мен билан сизнинг ишингиз бўлмасин Каримбек ҳосилот. Кўп нима бўлса, мен ҳам шуман. Лекин шу мундай эл бошида туриб, эл кўзига чўп суқманг! Ҳа, чўп суқманг! – деб бақириб юборди Усмонқул. Унинг ғазаби қайнаб, кўзлари қонга тўлган эди. У шиддат билан орқага ўгирилиб, арава устидаги халталардан бирига қўл узатди.

Лекин ҳали ушлаган халтасини силкиб, қучоққа олишга улгурмай, елкасини урими майда қамчи чилвири куйдириб ўтди, даҳшатли оғриқдан кўз косалари катталашиб, дардли оҳ тортиб юборди ва қучогидаги халта оёғи остига сирғалиб тушди. Усмонқул ҳали ўзини ўнгламай туриб, устига Бўзтургай билан бостириб келган Каримбек оғриқ азобидан қунишиб қолган Усмонқулнинг тирсагидан чаптонини чанглаб чап тақимига босди ва отини зарб билан нуқаб, Усмонқулни улоқ қилиб чотиб кетди. Чопоннинг енги елкасидан узилиб, Усмонқулнинг тирсаги Каримбекнинг қўлидан сирғалиб чиқиб кетмаганида, Усмонқул от тўёқлари остида қолиши аниқ эди.

Каримбекнинг қўлидан ситилиб тушган Усмонқул, хирмоннинг тўрида тупроқ билан битта бўлиб ётар экан, Каримбек жиянларига буюорди.

– Бўлар иш бўлди. Тезроқ аравани тўлатиб юкланглар-у, ошиб қолинглар! Айтганимни ўша кунга тайин келтиринглар!

Боши гир айланишига қарамасдан, минг бир азобда аранг оёққа турган Усмонқулнинг биринчи ва ҳаётидаги энг сўнгги гапи шу бўлди:

– Йўқ! Кўтнинг ҳаққини ўғирлашларингга йўл қўймайман! Йўл, қўймайман!

Усмонқулнинг бу ҳирқироқ овозини эшишиб, Каримбек шундай ёнидаги буғдой ғарамидаги паншахани суғириб олди, арава томон тебранганича қадам ташлаб келаётган Усмонқул сари, Каримбек қони қайнаб, дарғазаб ҳолда от қўйди.

У қўлидаги паншахани Усмонқулнинг кўксига санчмоқчи эди. Каримбекнинг бу мудҳиш мақсадини англаган Усмонқул жон ҳолатда ўзини четга олди. Каримбек паншахани санчимади-ю, лекин оёғи билан тептиб, Усмонқулни йиқитиб ўтди.

Юзубан йиқилган Усмонқул, ўзини аранг ўнграганида, бошида от ўйнатганича, разабдан кўзларидан ўт сочаётган Каримбекни кўрди.

Каримбек нималардир деб, телбаларча бақириб, қўлларини икки томонга ёйиб, увада чотони ва кўйлаклари парча-парча йиртилиб, кўкси очилиб қолган Усмонқулнинг нақ кўксига паншахани санчди.

Усмонқулнинг бу оламда сўнгги кўрган ой нурида ожиз ялтираб кетган паншаханинг ўтқир уни-ю, эшигани бифиллаб йиглаётган чақалоқ овози бўлди. Лекин зум ўтмай чақалоқ йигисини, жон аччиғида ўқириб юборган инсон овози босиб кетди.

Тирқираб оқаётган қон ҳидини сезиб, хирмондаги тўрттала от ҳам бараварига чинқириб, кишнаб юборди.



ERKIN A'ZAMNING IJOD TUTUMI



**Nurboy
JABBOROV,**
filologiya fanlari
doktori,
professor

A'dabiyotni, ta'bir joiz bo'lsa, odil sudlovga qiyoslash mumkin. Tabiiyki, odil sudlov deganda adolatni faqat shior qilib olgan-u boshqa bir idoranning yoki qo'li uzun mans-abdorning yetovida hukm qiladigan emas. Haq va haqiqatni ustun biladigan, chinakam adolatga tayanadigan tizim nazarda tutilyapti. Binobarin, odil sudlov jinoyat va qabohat ustidan qonuniy hukm chiqarsa, adabiyot jaholat va yolg'on ustidan badiiy-falsafiy hukm o'qiydi. Odil sudlov bir yoki bir guruhi jinoyatchilar qilmishini taftish va tahlil qilib, munosib jazo tayinlasa, adabiyot nafs-u havo quliga aylangan alohida kimsalargina emas, hirs-u havas botqog'iga botgan nobop jamiyat ustidan ham badiiy-falsafiy hukm qilish imkoniga ega. Odil sudlov asosan ash-

yoviy dalillar, guvohlar ko'rsatmalari bilan ish ko'rsa, adabiyot insonning botin olamidagi qabohatni, ruhiyatidagi soxtalik va shuuridagi yolg'oni ham haqiqat tarozisiga torta biladi. Zamonamizning mashhur adiblari dan O'zbekiston xalq yozuvchisi Erkin A'zam ijodiyoti: roman va qissalari, hikoya va badiiy publitsistikasi adabiyotning ana shu yuksak mezonlariga har jihatdan muvofiq keladi. Adib asarlari tadqiqi yuzasidan ayrim dissertatsiyalar himoya qilinayotgani-yu tahvililiy maqolalar chop etilayotganini e'tirof etgan holda, ta'kidlash kerakki, adabiyotshunoslik Erkin A'zam ijodi oldida qarzdor. Jumladan, yozuvchi asarlaridagi obrazlar tizimi, qahramonlar ruhiyati, ularning botin olamidagi to'fon-u taloto'plar, tafakkuridagi evrilishu ziddiyatlar, ichki va tashqi dunyosi aro munosabatlari kabi masalalar hanuz tadqiqotchilarini kutayotir. Adibning ijod tutumi (konsespiyasi) adabiyotshunoslikda hanuz munosib bahosini olgan emas. Badiiy

mahorati sirlari, asarlarining til va uslub xususiyatlari, yo'l-yo'lakay bildirilgan ayrim fikr-u qarashlarni istisno qilganda, chuqur tahlil etilmagan. Ushbu maqola "Shoirning to'yi" qissasi misolida adibning ijod tutumini o'rganish yo'lidagi dastlabki urinishdir. Teran tadqiqotlarni talab etadigan ushbu ilmiy muammoni kichik bir maqola doirasida to'laqonli hal etish imkonsiz ekani ayon.

Har qanday tahlil savollar qo'yilishidan boshlanishi ma'lum. Bizda ham shunday savollar ko'p: Erkin A'zam ijod tutumining bosh xususiyati yoki asosiy mezonini belgilash mumkinmi? Mumkin bo'lsa, nimani yoki nimalarni ko'rsatmoq zarur? Bu mezonlar adib asarlarida qanday ijodiy natijalar bergen? Bizningcha, Erkin A'zam ijod tutumining bosh xususiyati – HAQIQATdir. Yozuvchining deyarli barcha asarları mohiyatan ushbu mezonga tayanadi. Lekin buning nozik bir jihatı bor: zamonamizning aksar yozuvchi yoki shoirlari hayot haqiqatini yoritish maqsadini qo'yar ekan, asar voqelikning (jamiyatdagi ezgu va xayrli ishlarning yoxud jaholat va qabohatning, odamzodga xos fazilatlaru oljanob xususiyatlarning yoki nuqsonu illatlarning) shunchaki bayoni: tasdig'i yoki inkorigina bo'lib qoladi. Badiiyat

boy beriladi. Ba'zan taniqli adiblarning asarlarida ham ifoda uslubi shunchalik g'aliz va to'mtoq, tili shu qadar g'arib va nochor bo'ladiki, oxirigacha o'qish uchun tog'dek bardosh talab etiladi. O'rinsiz ishlatilgan, mayishib-qayishib ketgan so'zlarining ingrog'ini eshitib, chiday olmaysiz. Qo'lingizga qalam olib, tahrir qilishga tushib ketasiz.

Lekin bundan nima foyda: kitob allaqachon nashr etilgan, muayyan adadda tarqalib ham bo'lgan. Ijod tutumining asosiy mezoni – hayot haqiqatini badiiy haqiqatga aylantirish ekan, ushbu badiiy-falsafiy, ijodiy-ruhiy jarayon natijasi qanday bo'lishi oxir-oqibatda yozuvchining mahoratiga bog'liq.

Erkin A'zam so'zni chuqur his etadi, fasohat bilan qo'llaydi. Oz so'zga ko'p ma'no yuklay biladi. So'zga



ohorli badiiyat libosini kiydirib, betakror ziynat bera oladi. Uning ijod namunalarida ifoda uslubi shu qadar ravon, tasvir shunchalik jonli, obrazlar shu yanglig' tiniqki, asar qahramonlari bilan birga nafas olasiz, birgalikda yashay boshlaysiz; dard-u sitamni ham, quvonchu shodlikni ham ular bilan baham ko'rasiz. Yozuvchi asarlarida matn shu qadar pishiq-puxta tuziladiki, biror so'zning o'rnimi boshqasi bilan almashtirib bo'lmaydi. Natijada yozuvchi hayot haqiqatini o'quvchiga peshonasini artib, yarqiratib, go'zal badiiy shaklda havola etadi.

Ijodkorning tutumi o'laroq haqiqat badiiy asarni nurlantirib turadi, so'zning ta'sir kuchini oshiradi. O'quvchi qalbu shuuriga yorug'lik bag'ishlaydi. Uni qalban va ruhan asar syujetining ichiga olib kiradi. Qahramonlar ruhiyatini teranroq his etishi uchun imkon yaratadi. Hazrat Alisher Navoiyning mana bu so'zлari badiiy ijodda haq so'zning nechog'lik zarurat ekani haqidadir:

*Nukta suv yanglig' eritur toshni,
Topsa haqiqat o'tidin choshni.
Bo'lsa haqiqat guharidin yiroq,
Rishta so'zin so'zlamagan yaxshiroq.*

Erkin A'zam asarlari, hazrat Navoiti ta'biri bilan aytganda, aynan haqiqat o'tidan choshni – bahra olgani bilan alohida ajralib turadi. Yozuvchi sifatida bu oliy tuyg'uning oldida uning tili qisiq emas. Adib qalamiga mansub "Shoirning to'yi" qissasi buning yorqin isbotidir. Nobop jamiyat, odamzodni tubanga qulatuvchi hirsu havas, nafs-u havo, zulmu sitam singari illatlar ustidan badiiy-falsafiy hukm chiqarilgani, ayniqsa, bu asarning qimmatini oshirgan. Qissa unda tasvirlangan qahramonlar ruhiyatining teran tahlili, har bir badiiy detal, obraz va tasvirning kuchli hayotiy va badiiy mantiq asosida dalillangani, ifoda uslubining o'ziga xosligi va mukammalligi bilan nafaqat o'zbek badiiy nasrida, hatto jahon poetik tafakkurida o'ziga xos o'ringa ega deyilsa, mubolag'a bo'lmas.

Ijodkor tutumini ifodalashda badiiy tilning o'rni alohida. Haqiqat vaadolat oldida yuzi qora Oqsoqol shoir obrazi o'zi so'zlagan nutq va zaldan tashlangan luqmalar orqali ishonarli tasvirlangani Erkin A'zamning badiiy til imkoniyatlardan nechog'liq mahorat bilan foydalana bilishi isbotidir. Jumladan, "Otashqalb o'zidan zo'r shoirligi uchun Oqsoqol uni hasaddan qamatib yuborgan, degan gap yuradi, aytin-chi, shu to'g'rimi?" – degan luqmaga bildirilgan munosabatda bu obrazning chirkin qiyofasi yanada yaqqol namoyon bo'ladi. Yozuvchi ortiqcha tafsilotga berilmaydi. Ko'psizlikdan saqlanadi. Oqsoqol shoirning tarix oldidagi xiyonatini oz so'z vositasida o'quvchi ko'z

o'ngida badiiy suvratlantiradi: "Oqsoqol batamom dovdirab qoldi. U hammasini kutgan, lekin bu qadar shafqatsiz hujumga tayyor emas edi. Qo'lida titrayotgan ko'zoynakni minbar peshtaxtasiga qo'yib, ovoz kelgan tarafga tikildi". Oqsoqolning tuban qiyofasini mushohada etmoq uchun ana shu tasvirning o'zi kifoya qilgan.

Portret va xarakter – ijodkor tutumini namoyon etuvchi muhim badiiy unsurlardir. "Shoirning to'yi" qissasidagi Mafkuraxonim portreti va xarakteri bunga dalil bo'la oladi. Uning portreti "o'zi xushbichim, oqbadan, lekin yupqa lablari har qanaqa odamni chimdishga shaygina ayol" tarzida chizilgan. Ona tilida hatto bir betlik matnni ham ming azobda qiymalib o'qiydigan Mafkuraxonimning xarakteri ham portretiga mos: "Qirq besh yoshlar chamasidagi bu xotin so'zga nihoyatda chechan, birpasda dunyoni ag'dar-to'ntar

qilgudek faol tashkilotchi, oqni qora, qorani oq deb isbotlamoqqa ayniqsa mohir edi. U tagi oqsuyak xo'jalar avlodidan bo'lib, markscha-leninchta ta'limotga azbaroyi mehri zo'rligidan nasl-nasabini inkor etgan...". Yozuvchi uning mansab pillapoyalaridan ko'tarilishida ana shu sifatlar tirgovuch bo'lganiga ishora qiladi. Maishiy buzuq Mafkuraxonimning o'zi boshqarayotgan soha rahbari bilmasligi mumkin bo'lмаган haqiqatlardan ham bexabarligi tasvirlangan lavhalarda yozuvchining asar voqealari uchun asos bo'lgan davr siyosatiga achchiq istehzosi aks etgan. Adabiyot tarixida yorqin iz qoldirgan, betakror iste'dodi va vatanparvarligi evaziga Oqsoqolga o'xshaganlarning chaquvi bois "Xalq dashmani"ga aylanib, surgun qilinib, juvonmarg ketgan Otashqalb shoir yubileyiga "... shuncha odamni sarg'ayti-ra-sarg'aytira tashrif buyurgan bu xonim... dam olish xonasida uzunchoq billurdan tamanno etib suv ho'plarkanlar, "Qani, domlaning o'zi keldilarmi?" degan so'zi bilan saviyasi naqadar past ekanini ko'rsatib qo'yadi. Qissadagi har bir so'z, har bir badiiy detal shu taxlit yozuvchining ijod tutumini suvratlantirishga xizmat qilgan.

Oqsoqol shoir xarakteri tasviri ham yozuvchining

katta badiiy-falsafiy xulosalar qilishiga asos beradi. U aslida Alvasti, “ochiq yotgan qozon” ekani keyinchalik ayon bo’lgan Moviyko’zni deb do’stiga xiyonat qiladi. Yozuvchining talqiniga ko’ra, Oqsoqol: “... shu yo’l bilan undan (Otashqalbdan – N.J.) o’ch olmoq bo’ldi, ham she’riyat musobaqasidagi ojizligini g’ayirlik bilan niqoblamoqchi bo’ldi. Shu tariqa xiyonat ko’chasiga kirildi, hayot-mamot xiyonati. Bu ko’chaga bir marotaba kirgan odam qaytiq chiqmog’i dushvor, ixtiyorida birligina imkon qoladi – ana shu ko’cha bo’ylab ichkarilash, ichkarilash, vassalom!” Umr bir joyga borganda Oqsoqol xatosini anglab yetadi. Lekin endi kech edi: do’st boy berilgan, iyomon lat yegan, she’riyat zamon xizmatiga solingan edi.

Oqsoqol – umumlashma obraz. Adib aksar qalam-kashlar xarakteridagi noqis jihatlarni – hirs-u havas, mansab-martaba ilinjida odamilik fazilatlarini boy berish, nafs-u havo deb tubanlikka qulash xususiyatlarini ana shu obrazda jamlagan.

“Shoirning to’yi”dagi boshqa obrazlar ham Erkin A’zamning ijodkor sifatidagi tutumini aks ettirishga xizmat qilgan. Hukmron mafkura qurbaniga aylangan Otashqalb, zamon nog’orasining o’yinchisi Ajoyib domla, haqiqat-parast Yosh shoir obrazlari

asar badiiyatini ta’minlashda va muallif ijodiy niyatining badiiy suvratlanishida alohida o’rin tutadi. Asardagi nisbatan ikkinchi darajali hisoblangan Tepakal, aslida Alvasti bo’lgan Moviyko’z dilbar, Jiyanbeka obrazlari, ularning bir-birini takrorlamaydigan xarakterlari tasviri, yozuvchining nafs-u havoga boy berilgan umr, yolg’onning qurbaniga aylangan haqiqat haqidagi falsafiy umumlashmalarini asoslashga xizmat qilgan.

Erkin A’zamning birgina qissasi tahlili asosidagi bu fikrlar “Shovqin” romani, boshqa qissa va hikoyalari tadqiqi misolida mantiqiy davom ettirilmog’i, chuqur ilmiy kuzatuvlar bilan boyitilmog’i, yozuvchi ijodiga doir salmoqli ilmiy umumlashmalar chiqarilishiga zamin bo’lmog’i zarur. Zero, adabiyotning asosi bo’lgan obraz va poetik tafakkur, portret va xarakter, ijodiy uslub va badiiy til – barchasi ijodkor tutumini ifodalaydi. Bir haqiqatni e’tirof etmoq zarur: aslida, mustahkam tutumga ega ijodkorlar ko’p emas. Qo’liga qalam tutganlarning hammasida ham bu fazilatni topish mahol. Aslida, olam va odam hayoti uchun to’rt unsur – suv, havo, tuproq va olov qanchalik kerak bo’lsa, adabiyotning ravnaqi uchun ijodkor tutumi shunchalik muhim. Erkin A’zam asarlari mutolaasi ijodkorlarning bugungi va kela-jakdagi avlodlari uchun ham bu borada mezon bo’la olishi jihatidan ahamiyatlidir.





**Alisher
ALIQULOV**

Boshga tashvish tushsa maslahatgo‘yi,
Otasi yo‘q edi Odam atoning.
Beshikka sumakni qo‘ya bilmasdi,
Onasi yo‘q edi Momo Havoning.

Yerga tushgan payti yozmi, kuz edi,
O‘n boshoqni sanab, balki yuz, dedi,
Hamma aytgan gapi yangi so‘z edi,
Lug‘ati yo‘q edi Odam atoning.

Suvga cho‘kkanga ham bitta xas berar,
Chin so‘rasang, yosh ustiga yosh berar.
Podsho bo‘lar qachondir qumursqalar,
Unvoni yo‘q edi Odam atoning.

Guvohi yo‘q hech qaytganmi so‘zidan,
Shayton yerga tushdi yana izidan,
Nabiralar ko‘rdi o‘g‘il-qizidan,
Qudasi yo‘q edi Odam atoning.

Qon suradi yaxshi-yomon xislating,
Jon so‘raydi vaqtி kelsa xizmating,
Bizga yuqishini tangri bilardi,
Armoni bor edi Odam atoning.

Tomchi-tomchi bo‘lib tommoqda ko‘ngil...

Yoshlikda qo‘rquvim bor edi xiyla,
Xatar anglaganman o‘zim soyamdan.
Ilon haqidagi gaplarni eshitib,
Cho‘chib yurar edim bedapoyamdan.

O‘rog‘im qo‘limni kessa chinqirib,
Ona deb chopardim uyimiz tomon.
Balki erkaligim oshgan haddidan,
Ehtimol, qo‘limni kesgandir yomon.

Bugun bedapoya o‘rnida ayvon,
Ilonlar bosh olib ketishgan “vish” deb.
Qo‘rqib yurishgandir ular ham hayron,
Biz haqimizdagи gaplarni eshitib.

Devorim ortida pichirlab yurar,
Ilondan ming karra yomonroq g‘anim.
Ona deb chinqirmsam, eshitmas hozir,
Eh, qancha qonlarni yo‘qotdi tanim.

Tilimni tiyishni o‘rgandim avval,
So‘ng bari-barini Xudoga soldim.
Qo‘rquv ham qolmadi endi u qadar,
Ilonlar zahriga o‘rganib qoldim.



Singlimga

To'xtab qolgani yo'q, klinik o'tyapti,
 Chetdan nazar tashlaganda kundaymikan.
 Singlim, gulning barglari mitayapti,
 Qiz bolaning taqdiri yo shundaymikan?

Ro'molingni yechgan joying hanuz o'sha,
 Nigohlarim yetar, lekin yetmas bo'yim.
 Tunov kuni qatidan bir xat chiqibdi:
 "Xayr, ona makon, xayr, ota uyim".

Og'a-inin ko'pin ko'rdim, ahil emas,
 Yorni deb yo yerni deya urishadi.
 Biz o'sgan uy devorining suratlari
 Tushlarida faqat seni ko'rishadi.

Ko'ngil deyman, tilim kuysa duduqlanib,
 O'sha ko'ngil bir hotamga ummat tushgan.
 Mening orzu-havasim-u istaklarim
 Onam bilan senga juda qimmat tushgan.

Nimanidir axtaraman yon-verimdan,
 Dog' bo'p qo'nar qiliqlarim nojo'yasi.

Ustimidagi manov charm kurtka emas,
 U onamning bir oy kutgan pensiyasi.

Endi meni kim asraydi ko'zlarida,
 Sal kechiksam, ko'chalardan surishtirib?
 Uyga kelib chaqiraman, sen chiqmaysan,
 It huradi yuzlarini burishtirib.

Bug'doy o'rsam, boshog'ini tergan, singlim,
 Yerdan nonning ushog'ini tergan, singlim.
 Nega meni ko'p o'ylading hammadan ham,
 Uylarimni oy ustida ko'rgan, singlim.

Mana, akang eplolmadi o'qishni ham,
 Shoirmen deb, tuzukroq she'r to'qishni ham.
 Qishlog'ida nomi chiqqan katta daydi,
 Bilmay qoldi na cho'kishni, suzishni ham.

Singlim, uying boshqa endi, joying boshqa,
 Ko'ylagimni ilolmaysan uy doriga.
 Sening shodon yurganliging mening baxtim,
 Ko'rsam baxtli kelinchaklar qatorida.

* * *

Tomchi-tomchi bo'lib tommoqda ko'ngil,
 O'zi aytganidan tonmoqda ko'ngil.
 Manglayini urib shamol to'shiba,
 Tag'in shamollarga yonmoqda ko'ngil.

Uning qilmishi-yu shaklin sharhi yo'q,
 G'am-u g'ussalardan bo'lak zirhi yo'q.
 Dunyoni qiymatlab bo'lar va lekin
 Bironta bozorda hisob-narxi yo'q.

Salqin shamol bo'lib yelmoqda ko'ngil,
 Bilmam, nelarnidir bilmoxda ko'ngil.
 Bahorning beozor maysalarini
 Achchiq qirov bo'lib tilmoqda ko'ngil.

Ko'p isyonlar qildi, naf'i bo'lmadi,
 Ko'p ehsonlar qildi, birov bilmadi.
 Istig'forlar aytib Yaratganiga?
 Taqdirda boriga ko'nmoqda ko'ngil.

SOG'INCh – ENG UZUN ShE'R



Nasrullo ERGASH

Nargiza Odinayevaning "Eng uzun she'r'i – endi olis bolalikka eng uzoq safaridir.

Hammamiz ham bolalikni sog'inamiz, ko'nglimizning tubtubida, garchi endi iloji yo'qligini yaxshi bilsak ham, bolalikka qaytgimiz keladi. Ammo yashagan sari esimiz kirib, aqlimiz to'lishib borarkan, bolalikda qilgan buyuk xatolarimiz ko'zimizga endi erish tuyula boshlaydi. Endi o'sha xatolarni qilishga oshkora uyalamiz, hatto or qilishimiz ham mumkin. Ehtimol, bolalikdag'i eng toza samimiyat bizni allaqachon tark etgani tufayli olis bolalikka qaytgimiz kelar-u, ammo zinhor bola bo'lgimiz kelmas. Bora-bora bolalikni ham sog'inmay qo'yarmiz. Ko'ngli boladek pok shoira N.Odinayeva biz kattalarning ana shu fojiasini eng uzun she'r qilgan.

Bolalikdag'i do'stlik va muhabbat kattalarnikidan hech bir tama va manfaatga ega emasligi bilan keskin farq qiladi. Kattalar do'stligi va muhabbati biz istaymizmi, yo'qmi hisob-kitob asosiga qurilgan. Hisobli do'st ayrilmas degan maqol, ehtimol, kattalar uchundir, ammo bolalarga xos emas. Bolalarning ko'pchiligi agar kattalar tomonidan hali ongi buzilmagan bo'lsa barchani boricha sevadi. Ularga ko'ngil qo'yish uchun insonning yoshi yoki ijtimoiy mavqeい mutlaqo ahamiyatsiz. Shuning uchun aksar bolalar o'zidan kattalarni yaxshi ko'rib qoladi. Biz kattalar esa do'stlik va muhabbatni ham o'z izmimizga solmoqchi bo'lamiz. Albatta, ko'ngil qo'ymoqchi yoki do'stlashmoqchi bo'lgan odamimizni avval aql ko'zi bilan obdon o'rganamiz, yoshiga, ijtimoiy mavqeiga e'tibor berib, yulduzimiz yulduzimizga to'g'ri kelishi yoki kelmasligi borasida kechalari uxmlamay bosh qotiramiz. Afsuski, biz qancha hisob-kitob qilmaylik, ko'pincha bog'lagan munosabatimiz uzoqqa bormay uzeliladi. Chunki uni qalbimiz bilan

emas, aqlimiz bilan tanlaganmiz. Bugun abadiy birga bo'lish haqida qasam ichib yurgan do'stlarimiz yoki oshiq-ma'shuqlar ertaga arzimas manfaat tufayli ajralib ketadi. Ammo bola kimni yaxshi ko'rsa, uning atrofidagilar ham unga shuncha qadri. Jumladan, Nargiza bolalikdagi o'rtog'ining portretini shunday chizadi:

*Xushlamasdim shamolni ozroq,
Qor-do'lini bilmay olamning.
Farzandiyyding qoramag'izroq.
Quyoshga eng yaqin odamning.*

Shoira o'rtog'ining otasini quyoshga eng yaqin odam deb atayapti. Quyosh adabiyotda haqiqat va mehr-u muhabbat timsoli. Chunki u tunning ziddi o'laroq tong otgach, tunda yashiringan haqiqatlarni oshkor qiladi. Qiymatda quyosh g'arbdan chiqadi deyishadi. Ehtimol, u so'nggi bor barcha haqiqatni oshkor etish uchun g'arbdan ko'tarilar... Demak, shoiraning bolalikdagi o'rtog'i quyosh kabi haqparast odamning farzandi. Shuning uchun ham u jippi Nargizaning nazdida hurmatga loyiq. Quyosh desak, qalbimizga issiqlik va yorug'lik kiradi. Insoniy mehr-muhabbat ham qalbni shunday isitishi bor gap. Demak, bo'lajak shoiraning o'rtog'i odamlarga mehr-muhabbatni cheksiz insonning farzandi. Shuning uchun ham u shoiraning nazarida mehru muhabbatga sazovor.

Nargiza, so'zni qiynamay, she'mni o'ylamay yozadigan shoir. Bir qaraganda, to'rtlikdagi baytlar bir-biriga ulanmagandek tuyulishi ham bor gap. Ammo bu saktaliklarning barchasi she'rdagi samimiyat pardasi ostida qolib bilinmay ketadi.

*Bir qo'shiqni bilardik sen, men
So'zlarini anglamay aytgan.
Ko'nglim edi bu dunyodan keng,
Eng uzun she'r sog'inch bo'larkan.*



Mazkur she'r xotiralar asosida yozilgani uchun undagi vaqt hodisasi keskin o'zgarib turadi. Shoira ikki o'rtoq so'zlarini tushunmay aytgan bo'lsalar-da, bolalikda eng yaxshi ko'rgan qo'shiqlari bo'lgani va ko'ngli dunyodan keng bo'lganini ayta turib, birdan "eng uzun she'r sog'inch bo'larkan" deydi. Bundan biz go'yo birdan ulg'ayib, bexos kattalar olamiga qo'shilib qolgan shoiraning beg'ubor qo'shiqlar kuylagan, ko'ngli dunyodan keng davrlarini daf'atan sog'inishini teran his qilib, uning shirin og'riqlariga beixtiyor sherik bo'lamiz.

*Soyda qamish kemalar suzdi,
So'ng tezlashdi yillar to'lqini.
Osmondag'i oyni kim uzdi
Eng uzun she'r o'qilgan kuni.*

Qandoq qadrdon manzara. Menimcha, bolaligida suvda qog'oz yoki qamish kema oqizmagan bola kam topilsa kerak. Ammo vaqt sur'ati yana shitob bilan o'zgarib, bir qarasak, kemalarimizni suvning tezkor to'lqinlari oqizib ketgan emish. Demak, ko'z ochib yumguncha bolalik ham o'tib, kattalarning jiddiy dunyosiga qadam qo'yibmiz. Endi biz bolalikda tikilib

*Murg'ak yurakni
ham aldab, shirin
xotiralarimiz cho'kib
ketgan soy bo'yiga
qaytib bormaslikka
ko'ndiramiz.*

uzun tunlar xayol suradigan handalakdek to'linoy ham yo'q. Uni eng uzun she'r o'qilgan, ya'ni bolalik bilan xayrashilgan kuni kimdir olmadek uzib ketibdi. Qiziq, u bolalik o'g'risi kim bo'ldi ekan? Beshafqat vaqtmi yoki vaqtga yengilgan inson?..

Shoira she'rda qayta va qayta eng uzun she'r, ya'ni sog'inchga murojaat qilaveradi. Demak, bundan bolalikdagi o'rtoq shunchaki o'rtoq emas, uning ko'ngildoshi, bu yorug' dunyoga kelib eng birinchi marta tanlagan yaqin insoni ekanini bilamiz.

*Topolmadim yaqin falakni,
G'am-quvonchni hayotga yo'ydim.
Aldab-suldar murg'ak yurakni,
Soy bo'yiga hech bormay qo'ydim.*

*Soyga "tilla" tangasi tushgan
Bolakaydek ko'nglimda araz.
Tong, shomlari so'zsiz urushgan
Bu kunlarga o'rgandim oz-oz.*

Bolalikdan uzoqlashganimiz sari bir paytlar oy-u yulduzları peshonamizga tegib turgan osmon – falak ham birdan bizdan olislab ketganini his qilamiz. Bolalik allaqachon tugab, endi hammasi boshqacha bo'lishini, g'am-quvonch almashib keladigan kunlar boshlanganini noiloj tan olamiz. Murg'ak yurakni ham aldab, shirin xotiralarimiz cho'kib ketgan soy bo'yiga

qaytib bormaslikka ko'ndiramiz. Soyga "tilla" tangasi, ya'ni eng aziz xotiralari cho'kib ketib arazlagan bola singari asta-sekin arazlarimiz ham unutilib tong va shomlari bir xil, deyarli farqsiz bo'lib qolgan kattalar hayotiga o'rganib, ko'nib-ko'nikib yashay boshlaymiz...

Darvoqe, she'rda soy obrazi shoiraning balaligi ko'milgan ramziy joy ma'nosini anglatadi.

*Endi uyg'oq tushlar ko'ryapman,
Boshqa o'yin sen taraflarda.
Cho'g' oralab chopib boryapman
Oq terakmi, ko'k teraklarda.*

Bolalik – shirin tush kabi inson hayotida ko'z ochib yumguncha o'tib ketadigan eng qisqa davr. Ammo undan bir umrga yetgulik shirin xotiralar qoladi. Siz bolalikda ko'rgan tushlaringizni real hayotda ko'ra boshladizingizmi, bilingki, bolalik bilan allaqachon xayrashibsiz. Endi ulg'ayish dunyosining o'yinlari boshqacha: unda halol va g'irrom hamda boshqa turfa xil katta-yu kichik o'yinlar bor. Bu o'yinlarda salgina xato qilsangiz, kattalar sizni darrov bolalikdagi ko'ngilchan o'rtog'ingiz kabi kechirib yuborishmaydi. Har bir xato siz uchun qimmatga tushishi mumkin. Biz bolalikda oq terakmi, ko'k terak o'ynab, yam-yashil va mayin maysazor ustida oyoqyalang yugurgan bo'lsak, endi kattalar dunyosining oq terakmi, ko'k teragi biroz beshafqatiroq. Endi biz oyoqyalang mayin maysazor ustida emas, balki oyoqlarimiz kuyib, shilinib va hattoki qonab, shoira aytmoqchi, cho'g' ustida yoki shisha siniqlari ustida ham yugurishimizga to'g'ri keladi.

*Ufq yoqalab yastangan dala,
Shu gullagan havoga to'ydim.
Qo'shiq aytsam, o'ynagan bola,
Sen haqingda she'r yozmay qo'ydim.*

Nargiza har bir to'rtlikda bolalikdan uzoqlashgani to'g'risida bitta dalil keltiradi. Jumladan, bu yuqoridagi parchada "Qo'shiq aytsam, o'ynagan bola, / Sen haqingda she'r yozmay qo'ydim" satrlari orqali ifodalangan. Ehtimol, boshqa odamlarga unchalik sezilmas, ammo ko'ngil odami uchun bolalikni sog'inish juda og'riqli jarayon. Xuddi shu singari bolalik o'rtog'i haqida she'r yozmay qo'yish ham oddiy odamlar uchun hech narsani anglatmasligi mumkin, ammo shoir odamga bu ulkan fofia kabi ta'sir qiladi.

Shu o'rinda, "qo'shiq aytsam, o'ynagan bola"ni Nargizaning she'rdagi bola xarakterini kashf etuvchi eng inja kashfiyoti desak yanglishmaymiz. Axir, begunoh bolagina o'zi kabi ikkinchi bir bola, hatto qiz bola aytgan bolalarcha beg'ubor qo'shiqqa raqs tusha oladi.

*Yuragimga tanish tuyg'ular:
Oltin beshik, oq oy topib ber.
Odam xalqi... anglasa ular,
Hamon o'sha podachi qiz der.*

Nargiza ana shu parchadan boshlab bolalar va kattalar olamini bir-biriga keskin kontrast qo'yib qiyoslaydi. Bolalarning kichkina bo'lsa ham dunyolarga sig'mas o'z dunyosi, she'nda ayttilmoqchi, oltin beshik, oppoq oylari bo'ladi. Lekin bu olam, xususan, Nargizaning betakror olami qanchalar go'zal bo'lmasin, odamlar, ya'ni kattalar ko'zidan pinhon. U kattalar nigohida bor-yo'g'i bir



podachi qiz bo'lib qolib ketgandek. Mazkur parcha bizga qalbimiz bolalik dunyomizdan qancha uzoqlasa, ko'ngil ko'zlarimiz ham shuncha xira tortib ketishini eslatib turadi.

Ammo Nargiza shoir degan nom mangu jaranglashini (Belinskiy) yaxshi bilgani uchun ham quyidagi satrlarni bitishga o'zini haqdor deb biladi:

*Bozoriga chorlar to'rt tomon,
Qirdan qochib tog'larga keldim.
Yerda kezib yurgan olomon,
Men sizlardan balandroq edim...*





**Raxshona
AHMEDOVA**

Tushunarsiz SEVGI IZHORI

(Hikoya)

*G*ul do'koniga ishga kirganimga ikki hafta bo'ldi.
 "O'g'il bola bo'sang, gul do'konida nima bor?" demoqchimisiz? Gul do'konining egasi ham xuddi shunday fikrda. Suhbatga kelganimda, u "O'g'il bola degan gullar orasida aralashib yurmay, bilagini ishga sol-adigan mehnat qilgani yaxshi emasmi?" deb so'radi. U haq edi, biroq menga gullar yoqardi. Bolaligimdan gullar shaydosiman. Tengdoshlarim to'p tepib yurgan payt men gulbog'lар ichra kezardim. Goho kapalak-ning, goho ninachining ortidan yugurib yurardim. Bu mashq'ulot menga to'p tepishdan ko'ra, ming chandon qiziqroq tuyulardi.

Keyin gullar hayotimning mazmuniga aylandi.

– Dada, bu gulning nomi nima?

– Oyi, bu gulni nima deyishadi?

Kattalardan gullar nomini so'raganim so'rigan edi. Biroq kattalar ham gohi javob berolmay qolishardi.

– Bilmasam, o'g'lim, gul-da gul.

Maktab kutubxonachisidan yordam oldim. Karl Linneyning "O'simliklar orzusi" va yana bir talay kitoblarini o'qib tugatdim. Gullar soat o'mini bosishi mumkin, ha ha. Gullar gapiradi desam, ishonmassiz, ehtimol. Lekin bu haqiqat. Gullarning tilini tushuna boshlaganimda o'n besh yoshda edim.

Misol uchun, moychechak yoshlik ramzi, chinnigullar esa birlinchi sevgi va ehtirosdan so'zlaydi. Sariq chinnigullar "Siz meni xafa qildingiz" deb gina qilayotgandek, pushti chinnigullar esa "Men sizni hech qachon unutmayman", deydi. Piyongul – nafislik ramzi, unda yashirin bir niyat, pinhona tuyg'u mujassam. Oq astra esa "Men seni ko'proq sevaman", deyayotgandek. Oq sumbul "Siz go'zalsiz", deydi, sarig'i esa hasaddan so'zlaydi. Yasmin – sevishganlar guli. Kaktus cheksiz bardoshni anglatadi, xrizantema yaponchada quyosh degani, kalalar esa havas va hurmat ramzi. Oq kameliyalar "Siz ajoyibsiz", deydi, push-tisi "Sizni sog'indim", qo'ng'iroqgul "Doim siz haqingizda o'layman, nega meni qiynaysiz?" deb yig'layotgandek. Mimozaning tuyg'ulari yashirin, ehtimol, shu uchun "uyatchan" deb atashar. Orxideyalar "Siz juda-juda go'zalsiz" desa, lolalar muhabbat izhor qilib, "Siz men uchun azizsiz" deyayotgandek.

Bu dunyoda gullar ko'p. Gullar orgali inson o'z sevgisini va yoki hurmatini bildiri-shi mumkin. Gullar bizga ko'p narsani aytadi, faqat ularni eshitmaymiz, xolos. Gullar aslida, odamlarning bir-birini tushunib olishi va his-tuyg'ularini ifoda etishiga yordam berish uchun yaratilgan.

Gul do'konimiz gavjum ko'chada joylash-gan. Oldidan har kuni son-sanoqsiz odamlar o'tib qaytadi. Kimdir gullarga e'tibor qiladi, kimdir beparvo o'tadi. Gullarga havas bilan

boqib, so'ng xushnud yo'lida davom etadiganlar qancha. Gul sotib oladigandan ko'ra uni tomosha qiladiganlar ko'proq, desam to'g'ri bo'ladi. Shuning uchun do'kon oldida to'xtaydiganlarga uncha parvo qilmayman.

– Bu guldastangiz qancha? – qo'ng'iroqdek ovoz xayolimni bo'ldi.

– O'n sakkiz ming, arzon qilib beraman.

– Nima deb o'ylaysiz, singlimga bermoq-chiydim, bo'larmikan? – o'ylandi qiz.

– Nega bo'lmas ekan? – kuldim.

Uning yuzlarida ham tabassum jilolandi.

Unga suqlanib qaradim. U juda chiroyli, maysalar orasidagi bir dona lolaqizg'aldoqni eslatardi. Qop-qora ko'zlarida quvonch uchquni porlar, qalbi muhabbatga limmo-limdek tuyu-lardi menga. Ismini so'radim, yana jilmaydi, biroq aytmadim.

U guldastani qo'liga olganida qalbim shodlandi. So'ng u ketdi, ortidan ma'yus qarab qoldim. Yana kelarmikan, deb o'yladim. Unga gullar haqida gapirib bergim keldi. Keyin esa ish bilan chalg'idim.

* * *

Guldasta yasash kishidan alohida diqqat va zukkolik talab etadi, ba'zan qo'lim-qo'limga teg-maydi. Kimdir onasiga, yana kimdir sevgilisiga gul olgani keladi. Bunda ranglar uyg'unligiga e'tibor beraman.

Pushti rang nozik his tuyg'ularni anglatadi, u hatto sevgi izhori bo'lishi mumkin. Qizil rang hayotni sevish degani, binafsharang kamtarlik ramzi. Yaxshi xotiralar va sadoqatdan so'zlaydi. Shu rangdagi gullar orgali siz do'st ekaningizni, qo'llab-quvvatlashingizni aytishingiz mumkin. Moviy va ko'k rangli gullar esa sog'inchdan so'zlaydi, to'q sarig'i g'urur ramzi. Oq esa vafoni anglatadi, do'stlik rishtalariga ishora qiladi, ba'zan.

Bolalarga yorqin va quvnoq ohangda so'zlovchi mayda va nozik gullar taqdim etgan ma'qul. Katta yoshli ayollar uchun tez so'lib qoladigan gullar bermang, qizlarga esa yorqin,

qizil rangli gullar berish odatiy emas. Erkaklar uchun guldstalarda shakl va chiziqlar sezilishi kerak, ayollar guldstasi esa aksincha, yumaloq shaklga ega bo'lgani ma'qul.

Gullar haqida bilganlarim ko'p. Biroq men kabi gulga qiziqadiganlar kam. Hayotda shunday bir insonni uchratsam-u, butun umr faqat gullar haqida so'zlashsam deyman.

* * *

Bayram oldi odam ko'p keladi. Biroq negadir shanba kunlari do'kon xaridor kutib mahtal bo'ladi. Yo'l qarayman, o'sha kungi qiz o'tib qolarmikan, deb o'ylayman. Uning yuz-ko'zлari xayolimda jonlanadi, qaysidir gulga o'xshataman. Yo'q, yo'q u gullardan-da go'zal. Do'kon ichi turli gullarning xushbo'y hidiga to'lib ketadi. Shu bo'y ichidan unikini izlayman. Yo'q, uning bo'yи hech bir gulning bo'yiga o'xshamaydi. Keyin esa sog'inch bilan xo'rsinaman.

– Bu gulning nomi nima? – ko'cha shovqini orasidan yana o'sha qo'ng'iroqdek ovozni eshitgandek bo'ldim-u yalt etib qaradim.

– Siz? – hayratdan qotib qolganimni o'zim ham sezmabman. Tilim aylanmasdi. Gapiray deyman-u, hech so'z topolmayman.

– Yaxshimisiz? – jilmaydi u.

– Rahmat, – dedim zo'rg'a. Biroq ko'zlarimni uzolmasdim. Unga termulgancha turardim.

U gullarni bir-bir tomosha qildi, zavqlanib ba'zilarini hidlab ham ko'rди.

– Gullarni yaxshi ko'rasizmi? – tutilib-tutilib so'radim.

– Ha, juda yaxshi ko'raman, ularga qarab odamning ko'zi quvnaydi, – dedi u siniq jilmayib. Bu gal ko'zlarida g'am quyqalari cho'kib qolgandek tuyuldi.

Gullar odam tanlaydi, o'ziga yaqinlashgan insonning qanaqaligiga qarab munosabat ko'rsatadi. Xayolimda uni hatto gullar ham yaxshi ko'rib qolgandi. Men baxtimni topgan edim.

– To'g'ri – dedim shoshib. So'ng una gullar haqida gapira ketdim. U gulbarglarni silar, harhar zamon bosh silkib qo'yar, xuddi jon qulog'i bilan tinglardi.

– Mayli, yaxshi qoling, – dedi u pitcha fursat o'tib.

– Gullarni sog'insangiz, yana keling, – dedim men.

So'ng u ketdi. Ortidan qarab qolaverdim.

Gul sovg'a qilsang bo'lmasmidi? Shunchalar go'l, sodda ekanimni keyin tushundim. O'zimni koyidim. Yana necha kunlar o'tdi, bilmayman. Men uni intiq kutardim. Xayolim parishon bo'lib qolgan, endi gullardan ham ko'proq meni o'sha qiz o'ylantirardi.

Erta-kech uni o'ylayman. Endi o'sha qiz haqida gapirigm keladi. U haqida so'zlashsam, deyman. Biroq "U endi kelmasa kerak" deya umidim kundan kun so'nib boradi.

* * *

Guldasta tanlash har odamning didiga bog'liq. Gullar ming yillardan beri oshiqlarning dil izhori bo'lib kelgan. Ular oshiqlarning kechinmalarini ifodalashga yordam bergan. Ishonasizmi, ba'zan harflar o'miga gullar yuborilgan. Sumbulga qarab uchrashuv kuni tayin qilingan. Gulchalar soniga qarab uchrashuv soati belgilangan.

Qani endi yana bir bor kelsa, deyman. O'zimcha una guldasta hozirlayman. Ranglarini tanlayman. Bir dona gul e'tibor belgisi, uchta bo'lsa, hurmatni anglatadi, beshtasi iqrorlik, yettitasi sevgi ramzi. Guldastadagi gullar soni juda muhim. O'n dona gul "Siz uchun nimadir qilsam devdim", degani. O'n bittasi do'stlik, o'n ikkitasi "Albatta, hammasi yaxshi bo'ladi", deydi. O'n uch esa nafrat belgisi. O'n beshtasi minnatdorlik.


– Bu guldastangiz qancha?

Boshqa mijoz bilan band edim. Biroq darrov tanidim.

– Siz uchun bepul, – dedim. U jilmaydi.

- Yo‘q, ayting narxini.
- Aytdim. U kichkina sumkachasidan pul olib uzatdi.
- Shu guldasta bo‘larmikan? Onam uchun, – dedi.
- Nega bo‘lmisin?
- So‘ng unga eng chiroyli gullardan guldasta yasab berdim.
- Bu nima uchun? – dedi u hayron boqib.
- Go‘zal tabassumingiz uchun, – dedim.
- U olmadi. Yalinib-yolvordim. Olmasangiz xafa bo‘laman, dedim. U jilmaydi, go‘zal edi hatto tabassumi ham. So‘ng ketdi. Ortidan qarab qolaverdim.
- Nega ismini, yashash joyini so‘ramading? O‘zimni koyidim. Do‘konni tashlab ortidan borgim keldi. Biroq... Kutardim, “U yana keladi”. Endi kecha-kunduz uni o‘ylardim. Gullar orqali his tuyg‘ularingiz, shu kungacha yashirgan gap-so‘zlaringizni bildirsangiz bo‘ladi. Men unga berib yuborgan guldasta orqali dil izhorimni aytgandim. “Uni sevib qolganimi-ni-yu, unga muhtoj ekanimni, usiz hayotimda mazmun yo‘qolayotganini...”.
- Endi hayotim mazmuni gullar emas, o‘sha qiz bo‘lib qolgandi. Uni telbalarcha kutardim, yo‘llariga mahtal edim. Yana bir marta kelsa, boshqa qo‘yib yubormayman, gullardan kechib uni tanlayman, degandim. Biroq negadir u kelmadni. Uni uzoq yillar kutdim. Bilmadim necha kun, necha oy, necha yil o‘tdi...

Bugun o‘sha gul do‘konining xo‘jayini-man. Biroq avvalgidek baxtiyor emasman, hayotga qiziqishim so‘ngan. Bu dunyosidan bosh olib ketay dedim, gullarga mehrim meni qo‘yib yubormadi, qolaversa, hamon o‘sha qizni kutardim. Balki u gullar tilini tushunmas, balki dil izhorimni anglamagandir. Lekin gul do‘konim tepasiga yozib qo‘yanman. “Bir-biringizga gullar hadya etib turing. Zero, odamlar gullar tilini unutib qo‘ymasin”.



Nuriddin ZAFAR o'g'li

1994-yili tug‘ilgan. Toshkent irrigatsiya va qishloq xo‘jaligini mexanizatsiyalash muhandislar institutining gidromelioratsiya fakulteti talabasi.

Bulutga atab

Bulutning dardini balki bilarmiz,
Balki anglamaymiz jonimiz halak.
Go‘yo bu momiqdek sabr qilarmiz,
Dardlar ila yashar bulutli falak.

Yig‘ilgan dunyodek samoviy dardlar,
Tomchilar yig‘ilgan oq par bulutda.
Deymiz bu bulutga yuqmasin gardlar,
G‘amgin bu bulutlar go‘yo sukutda.

Har bir tomchi uchun bitsa gar shoir,
Mehnatkish bulutni eslamaydilar.
Qalamni tebratsa samoga doir,
Falakdan bulutni izlamaydilar.



KETAYOTIR OY PARI, GALA QIZDAN ILGARI //



**Abduolim
ERGAShev,**
filologiya fanlar
nomzodi

Qodir baxshi uch-to'rt terma bilan tinglovchilarni rom qilib, davrani qizitib olgach, udum bo'yicha "Nima aytay?" termasi bilan ko'pning ko'ngliga qo'l soladi. "Kelinoy" bo'lsin. Shu paytgacha qariyalar hurmatiga odob saqlab turgan yosh-yalang gal kelganda xohishini aytdi. Buni eshitgan qariyalar ham jonlanib qolishdi. Yonboshlab turgan uch-to'rt otaxon qaddini tikladi, o'zini o'ngladi. Go'yo yoshligi yodga tushdi. "Ha, baxshi, o'zimizning "Kelinoy"dan bo'la qolsin, yoshlarning sazasi o'lmasin", dedi biri. Shuni kutib turgan baxshi keksalarni o'tmisht xayolga toldirib, yoshlarni lol qoldirib, do'mbirasini yeldirib, tinglovchini goh o'ylatib-kuldirib, doston sehrini bildirib "Kelinoy"ga o'tdi.

"...Norguloy o'n yettidan oshgan, o'n sakkizga yetishgan, ikki muhabbat giyosi yangi ko'krakdan o'sgan, boshiga zardo'zi qalpoq kiygan. Qalpoqning aylanasisiga tilladan qo'ng'iroq taqqan, yuziga odam qarab turolmas, qaraganda ham quyoshmi, Norgulmi bilib bo'lmas, Norguloy eshikka chiqsa so'fito'rg'ay, g'azalaylar oldidan ketolmas, kaklik sayrab bo'lar edi mast. Boshida harir ro'moli, o'ng betida dono xoli, o'zi ko'krakdor, ximcha edi beli, oyoqda zarlangan, ichi mayin ko'k kovushi, har qadam bosganda kovushdan chiqar edi chanqovuzning tovushi. Norguloy soz chalishga usta edi. Chanqovuz chalganda bulbullar sayrab, tuyalar yurmay qotib, kuylar ma'rashib, cho'ponlar ingillashib, kichkina bolalar birdan qolar edi uxlashib".

"Lymilari qirday, bilaklari norday, yuraklari sherdai" qiz haqidagi qo'shiqlar Qashqadaryo-Surxondaryoda shu qadar keng tarqalganki, undan aqli ikki-uch band bilmagan yetti yashardan yetmish yashargacha biror o'zbek topilmaydi. "Kelinoy" nomi goh terma, goh tarixiy qo'shiq tarzida, goh doston shaklidida har xonadonga, har bir keksa-yu yosh, erkagu ayol qalbiga kirib borgan. Folklorshunos Abdumo'min Qahhorov yuzdan oshiq kishidan har xil hajmdagi – epik voqealar va lirik qo'shiqlar hamda doston shaklidagi variantlarni yozib olib, ilmiy tahlil qildi va 1972 yili "Kelinoy" turkum dostonlarining o'ziga xos xususiyatlari va g'oyaviy asoslari" mavzusida nomzodlik dissertatsiyasini yoqladi.

Umir shoir Safarovdan “Kelinoy”, “Tashgul”, Rajab Normurod o‘g‘lidan “Izzatoy”, Qayim Pirimqul o‘g‘lidan “Ulug‘oy”, “Iqboloy”, “Jumagul”, Hazratqul shoirdan “Pardaxol” Mamarayim shoirdan “Oytoshgul”, Eshqobil baxshidan “Xonsuluv”, “Oysihat” kabi dostonlarni yozib olib, yagona “Kelinoy” turkumi doirasida atroficha o‘rgangan holda, yigirmadan ortiq variant orasida Qodir baxshi kuylagan “Norguloy” dostoni qiziqarli syujeti, yaxlit kompozitsiyasi, yuksak badiiyati bilan ajralib turishini e’tirof etadi.

Nega Qodir baxshi varianti ustoz baxshilar talqinidan ham ustun kelaverdi? Bizningcha, buning sabablari quyidagilar bilan izohlanadi. Birinchidan, hali hech kim Qodir baxshidek Samarqand-u Qashqadaryo-Surxondaryo hamda boshqa baxshichilik maktablari vakillaridan eshitib, nashr etilgan dostonlarni o‘qib mahoratini oshirmagan. Ikkinchidan, u barcha dehqonobodlik, surxondaryolik qo‘ng‘irotlar, elda doston-terma kuylab

yurgan oqinlar kabi “Kelinoy” haqidagi qo‘shiqlarni ko‘p bilgan. Qolaversa, Qodir baxshi Norguloy xolasining taqdiridan ham ilhomlangan. Yoshlikdan: “Xola, men sizni doston qilaman”, deb aytar ekan. Xalq og‘zaki ijodidan yaxshi xabardor Norguloy opa ham boshidan o‘tgan voqealarga badiiy to’n kiydirib, jiyaniga takror-takror so‘zlab berarkan. Shu omillarning barchasi “Kelinoy” dostonining Qodir baxshidan biz yozib olgan va nashr ettirgan varianti yuzaga kelishini ta’milagan.

1975-yili Qodir baxshi maktabdagi o‘quvchim Xolto‘ra Rahmatov bilan kelib: “Yuring, sizni qo‘y-qatiqlatib, o‘tlatib (kiyik o‘t, jupor, olqor kabi shifobaxsh giyohlar yedirib), asli “Kelinoy”, ya’ni Norguloy xolamni ham ko‘rsatib kelaman. Bugun Xolto‘rboy o‘tgan yili o‘qishga

kiritganimiz uchun haq beradi”, deb mehmonga taklif qildi. Qishloqda bizni qadi-qomati, husn-u jamoli kelishgan o‘rta yoshar er-xotin kutib oldi. Gurung-gurung bilan bo‘lib Qodir aka: “Pochcha, sozdan boshlang-chi”, deb do‘mbirasini uzatdi. Rahmat aka bir necha kuyni maromida chertdi-da, cholg‘uni egasiga qaytardi. Baxshi turli dostonlardan ancha kuyladi. Ertasiga Rahmat pochchasi, ya’ni So‘ltoqning zor qaqshagan joylarini ko‘rsatishni va da qilib bizni olib qoldi. Qishloq bilan tutashib ketgan Oqbosh tog‘ining Sarg‘ay ota qismiga chiqdik. Bahorda tabiat nihoyatda go‘zal. Qodir aka joy nomlari, xilma-xil gullar, qushlar, giyohlar bilan tanishtirib, Ermat chol (bu ham Kelinoya, ya’ni Norguloya oshiq) jo‘natgan o‘n yigit Rahmatni qo‘lga tushirgan daraga yetkazib keldi.



“Dumi qayrilgan chayonday”, “quturgan itday”, “oshiqqa ozorlar”, “Xudoyam bezorlar”, “rahmi yo‘q toshlar”, “o‘ylovsiz boshlar” kaltaklab borayotganda So‘ltoq (Rahmat): “Aytib ketsam, izsiz yo‘qolmasman”, deb nola qilmoqda.

*Ey ko‘ringan, qorli tog‘lar,
Bundan So‘ltoq o‘tdi denglar.
Ko‘kda uchgan satta zog‘lar,
Qonlar yutib ketdi denglar,
Tandan jonni sotdi denglar,
Ko‘kda oyi botdi denglar.
...Boshin cho‘zib tiklab turgan,
Go‘sht qarashib g‘ajir qushlar,
Bundan So‘ltoq o‘tdi denglar,
Qonlar yutib ketdi denglar...*

Qodir baxshi dostonni boshqa baxshilarda uchramaydigan misralar bilan yakunlaydi:

*Oq o‘tovning ustida,
O‘n oltita oyquchoq.
Qarisa ham Norguloy,
El og‘zida kelinchak.*

Doston yozib olinganda Norguloy, ya‘ni “Kelinoy” va uning suyuklisi Rahmat, ya‘ni So‘ltoq yoshi o‘tib qolgan edi. Boshqa personajlarga ham shu yon-atrofdagi real kishilardan qiyos olingen, tog‘lar, qushlar, gullar, parrandalar, hayvonlar, giyohlar ham kuychingin ko‘z o‘ngida gavdalaniб turardi. Qodir baxshi kundalik turmush tarzini epik makon, epik zamonga ko‘chirib, yon-verimizdagi shaxslarni esa epik qahramon darajasiga ko‘tardi.

Qodir baxshi “Kelinoy” dostonini dastlab “Masharoy”, ikkinchi va uchinchi marta “Norguloy” deb yozdirgan bo‘lib, har uchala variant bir-biridan mazmunan chuqur va badiiy yetuk. Biz qog‘ozga tushirgan to‘rtinchı talqinda o‘tov tikish, yoramazon aytish,

kelinsalom kabi an‘anaviy tasvirlarni kiritadiki, xalqimiz urf-odatlarining muayyan qirralari avlodlarga yetkazilishida muhim badiiy va etnografik ahamiyatga ega.

Qodir baxshi kuylagan “Kelinoy” dostoni Norguloyning maqolamiz avvalida keltirilgan tasviridan boshlanib, “Shukuraliboyning cho‘ponlari boydan enchi uloq qilmas, Norgulni bir ko‘rsak bo‘lgani deb, to‘badan kelib pisib qarar, qorasini ko‘rsa, bugun enhiga olti qo‘y oldik deb yurar, bir xillari Norgulning otini qo‘rqib aytolmay, “Kelinoy” deb qo‘shiqqa qo‘shar edi” tarzida davom etadi. Bosh qahramonning betakror portreti bilan davrani og‘ziga qaratib olgan baxshi endi tinglovchilarni voqealar oqimiga olib kiradi.

Norguloy chalgan chanqovuzning tovushini shu o‘ramning katta o‘g‘risi So‘ltoq bexosdan eshitib, sehriga lol qolishi asar voqealariga turtki beradi. So‘ltoqning kuy egasini so‘rashi cho‘ponga yoqmaydi. Chunki o‘zi ham Norguloyning ko‘yida kuyganlardan edi.

Yozuvchi Samar Nur yozganidek, qariyalar ko‘zlarini yumib kuy-qo‘shiq ohangiga yengil bosh tebratar, yigitlarning yuragiga tushgan cho‘g‘dan ko‘zlar yashnab ketgan. Qiz-u juvonlarning yanog‘i lolarang, yeng uchi bilan lablarini bekitib, go‘shangaga kirgan kelinday hayo bilan yoriga termulishgan. Bolakaylor esa hali bu qo‘shiqning ma’nosini tushunmaydi. Baxshi xiyol ko‘zlarini yumgan holda kuyib-yonib “Norguloy”ning hadsiz husnini, aql-idrokini, xilma-xil hunarini, unga oshiq qirq cho‘pon va So‘ltoqning orzu-umidlarini, sevganiga yetishish yo‘lidagi urinishlarini kuylayveradi. Norguloy madhi davom etaveradi. U o‘zbek qizlarining yorqin yulduzi. Uni ko‘rgan har narsadan kechadi.

*Qizlar qo‘tondan qiy olar,
Qiy borib tomdan joy olar.
Oy Norgul chiqs qeshikka,
Kun turolmaydi – uyalar.*

*Tikka tushgan Hasan-Husan,
Kiyinib keldi bo'p poson.
Norguloyni ko'rgan so'ng
Uyaldi, ketdi op-son.*

Muqoyasani qarangki, Norguloyni ko'rgani Hasan-Husan (kamalak) yetti rangda tovlanib yerga tushdi. Biroq bu husni malohat qarshisida lol bo'lib, iziga qaytib ketdi.

Baxshi Norguloy ta'rifida qo'llagan hazil-mutoyiba yoshlarning kulgisiga, keksalardagi jonlanishga sabab bo'ladi. Dostonda cho'ponlarning har biri uni o'zicha madh etadi. Nazar cho'pon Norguloyning sigir sog'ishini, mohir tikuvchiligini, Rajab cho'pon o'tov tikishini, Xoliyor cho'pon xulqi, fe'l-atvori, husni jamolini, G'ulom cho'pon hayitlab yurishini kuylasa, Ergash cho'pon o'z tuyg'ularini do'mbira ohanglari bilan so'zsiz bayon etadi. Aytishuvda So'ltoq g'olib topiladi.

Baxshining yoqimli, goh mayin, goh shiddatkor ovozidan taralib, tinglovchi qalbiga singayottan misralar faqat Kelinoy madhi, sho'x-shodon kayfiyatidan iborat emas, insonning azaliy qismati, muhabbatga erishish yo'lidagi kurashlar, visol umidlari-yu hijron azoblari, ishq homiylari va kushandalari bayoni... Sevgisi sabab o'g'rilikni tashlab, Shukuraliboga cho'pon bo'lgan So'ltoq iztiroblari tinglovchini o'ylatadi ham. Hijronga chiday olmagan yigit oxiri ming andisha, hadik bilan Norguloyga ko'nglini ochadi. Qiz an'anaviy epos motivlariga xos ravishda o'zi bilan kurash tushish shartini qo'yadi. Tush payti o'tovda hech kim yo'q, So'ltoqning bepisandlik bilan "Endi astaroq yiqitsak, yer qattiq-da", deyishi Norguloyning oriyatini qo'zg'aydi.

*Norgul endi o'z ko'nglini xushladi,
Yengni qo'yib, yoqasidan ushladi.
Biror pasil o'tgan edi oradan,
So'ltoqni dustaman qilib tashladi...*

Mag'lub yigit bo'ynini xam qilib:

*Dushman bo'lsa yakka maydon ko'rardim,
Siltashganda sherni yerga urardim,
Men yurmayman, kelib so'ygin, Norguljon,
Qizda noz bor, kuchi yo'q, deb yurardim... -*

deya qizga tan beradi. Norgul ham So'ltoqni zimdan kuzatib sevib qolgani bois unga dalda berib, kurashni sir tutishini aytib jo'natadi. Uдумга ко'ра qalin berishga yigitda hech vaqо yo'q edi. Boy esa cho'poniga, qanchalik mard, sadoqatli, fidoyi bo'lmasin, yakka-yu yagona qizini bermoqchi emas.

Yarim tun. Yoz oqshomi bo'lishiga qaramay, badanlar junjikadi. Bolalar kattalarning pinjiga tiqilishadi. Ammo ko'zga uyqu kelmaydi. Baxshi kuylayapti... Cho'ponlar va ularning yaqin maslahatchisi Dono bezovta. Nihoyat chora topildi. So'ltoq Norgulni uzoq-uzoqlarga olib qochdi. Ammo boyning qo'li uzun, ularni Gilambopdan tutib keltirdi. Qizning qat'iyati, Xalil mergandek fidoyi insonning so'zлari, cho'ponlarning So'ltoqni himoya qilishi Shukuraliboyning ko'nglini iyitdi. Biroq voqyealar davomi baxshi qo'lida. Do'mbira uni qayonga boshlaydi. Sahar bo'ldi. Birdan to'y boshlanib, yana Kelinoy tasnifiga o'tilsa, kayfiyat ko'tarilardi. Yo'q, soz mungli yangraydi, soz yig'laydi. Chunki Ermat chol So'ltoqni o'ldirgani o'n to'rt yigitni qurollantirib yo'nga soladi.

*Qabog'i qirday uyulib,
Pul uchun mushti tuyilib,
Yuzida qilcha mehr yo'q,
Ko'ziga qonlar quyilib.
Bulbulga hakka jo'nadi,
Qarg'aday tikka jo'nadi.*

So'ltoqni hiyla bilan ushladilar, qo'lin mahkam boyladilar, chor tarafdan achchiq

qamchi tayladilar. Tinglovchilar xomushlandi, yigitning nolasiga chiday olmay, ko'zlarda yosh miltiray boshladi. Asablar tarang. Endi maqsadga yetdim degan, barcha azob-uqubat o'tdi degan So'ltoqning yorug' olamdan umidi uzildi.

Oshiq yigit "yig'lab turgan satta gullar", "oshiqqa vafodor tog'lar", "sayrab yig'lagan bulbullar", "xo'rsinib turgan zaranglar", "urmanglar deb shoxin cho'zgan archalar", "tikonlarin olib qochgan qizamizlar", "faryod urib shovullab oqgan suvlar", "boshda parvona bo'lgan mullato'rg'ay", "baland-past qiyalar", "chopishgan qulun-biyalar", "o'ynashib yurgan tuyalar", "tog'da sayragan kakliklar", "izg'ishgan qo'zi-uloqlar", "g'ang'illab uchgan so'nalar" dan najot tilab, ularga dardini aytib ketaverdi. So'ltoqning nolasiga chiday olmay, tun chekina boshladi, oy botdi, qariyalar bomdod namozini ham unutib baxshi yonida qotdi. Qodir baxshining o'qraniши tog' cho'qqilariga ham yetdi...

Xalil mergan, Dono cho'pon va boshqa qo'ychivonlar Shukuraliboy bilan kelishib, yaloq qizartar, fotiha, nikoh to'yini bir qilib, barcha rasm-rusumlar, an'analar bo'yicha marosimlarni boshlab yuborishdi. Quyosh ufqdan bosh ko'targanda baxshi So'ltoq va Norguloyning to'yi ta'rifini tugatdi.

Baxshi keksalardan duo olib qo'zg'alganda kampirlar kelinni salomga olib chiqayotgan edi. Bu kecha yuzlab tinglovchilar qalbida mangu muhrlanib qoldi. Doston bo'y qizlar-u bo'z yigitlar qalbida orzu-umid, keksalar dilida esa yoshlik armon bo'lib balqidi. Biz yana ko'p marta "Kelinoy"ni goh to'liq, goh qisqargan holda tingladik. Har davrada, har o'tirishda Norguloy o'zbekona zeboligi, g'ayrat-shijoati, go'zal axloqi, noz-karashmasi, mehr-muhabbatini bilan o'ziga rom etaverdi.

Qodir baxshi kuylagan "Kelinoy" ("Norguloy") yoshlar sevgisini o'ziga xos ruhiy holatlarda bera olgani, o'zbek qizlarigagina

xos fazilatlar, ibo-hayo va kurashchanlikni ifodalagani bilangina emas, milliy urf-odatlar, rasm-rusumlarni ipidan-ignasigacha mujassamlashtirgani bilan ham beqiyos ahamiyatga ega. Birgina o'tov tikishni olsak, keraga, bog'ish, chang'aroq, tizma, qur, g'ildirovuq, o'n olti otma bov, ikki oq bedov, tupak, iynov, tuynuk, to'rt tomonga bog'lanuvchi bov, kashtali chiy singari jihozlarni qanday joylashtirish juda chiroyli tarzda nazmiy bayon qilinadi. "To'rtta keragasini "Bizday qarib yursin" deb to'rt kampir uyurdi. Bo'sag'asini: "Mehmon ko'p bo'lsin", deb mehmon xotinlarga qurdirdi... "Bola-chaqasi ko'p bo'lsin", deb bolasi ko'p ayolga chaqaloqni ko'tartirdi... O'n olti otma bovni "bir-biridan sovimasin", deb qizlar oyquchoq qilib tashladi. Kigizni ushlab turish uchun ikki oq bedovni o'tovning iynovidan tutib bo'sag'aga mahkamladi. Chang'aroqning ustidan to'rtta oq ola ip bilan bog'langan tuynukni tashlab, uchta uchini bog'ladi, bittasini Norguloy bog'laydi, deb bo'sag'aga qo'ydi. Undan keyin oppoq chiyni uyurib, o'tovini tayyor qilib qo'ydi. "Bo'sag'asi moyli bo'lsin", deb bo'sag'aga semiz qo'yan dan birini osib siyirdi...". Bundan tashqari, yaloq qizartirar, dasturxon jo'natar, dasturxon qaytar, qalin, qiz ota, vakil ota, it irillar, kampir o'ldi, oyoq bosar, soch siypatar, oyna ko'rsatar, qo'yniga tuxum solar, tongni kutar, olov aylantirar, ota duosi, ko'gan tashlar, baxmal to'shar, teri yopar, belga qo'ldov bog'lar, bo'sag'aga butun non qo'yar, cho'ntakka oyna solar, un elatar, qo'lni moyga botirar, yuz ko'rsatar singari o'ttizdan oshiq urf-odat, irim-sirimlar tasvirlanadi.

Qodir baxshining yutug'i shundaki, o'zi yashayotgan elning har bir odatini yaxshi biladi, uning qatidagi ezgu maqsadni anglab yetadi va asar voqealari matniga zargarona singdiradi. U kuylagan "Kelinoy" ("Norguloy") dostoni betakpop badiiyati bilan o'zbek xalq og'zaki ijodida munosib o'r'in tutadi.

To‘yning gashtida gavlak arnaga tushdi //



Adap – choponning yoqasidan etagigacha ichki chetiga tikiladigan ensiz gazlama.

Ashir-nashir – to‘kin-sochin.

Arna – ariq, sel o‘ygan jarlik.

Bet – tomon, taraf.

Boqon – argon yoki tayoq bilan tushirib ketilayotgan kelinning yo‘lini to‘sish. Kuyov tomondan hadya berilgach o‘tkazib yuboriladi.

Buvish – qiz-jivonlarga hurmat bildirish, ehtirom ko‘rsatish.

Burum – tuyulish, burilish.

Bujur – g‘adir-budur, cho‘tir.

Buyur – biqin.

Gavlak – sodda.

Gashti – so‘nggi, oxiri.

Gajir – o‘jar.

Gurpish – qo‘rqtishga harakat qilish.

Domana – hech narsa.

Do‘Ita – kichkina, kalta.

Do‘ngsal – do‘ng yer, kichkina tepalik.

Dirdav – ozg‘in.

Duzzi – yolg‘onchi, qasamxo‘r.

Jela – tuzoq.

Iq – shamol,sovuj tegmaydigan joy.

Irg‘alib – tentirab, gandiraklab.

Kavshandoz – uyning oyoq kiyim yechib qo‘yiladigan maxsus yeri, dahliz.

Kapsan – mo‘l hosildan beriladigan ulush.

Kashol – intizor, xavotirlanish.

Karmak – o‘rik, bodomcha tomirining qaynatmasi. Teri oshlashda ishlataladi.

Katik – idish chekkasining kemtikligi, siniq joyi.

Ushbu so‘zlar Boysun tuman shevasidan tuzildi.



**Kurshida
NISHONOVA**

Tushlarimdan *boshlanar ishqing...*

Sog'indim, jonioymi millarga tortib,
Izladim, nigohim nillarga tortib,
Umrimni cheki yo'q yillarga tortib,
sog'indim.

Xazonlar ko'klamga evrilib ketdi?
Muzlar olov bo'ldi ishqning zahmidan.
Yurak qarog'imdan to'kilib ketdi,
O'zni tobe qildim hijron vahmiga.

Sog'indim, sig'indi bo'ldim olamga,
Sog'indim, sig'masdan to'liblar qoldim.
Uzoq xayollaring aro telbavor,
O'zimda, O'zingda yo'qoldim.

Havo sovib, kuz eshik qoqdi,
Xurram esdi shabada yana.
Kuzning ilk tongi –
Atrofda...
G'urbatxona, rutubatxona.

Men qayta tug'ildim –
Labimda kulgu,
Ko'zimda muhabbat qilar tantana.
Yurak bo'm-bo'sh qoldi,
Dil sag'ir qoldi –
Ko'ngil – zulmatxona,
Jon – xilvatxona.



Mening suvratimda gulni ko'rdingmi?
 Yoki ishqqa tobe kulni ko'rdingmi?
 Kelsang, tikonomidan nashtar yasayman,
 Ketsang, imonimdan xanjar yasayman!

Chorlasang, chog'lanib borishim mumkin,
 Sog'insang, bog'lanib qolishim mumkin.
 Izn ber, bosh olib ketay umrbod,
 Qolsam – ko'nglim obod, hayotim barbod.

Men qulman, men qulman, qulday yashayman,
 Tushlaringga kirib hurga o'xshayman.
 Asli, suvratimda ko'rganing guldir,
 Siyratimga ingan ishqparast quldir!!!

Ishqni yo'qotib qo'ydi Majnunga yaqinlashgach,
 G'arazdan judo bo'ldim jununga yaqinlashgach.

Sinoat kishvarida asir etdi meni nafs,
 Nihoyat, erkin bo'ldim, tutqunga yaqinlashgach.

To'ndim-u mehr istab huzuriga yo'l oldim,
 Yondim, beomon yondim uchqunga yaqinlashgach.

Manam huv samolarni makon tutgan gul edim,
 Sevdim, gilga aylandim, afsunga yaqinlashgach.

Uzoq qidirdim seni, adashdim necha bora,
 Men seni topdimki, Unga yaqinlashgach.

Bu tan-u ruhimni, jono, ne qilay, sen suymasang,
 Zulmat erurki bu fano ne qilay sen suymasang.
 Boshida ham, ko'zida nam, ko'nglida g'amdin nishon,
 Yetti falak bo'ldi qaro ne qilay sen suymasang.
 Na xayoling, na nihoning, na visolingga yetib,
 Begona bo'lgan bu dunyo na qilay sen suymasang.
 Bu fanodan ketibon, baqo sari yuz tutib
 Topdim arosatdan panoh, ne qilay sen suymasang.
 G'ayr yoding ila bu kun jon qadar suysam seni,
 Xurshididan kechar Ollo ne qilay sen suymasang.

Kuyib ketdim

Qaro kokillarim taram edi, yorim,
 Xasta ko'nglim senga qaram edi, yorim.
 Yurakdag'i hislar alam edi, yorim,
 Alamlarni jon-jonimdan suyb ketdim.
 Ishq o'tida, ishq o'tida kuyib ketdim.

Kuygan dilim Haq yo'liga nisor bo'lgay,
 Sensiz dardim samo o'par "Hisor" bo'lgay.
 O, qalbim-a, qayg'ulardan bezor bo'lgay,
 Bedorlikda bezorlikdan to'yib ketdim.
 Ishq o'tida, ishq o'tida kuyib ketdim.

Umidimga qabr bo'ldi xayollarim,
 Osmonimda abr bo'ldi xayollarim,
 Kimlargadir sabr bo'ldi xayollarim,
 Bemorlikda chin orzuni tuyib ketdim.
 Ishq o'tida, ishq o'tida kuyib ketdim.

Zor yig'ladim, naysonlarga jon ulashib,
 O'lgim keldi lolalarga qon ulashib,
 Yashayapman yoronlarga shon ulashib,
 O'sha tentak hislarimni qo'yib ketdim.
 Ishq o'tida, ishq o'tida kuyib ketdim.

Bugun nochor yuragimni tilgim keldi,
 Ochunning cho'x aldonini bilgim keldi.
 Kulgitim keldi, o'z ustimdan kulgitim keldi,
 Ruhim ichra sevgi rasmini o'yib ketdim.
 Ishq o'tida, ishq o'tida kuyib ketdim.



**Nodirabegim
IBROHIMOVA**

Voz kechilgan kitoblar

(Hikoya)

*U*yqusiz tunlarimning birida eshik qattiq taqilladi. Ochganimda uning rang-ro'yi avvalgidek emasdi: ko'z osti salqigan, quyuq sochlari to'zg'igan, ko'k galstugi bo'ynidan bo'shatilgan, bir ahvol. Ikki yil avval o'ziga bino qo'ygan olifta yigitchaga solishtirganda yer-u osmoncha farq bor edi. Tanim muzlab qolgandek bo'ldi.

– Nega keldingiz? – salom o'rniغا savol berdim.

– Xayriyat, ko'chib ketmapsan, – u taklif kutmay ichkariga kirdi.

Uni haydar yuborgim kelmadi. Garchand necha marta uning ostonamga qaytib kelishini tasavvur qilgan va har safar eshikni tars yopib qo'yishni tilagan bo'lсамда, ixtiyorsiz ortidan oshxonaga kirdim.

– Tamaddi qilishga biror nima ber, – u muzlatkichni ochib razm soldi. Aftidan ko'ngildagidek narsa topolmadi, shekilli, qaytib yopdi. – Pastdagи do'kon ishlamayapti ekan. Uzr, quruq keldim.

Uning har gal to'lib-toshib kelgan kunlarini esladim. Albatta, gul ham bo'lardi. Men sevgan moychechaklar bilan kelardi.

– Men uyda ovqatlanmayman, – dedim rostini aytib.

– Bekorga ozib ketmapsanda, – qomatimga ko'z yogurtirib, stulga behol cho'kdi. – O'sha yerda ishlayapsanmi?

– Yo'q. Nashriyotdan ketdim. Yaxshi oylik to'laydigan xususiy firma topdim.

– Men ketganimdan so'ng ishlaging kelmaptida... – u stoldagi vazada turgan qizil olmani qo'liga oldi. – Erga tegmagan ko'rinasan?

Javob bergim kelmay deraza tomon yurdim. Qishloqqa – uyimizga kelayotgan, ishxonamga kelib surishtirib ketadigan sovchilar haqida o'yladim. Ularning birortasiga rozilik berishga qalbim to'la topshirganim – shu insonning xotiralari yo'l qo'ymasdi. Tashqarida yoz oqshomi hukm surar, to'qqizinchи qavatdan, ayniqsa, manzara go'zal ko'rindi. Bir vaqtlar bu yerda bayram kunlari ottiladigan mushaklarni birga kuzatar va yosh bola kabi zavqlanardik.

– Tegmagansan... – dedi u yonimga kelib yelkamga qo'lini qo'yarkan. – Meni kutgansan.

– Nega keldingiz? – savolimni takrorladim qo'lini yelkamdan tushirarkanman.

– Sensiz yozolmayapman. Biror satr ham, – u og'ir uh tortdi. – Oxirgi asarimni o'shanda birga ishlagan kezlarimiz yozgandim. Esingdam, peshma-pesh chiqqan kitoblarim... hammasi do'konlarda tez sotilib ketardi.

Miyig'imda kuldim. O'sha kitoblarni asosan men yozganimni, albatta, ikkimizdan boshqa birov bilmasdi. Birgalikda baxtli kunlarimiz u yozuvchi bo'lishni orzu qilishini ko'p aytardi. Bir nechta hikoyalari gazeta yuzini ko'rgan, ammo omma e'tiboriga tushmagandi. Men

nashriyotda ko'plab kitoblarni tahrir qilganim, shuningdek, bo'sh vaqtim kutubxonada o'tgani uchun adabiyotni yaxshi tushunar, ammo yozuvchilikka da'voyim yo'q edi. Ilk uchrashgan kunlarimiz unga xayolimga kelgan syujetlar, voqealarni so'zlab berishni yoqtirardim. U esa meni diqqat bilan tinglab, ertasiga oqqa ko'chirib kelardi. Ularni o'qib ko'nglim to'lmasdi. Keyin ustidan o'zim qayta yoza boshlardim. Bir necha kunda tayyor hikoyani qo'liga tutqazardim. U yosh boladek suyunib, tahririyat tomon chopardi. Zavqlanishini ko'rish menga yoqardi. Hikoyasi chiqqan jurnalni menga olib kelganida, mashqlarim uning nomidan e'lon qilinganidan suyunardim, chunki uni hamisha o'zimdan ham ortiq sevardim. Meni bag'riga bosib, qulog'imga hamisha birga bo'lamiz, birga yozamiz, birga o'lamiz, deb pichirlardi.



– Birga yozgan damlarimiz zo'r edi-da, – u xayollarimni sezgandek ko'zlarimga boqdi. – Ilk kitobim chiqqanida ham yonimda eding. O'zing nom tanlab berganding unga. Olgan qalam haqim-chi... Senga deb taqinchoq olib bergandim.

O'sha taqinchoq qutichamda anchadan beri tegilmay turardi. Adabiyotdan topgan birinchi va oxirgi buyumim sifatida. Keyingi qalam haqlarini u deyarli maishatga sarflab yubordi. Uch yillik yashirin hayotimiz davomida u adabiy olamda o'z o'miga ega yozuvchi bo'lib shakllandı. Galdagi asarini o'zi yoza oladi, deb hamisha ishonardim. Lekin ishtirokimsiz uddalay olmayotganini ko'rib, ish stoli yoniga kelar va sochlarni silab, uxbab olishi kerakligini, o'zim davom ettirishimni aytardim. Telbalarcha unga ishonganim, o'zimni topshirganim, birga yashaganim, tunlari uning uchun yozishim – hammasi hozir ahmoqlikdan boshqa narsa emasdek ko'rinardi.

– Men ham yozmay qo'ydim, – dedim unga tik boqib.

– Sizga bu oqshom biror nima yozib berishga istagim ham, vaqtim ham yo'q.

U menga norozi boqdi.

– To'g'risi, seni sog'indim. Kulgichlaringni, uzun sochlaringni, isingni... – yaqin kelib qo'limdan ushladi. – Unutmaganingni ko'zlarining sotib qo'ydi. Baribir mehr bilan boqadi ular menga. Ha, to'g'ri, aybdorman. Seni tashlab ketdim. Nomardlarcha. Uylanaman, deb so'zimda turmadim. Lekin mana... qaytdim baribir. Uloqib-ulоqib yoningga qaytdim.

U bilan o'tgan so'nggi oylarimni xotirladim. Uni xalqaro adabiy jurnalga ishga chaqirishdi. Nashriyotda yonma-yon xonalarda – u yordamchi muharrir, men musahhih bo'lib ko'p yillardan beri ishlab kelardik. U ketgach, nashriyot ham huvillab qolgandek bo'ldi. Zamонави uslubda ijod qiladigan yosh yozuvchi sifatida hamma tanirdi uni. Tadbirlar ketidan uchrashuvlar, telesuhbatlar, muloqotlar davom etardi. Xalqaro adabiy tanlovlarda men yozgan hikoyalar bilan g'olib bo'lib qaytarkan, butun ijod ahliga unga ishonch bildirardi. Uni faqat chetdan kuzatar, muvaffiyatlarini birga totmasdim. U obro'siga putur yetmasligi uchun munosabatlarimizni hamisha sir saqlashimni istardi. To'y qilsak, hammasi yaxshi bo'lishini o'ylab kutardim.

Bir kuni uni ishxonasiga izlab borganimda, bog'da bir qiz bilan quyuq suhbatlashib turganini ko'rdim. Yuragimdan nimadir uzilgandek bo'ldi-yu, jum ortimga qaytdim. Undan izoh so'rashni istamadim. O'zi tashkil qilgan shoiralarning to'garagiga bosh bo'lib yurishini bilganim uchun o'tkinchi hissiyot ekaniga o'zimni ishontirdim.

Ammo ayol ruhan sezadi. Undan zerikkanlarini, istamay qolganlarini qalbi bilan anglaydi. Men ham uning o'zimdan uzoqlashib ketayotganini bilib turardim. Yonimga kelmas, kelsa ham telefonidan ortmasdi. Miyig'ida jilmayib ijodkor do'stlari bilan xabar yozishib o'tirganida, uni yo'qotmaslik uchun galdeg'i qissani tugallash bilan band bo'lardim.

Nashriyotda ham tahrirdan ortgan bo'sh vaqtim uning yangi kitoblarini nashrga tayyorlash bilan o'tar, ammo avvalgi quvonch yo'q, dilim juda g'ash tortgandi. Ikkimizning adabiy olamimizda u meni yolg'iz tashlab, nom taratgan adibalar, yozuvchilar, shoira qizlar davrasiga intilardi. Ijtimoiy tarmoqlarda uning shunday davralarda mag'rurona turgan suratini ko'rib, rashkim kuchayib borardi. Oxiri portladim.

Bir kuni uyg'a kelishi bilan qarshisida taom emas, talab qo'ydim. Yo meni, yo ularni tanlashini so'radim.

– Sen... ijodiy muhitni tushunmaysan, baribir. Men adabiyotga daxldor odamman, do'st-u yorlarimdan voz kechmayman, – dedi.

Yangi chiqqan kitobini tap etib stolga qo'ydi-da, eshikni yopib chiqib ketdi. Bir hafta sog'inish bilan qiynalib o'tdi kunlarim. Uni adabiy muhitdan tortib olib, faqat o'zim bilan qolishini talab qilishim xudbinlik ekanini angladim. Ishxonasiga bordim: yo'q ekan. So'ng ijara uyiga izlab bordim. Eshikni u doim hamkasbim deb ataydigan bir ayol ochdi. Ortidan tugmalarini qadagancha u ko'rindi.

...Sochlarimni silayotgan iliq qo'llar taftidan sehrlanib ko'zlarimni bir zum yumdim. Qalbim ilidi.

– Ha, tan olaman. Sengacha va sendan keyin ham hayotimda ko'pchilik bo'lgan. Lekin... yagona muhabbatim sen ekansan. Buni anglab yetishim bilan yoningga chopib keldim. Ha, yugurib... Ishxonamdan piyoda keldim, senga yetish yo'lidagi mashaqqatni anglash uchun.

Gazga choy qo'ydim. Ovqatga unnay boshladim. U esa mehmonxonaga o'tdi. To'g'ri kitob javonim sari yurganini taxmin qildim.

Kitoblarning varaqlanayotgani eshitildi. Eng tepada uning kitoblari tizilib turardi. Necha marta hammasini yig'ishtirib tashlamoqchi bo'lganman. Lekin kitoblarga mehrim baland edi. Har biriga yurak qo'rim singgandi.

Ovqatning tagini past qilib dimlab, yoniga kirdim. Divanda o'y surib o'tirardi. Meni ko'rib yuzi yorishdi.

– Kel, o'tir... Adabiy muhit juda zerikarli bo'p qoldi. Nashriyot bilan ham hamkorligimiz yo'qoldi. Ishxonam berayotgan yangi uylardan xarid qilgandim, kreditga. Ijarada sarson yurishdan charchadim. Shuni boshlang'ich to'lovini to'lay deb nashriyotdan tarixiy roman uchun buyurtma oldim. Qalam haqining yarmini oldindan to'lashdi. Endi shu desang, romanni topshirish uchun ikki oy vaqtim qoldi.

– Kim haqida yozayapsiz, mavzusi nima? – anchadan beri yozmay qo'yanim uchun beixtiyor qiziqib so'radim.

– Ikkinchisi jahon urushi yillarida front ortidagi o'zbeklar hayotini. Bosh qahramon yigitning otasi urushga ketadi, onasi esa rais bilan haligindek... Keyin otasi qaytib boshqasiga uylanadi. Yana ko'p voqealarni qo'shyapman.

– Ikki eshik orasi"ga o'xshab qolmayaptimi ishqilib?

– Shunaqami? – u xijolat bo'lgandek peshonasini qashladi. – O'tkir Hoshimov asarlarini o'qib katta bo'lganmizda... balkim. Yoki urushdan qochgan yigit haqida yozsammi?

– Said Ahmadni ham ko'p o'qigansiz, – dedim kulgim qistab.

– O'zing biror syujet bersang-chi, azizim... Sen syujetlar konisan-ku. Meni ilhom farishtamsan. Ko'rding, sensiz ahvolimni...

Ha, ikki yil davomida uning jurnallarda biror hikoyasini ham, do'konlarda yangi kitobini ham ko'rmagandim.

– O'y lab ko'raman... Urush – o'lmas mavzu. Tabiy syujet topish kerak.

– Ikki oy ichida yoza olasan-a? Senga ishonaman. Har kuni ishdan so'ng yoningga kelaman, yana birga yashaymiz.

Bu gapdan negadir xursand bo'lmadim.

- Ikki oydan so'ng-chi?
- Keyin ham... yana buyurtmalar olaman.

Birga yozaveramiz. Bir umr.

- Kreditni yopgach, yangi uyingizga ketasizmi? Kim bilan yashaysiz u yerda? – so'radim istehzo bilan.

U og'ir uh tortdi.

– Bilasanmi, jonim... qishloqda ota-onam qo'ymayapti uylan deb. Qo'shnimizning qiziga menden so'ramay fotiha ham qilib qo'yishibdi. Kuzda to'y. Sendan buni yashirmoqchi emasman. U ota-onamni yonida xizmatini qilib yuraveradi, sen esa...

- O'ynashim bo'lsan, deb qo'ya qoling.
- Yo'g'e, sevgilim, mahbubamsan-u...

Ichimda umid bilan kutganim – "o'z uymiga olib ketaman, to'y qilamiz, rafiqam bo'lsan, bir umr birga ijod qilamiz", degan so'zlar uning tilidan yangramadi. O'rnimdan turib kitob javonimdan uning kitoblarini yig'ishtira boshladim.

- Iltimos, shularni o'zingiz bilan ola keting.
- Lekin... nega, hayotim, u bizning birlgiligidagi asarlarimiz-ku, biz ularning ota-onasimiz, axir!

– Boshqa kitob tug'ishni istamayman! – kutilmaganda yig'lab yubordim. – Men oila qurishni, sizdan farzandlar ko'rishni, ularni birga tarbiyalashni orzu qillardim! Ha, faqatgina orzu! Amalga oshmas orzular... Institutni qanday toza niyatlar bilan bitirgan edim-a? Nashriyotga ishga olishganida ota-onamga yuzingizni yorug' qilaman deb poytaxtda qolishga arang ko'ndirgandim-a? Siz dugonalarimdan ajratib olib shu kvartirani topganingizda ham tez orada sovchi yuborishingizga go'ldek ishongan edim-a? Uyqusiz tunlar sizning asarlariningizni yozayotganda bir umr yonimda bo'lishingizga ishongandim-a? Ha, abadiy muhabbatga ishongandim... judayam ishongandim. Shunchalar ishondimki, o'zimni topshirdim... Vijdon azobida qoldim meni oq yuvib-oqtaraganlar oldida. Yozgan hikoyalarmi kabi oxiri hammasi baxtli yakun topishiga amin edim... Ammo siz men tasvirlagan qahramonlarga sira o'xshamadingiz. Ulardek mard, sadoqatli,

mehribon chiqmadingiz. Orzular o'sha kitoblarda qolib ketdi. Hayotda aksiga duch keldim: aldandim. Hamma hurmat qilib ardoqlaydigan aziz yozuvchim meni tashlab ketdi.

Shalviragancha cho'kdum. Endi ko'zlarimdan yosh oqmasdi. Nazarimda, ular teskari oqar: ichimga, yuragimga tomardi. Qalbim og'irlashib ketdi. Zildek...

Asta yonimga kelib yelkamga qo'lini bosdi. Endi ular sovuq tuyulardi.

– Keting! – dedim ko'zlariga tik qarab.

– Menden voz kecholmaysan, azizim...

sevasan-ku axir. Ikki yilki, shu yerda kutgansan meni. Kitoblarimiz bilan dardlashib. Endi senga... kim uylanardi, axir, o'ylab ko'r. Xullas... asarni yoza boshlagach qo'ng'iroq qil. Darhol yetib kelaman. Meni yo'qotsang hech kiming qolmaydi.

U peshonamdan asta o'pib qo'ydi. So'ng stolga vizitkasini qo'yib, indamay chiqib ketdi.

Kitoblar sochilib yotgan gilamda uzoq vaqt sassiz, qimir etmay yotdim. Bolaligimda qo'g'irchoq ushlagancha unga alla aytganlarimni, o'smirlik paytlarim oq otdagi shahzodam o'z qasriga olib ketishi haqdagi xayollarimni, talaba bo'lgach, eng zo'r noshir bo'lish haqidagi maqsadlarimni esladim. Ikki yilki, ko'nglimda biror orzu ham, tilak ham yo'q. Faqat kun kechirardim. Yashamasdim. Ehtimol... uni intizor bo'lib kutardim.

Qachon uxbab qolganimni bilmayman. Uyg'organimda quyosh nurlari xonani yoritar, bugun ham kun qattiq qizishidan darak berib turardi. O'rnimdan turishim bilan nihoyat, qat'iy ishonch bilan tashqariga chiqdim. Gazeta shoxobchasidan e'lonlar ro'znomasini olib, ijaraga uy izlay boshladim...

Ship-shiydam qilib bo'shatilgan xonadon kalitini egasiga topshirarkanman, umrimning besh yili o'tgan uyga so'nggi bor nazar soldim.

– Polda kitoblar uyulib turibdi, – dedi ichkarini ko'zdan kechirgan xonadon egasi. – Unutibsiz, chog'i.

– Ulardan voz kechdim, – dedim jilmayib. – Endi o'z kitoblarimni yozaman. Faqat o'zimni kini!

IJOD OLAMIGA ONLAYN SAYOHAT



Har yili ayni jazirama kunlari Zomin tog'larida – so'lim O'rliklisoymda yosh ijodkorlarning ovozlari yangrardi.

Ne tongki, insoniyat boshiga ko'p tashvishlarni keltirgan pandemiya hayot tarzimizga, mo'ljaldagi ezgu ishlarimizga ham o'z tasirini ko'rsatdi.

Shu bois bu yil yosh ijodkorlarning Zomin seminari onlayn tarzda "Zomin qaldirg'och"lari nomi bilan tashkil etildi. Vaziyat qanchalik mushkul bo'lmasin, karantin qoidalariga rioya etgan holda seminar tashkil etildi.

Seminar Adiblar xiyobonida Alisher Navoiy haykali poyiga gul qo'yish bilan boshlandi.

Onlayn tarzda tashkil etilgan seminarning ochilish marosimida taniqli shoir-yozuvchilar, davlat va jamoat tashkilotlari vakillari ishtirok etdi.

Unda O'zbekiston Yozuvchilar uyushmasi raisi, xalq shoiri Sirojiddin Sayyid so'zga chiqib, yurtimizda adabiyotga qaratilayotgan katta e'tibor, yosh ijodkorlarga ko'rsatilayotgan rag'bat va g'amxo'lik haqida to'xtaldi.

Marosimda Jizzax viloyati hokimi Ergash Soliyev, O'zbekiston xalq shoiri Usmon Azim va boshqalar ham Zomin seminari bir necha yillardan buyon iste'dodli yoshlarni kashf qilib kelayotgani haqida fikr-mulohazalarini bildirib, yoshlarga seminarda muvaffaqiyatli ishtirok etishini tiladilar.

Yoshlar anjumaniga Qoraqalpog'iston Respublikasi, Toshkent shahri va barcha viloyatlardan 58 nafar hamda Markaziy Osiyo davlatlaridan 12 nafar yosh ijodkor ishtirok etdi.

Dasturga muvofiq, yosh ijodkorlar alohida sho'balarga bo'lingan holda nazm, nasr, badiiy tarjima va badiiy publisistika yo'nalishlari bo'yicha mashg'ulotlar tashkil etildi.

Mashg'ulotlarga yigirmadan oshiq taniqli ijodkor, adabiyotshunos olimlardan iborat ishchi guruh a'zolari qatnashchilarning asarlarini saralab, onlayn mahorat saboqlari o'tdi.

Ustozlar e'tirof etgan bir necha yoshlarni mashqlarini "Qaldirg'och" ruknida jurnalxonlar hukmiga havola etyapmiz.





**Shahzod
ERGASHALIYEV**

Nfggqa tutash yo'l

(Hikoya)

Mashina tuproq yo'l bo'ylab asta yo'rg'alab boradi. G'ildiraklar har gal chuqurga tushganda ohista silkinib qo'yar, men esa oynadan mo'ralagancha uning tirqichidan kirayotgan kechagina yog'gan yomg'ir hidi aralash namxush tuproq iforidan to'yib-to'yib nafas olaman. Dadam menga old oynadan goh-goh ko'z tashlaydi, o'zim buni sezib tursam ham parvo qilmayman. To'g'ri, men dadamni yaxshi ko'raman, lekin bobom ham mening bobom-da! Uning ko'ksiga tushgan oqimti soqoli, tuki uzun, qalin qoshlari va hatto nursiz, ammo mehr to'la boqadigan ko'zlari ham o'ziga shunday yarashib turadi-ki, hech o'ylanmay: "Bu mening, o'zimning bobom!" deb butun olamga jar solging keladi.

O'zi bu yerga kelganimga unchalik ko'p bo'lмаган, та'til vaqtida qishloqda havo almashtirib kelasan deb, dadam tashlab ketgandi. Endi esa qaytib ketyapmiz, ketyapmiz-u, mening yarim ko'nglim bobom va buvim bilan shu yerda – bepayon dalalarda qolib ketayotgandek tuyulmoqda. Yaxshi insonlarning umri qisqa bo'ladi, deyishadi. Yo'q, ular bilan vaqt qanday o'tganini bilmay qolarkansan, xolos. Bu yerda ikki oy yashagan bo'lsam ham, ikki kun o'tgandek tuyuldi men uchun. Shuncha vaqt qanday o'tdi, qachon bunga ulgurdi – sezmay ham qoldim.

Yurak-yuragim bilan o'sha dag'al, ammo tafti iliq qo'llarga, buvimming ro'moli ostidan ozgina

chiqib turadigan oq sochlaridagi qatiq hidiga bog'lanib qolgan ekanman. Menimcha, ular ham meni yaxshi ko'rishadi. Bo'lmasa, darvoza yonida qo'llarini duoga ochgancha ortimizdan termilib qolisharmidi.

* * *

Oyim to'g'ri aytgan ekan. Bo'yim ancha cho'zilib, har narsaga aqlim yetib qolgan ko'rindi. Axir, men ham yosh bola emas, beshinchi "A"da o'qiydigan Sarvar bo'laman! Shu paytgacha har gal qishloqqa kelganimda ko'p narsaga e'tibor bermas ekanman. Bu safar ba'zilarini anglab yetgandek bo'ldim. Odamlar baxt qidirib butun borliqni baland binolar to'sib qo'yan shaharlarga ketib qolishadi. Ammo aslida haqiqiy mo'jizadan quruq qolayotganliklarini o'zлari ham sezishmaydi. Hech chegarasini ko'z ilg'amaydigan biror bepayon yaylovdan turib quyosh botishini tomosha qilganmisiz? Yoki tong qorong'usida uyg'onib, baland bir tepalikda o'tirgancha cheksizlikda qoramtr tusda ko'rini turgan viqorli tog'lar bag'ridagi alvon lolaqizg'aldoqlarning

nafis barglarini siypalashga mehr bilan oshiqayotgan quyoshning ko'tarilishini-chi? Yo'q-yo'q, siz buni qayerdan ham bilardingiz. Axir, o'sha ajib mo'jiza – yashil o'tloqlar ustiga yotqizilgan uzun asfalt yo'llar ustidan g'izillab o'tayotgan temir aravalardan boshqasi ko'rinnmaydi-ku sizga. Quyosh botishini esa hech qachon ko'ra olmaysiz! Atrofga alanglaysiz-u, har tomoningizdan qurshab turgan baland imoratlarga ko'zingiz qadalaveradi. Balki uni kinoda ko'rgandirsiz? Lekin unisi haqiqat emas. Bobom aytgan edi, kinolarda quyosh chiqishini botishi o'rnida suratga olishar ekan. Nega deganda shomga yaqin atrof qorong'ulashadi, osmon qizaradi. Bu holni qandaydir kameralar ilg'ay olmaydi, uni faqat o'z ko'zingiz bilan ko'ribgina his qila olasiz. Men buni bir necha bor sinab ko'rdim. O'sha vaqtida qulog'ingiz ostida qandaydir ajib kuy yangray boshlaydi va negadir jilmayasiz. Ko'z oldingizda esa qadim tarixning buyuk siymolari bir-bir gavdalana boshlaydi. Dovrug'i dunyoni titratgan mardlarning g'urur-iftixor to'la hayqirqilari-yu, olg'a boshlashlaridan so'ng, dengizdek mayjlanib turgan minglab askarlarning shon-u sharafga burkangan qiyqiriqlari quloqqa chalingandek tuyuladi. Ana shunda siz ham beixtiyor o'mingizdan turasiz-da, vatan uchun jonini tikkan o'g'londardek yuragingiz faxr, sadoqat kabi tuyg'ularga to'lib, hayqirib yuborganingizni sezmay qolasiz. Xo'sh, o'sha tog'lar ortida – siz yashayotgan makonlarda ham shundaymi? Agar javobingiz "ha"



bo'lsa, siz baxtli ekansiz!

Tuproq yo'l ufqqa
tomon uzayib boradi.
Mashina hamon chayqala-
chayqala ildamlaydi.

Men esa oynadan
boshimni chiqarib, ortga
qarayman. Uzoqda, darvoza
yonidagi bahaybat o'rik
tagida bobom hamon
qorayib ko'rindi.

– Bo'ldi, oynani yop
Sarvar, – deydi dadam
yo'ldan ko'z uzmay.

Men tag'in parvo
qilmayman.

– Chang kiradi
yopsang-chi!

Sekin ichkari
kiraman-u, aytganini
qilaman. Asl chang, asl
g'ubor insonning qalbida
bo'lmaydimi? Axir Alloh
hammani shu tuproqdan
yaratmadimi? Shunday
ekan, nega inson o'zligidan
hazar qiladi? Haqiqiy inson
egniga chang yuqishidan
cho'chib, bir chetda
iymanib turgan oliftami,

yoki tuproqni jondek sevib, undan qochmagan, peshonasidan tirqirab ter oqqanda rohat oladigan dehqonmi? Shu tob negadir bobom ko'z oldimga keladi.

U bir chekkaga muk tushgancha, doim beliga osib yuradigan burama sopli Chust pichog'ini hafsalala bilan qayrab, menga hikoyaga o'xshash narsa aytib o'tirardi:

– Bir kishiga jannat eshiklari ochib qo'yilibdi. Qarasa, u yerda barcha narsa muhayyo ekan. So'lim bog'lar, zilol suvlari, eng shirin mevalar, qo'ying-ki, nima istasa, hammasini topibdi. Shunda ham Alloh "Ko'ngling nima tusaydi?" deb so'rabdi. – Bobom shu joyiga kelganda negadir to'xtadi-da, menga tikilib qaradi. Uning gaplarini jon qulog'im bilan tinglab o'tirganimni ko'rgach, tag'in o'sha ohangda davom etdi. – Boyagi kishi o'ylab o'tirmay Tangridan yer so'rabdi.

– Yerni nima qiladi? – dedim bu hikoyani bobomning o'zidan yuz martalab eshitgan bo'lsam ham qiziqib.

– Nima qillardi, dehqonchilik qiladi, ekin ekadi-da!

– Axir, hamma narsa muhayyo edi dedingiz-ku, tayyorini so'ray qolmaydimi?

Bobom negadir jim qoldi. Boshidan do'ppisini olib, tomirlari bo'rtib chiqqan chillakdek ingichka qo'llari bilan tepakal boshini erinmay siladi.

– O'z mehnating bilan erishganing boshqacha bo'ladi baribir. Bir kun kelib, mehnatlaring samarasidan birov bahramand bo'lib, haqqingga duo qilishidan ortiq baxt bor ekanmi?!

– Unday bo'lsa, o'zingiz nimani so'raysiz Allohdan?

– Qaydam, – bobom kului, – o'sha kunlarga yetkazsin hammamizni. Alloh rahmdil, mehribon.

Bir chekkada guruch terib o'tirgan buvum gapga aralashdi:

– Bobong ham o'sha kishiga o'xshab, dehqoncholik qilaman deydi bolam, – u burni

uchiga qo'ndirib olgan qalin oynali ko'zoynagi ustidan bobomga zimdan ko'z tashlab qo'ydi. – Bu kishiga ham bundan ortiq baxt yo'q.

Men bobom nega shu yoshga kirsa ham, amakimning hay-haylashiga qaramay, o'zini o'qqa ham, cho'qqa ham uraverishini endi tushunib yetgandek bo'ldim.

* * *

Bilmayman, hozir siz qayerdadir bekam-u ko'st yashayotgandirsiz. Ammo yaxshilab o'ylab ko'ring, hamma narsangiz yetarlimi? Balki kechalari tinchlik bermay qandaydir kuch uyg'otib yuborar? Balki uzoq vaqtadan beri ko'nglingiz nega xotirjam bo'lmayotganini o'ylab yurgandirsiz? Agar sizda zarracha yurak bo'lsa, bu – vatan sog'inchi ekanini sezasiz. Bir yerda tug'ildingmi, tamom, umring oxirigacha qayerda bo'lsang ham yuraging o'sha bir qarich tuproqqa – vataningga talpinaveradi. Mening ham kindigim shu yerda kesilgani uchun bepayon yalangliklarga, so'lim qishloqqa bir narsa bog'lab turadi. Esimni tanib, shaharda o'sayotgan bo'lsam ham, faxr-iftixorga to'lib, "Men qishloq farzandiman, tomirimda dehqon qoni oqmoqda!" degim keladi.

Bularning hammasi ham bobomdan eshitganlarim emas. Ularni o'zim, mana shu urib turgan yuragim bilan his qildim. Shuni tushunib yetdim-ki, hayotda kibrga berilib, mol-u davlatga aldanmasdan yashaganlar baxtli ekan. Inson qancha boy bo'lsa, ko'zi shuncha och bo'lib boraverarkan. Qozoni qaynagan tunni bayram qiladigan kambag'al esa, ozgina narsaga ham qanoat qilib, tinchtotuv umr kechirarkan. Axir, eng kerak narsa ham shu emasmi?..

* * *

Bobomning qo'llaridek dag'al, ammo qadrdon yo'llar allaqachon ortimizda qolib ketdi. Endi mashina ortiq silkinmas, bir qarashda nihoyasini ko'rib bo'lmaydigan ufqqa tutash yo'lda shamoldek yelib borardi...



Farrux HASANOV



Har lahzani qo'ydim muzlatib...

Sabr

so'z bitadi ko'zlarimga ishq
xotirotdan to'rlab yosuman
xayolimga botiradi tish
sen bor tushlar ichra osuda

kechar umrim bargdek asabiy
cho'kib tushar ruhim toliqqan
umidsizlik bir osiy kabi
chiqib qolar yomonotliqqa

ne istig'for qutqarur oxir
qay shaklda bo'ladi tuzoq
urug' bersa bepusht xavotir

duoga to'ldirib qo'limni
faqat joiz bo'lar yukunmoq
faqat eslash mumkin o'limni

Har lahzani qo'ydim muzlatib,
Tutib qoldim esgan shamolni.
Qaddim keyin bukilmasin deb,
O'lib ko'rdim yashashdan oldin.

Armonlarga orzular Masih,
Armon esa ko'ngilga jallod.
Meni biroz yupataman deb,
Yuragimdan urdi bu hayot.

Men yashagan ming yillik umrim –
Hayotimning birinchi jildi.
Kecha kelgan minginchi bahor
Ko'zyoshimdan sumalak qildi.

Boychechakdan baxt yasab oldim,
Xayollarim bir ivirsigan.
Ming alamim yubordim qamab
Tamakining tor qutisiga.

Yosh boladay kuldim, so'kindim,
Yurakda yo'q zarracha g'ubor.
Dard tugamas, shoshib ne qildim,
Axir, menda yana ming yil bor...

Muhabbat

yo'llari aldoqli...



Iqbol YUSUF

Aldashdi

Yulduzlarni alqadim,
Bag'rimga o't qalashdi.
Bilmam, kimni aldadam,
Hislar meni aldashdi.

Chuvalashib ketdi yo'l,
Na osmonga yetdi qo'l.
To'g'ri yo'ldan, ehtimol –
Izlar meni aldashdi.

Kurashganda haq edim,
Tog'lar edi raqibim.
Eng ishongan, haqiqiy –
Do'stlar meni aldashdi.

Gul g'unchalab kaftimda,
Muz erirdi taftimdan.
Ayni olov vaqtimda...
Muzlar meni aldashdi.

Kulgularim aridi,
Gulni kutib qaridim...
Bahorimda baribir,
Kuzlar meni aldashdi.

Menda shodlik zum bo'ldi,
Sevgi degan shum bo'ldi.
Axir endi kim bo'ldim?
Qizlar meni aldashdi...

Sog'inib kelasiz

Dunyoning ustidan kulaman,
Siz esa holimga kulasiz.
Men shuni aniqroq bilaman,
Qachondir sog'inib kelasiz.

Muhabbat yo'llari aldoqli,
Goh azob, gohida ardoqli.
Meningdek oshiqlar sanoqli...
Qachondir sog'inib kelasiz.

Qarang-a, taqdirning chiroyin,
Hattoki qahringiz muloyim,
Ko'nglingiz yumshatsa Xudoyim,
Qachondir sog'inib kelasiz.

Haliyam olovman, sho'xman men,
Yurakka teguvchi o'qman men,
Kuydirib o'taman – cho'g'man men,
Qachondir sog'inib kelasiz.

Ungacha quchasiz xayolni,
Sochingiz silagan shamolni.
Telbadek yoqtirib Iqbolni,
Qachondir sog'inib kelasiz.



**Tursunoy
ASHURALIYEVA**



**Gulhayo
O'RALOVA**

* * *

Ko'zingizga qarab to'ymasman,
Izingizda ismim yozilgan,
Nafasingiz aytib turibdi,
Yuragingiz meni sog'ingan...
Qaramaysiz ...
Nimaga jimsiz?!
Qasamlarim ichilgay qasddan,
O'ylamangiz,
Gulibeordek
dunyoning bir matohimasman...
Axir umr soniyalarning
Tilagidan sachragan o'tdir,
Sizsiz ming yil jaranglaydigan,
qadahlarning keragi yo'qdir...
Sizdan yiroq ketmog'im mumkin,
Balki lola termog'im dushvor,
Gulni hayot bog'idan erta
yoki indin uzib ketar qor...
Menga hadya eting bir dunyo
Unda alla aytsin rayhonqiz!
Uyqumizni o'chirsin ko'zdan
Sahargacha qiqirlab yalpiz...
Yashirasiz.
Tomirlaringiz
Ichida ko'p qaynagan o'tni,
Axir sevgi gunohimizmas,
Axir Sevgi Xudoning hukmi!

* * *

Uning ismi – Osmon,
Ko'plar nazdida.
Qarog'in qoraytar oydan yorug' tun.
Jismin bezab turar kibor qiyofa.
Biroq
mag'rur nigohida ko'rinib turar,
Ko'zi sahrosida qaqratotgan mung.

Ko'ngliga qo'l solar majnun shamollar,
U-chi?
Qalbin o'rар otash shafaqqa.
Pokiza Ishq so'rар Parvardigordan,
Xayol ranglarini o'raydi oqqa.

Unga havaslanib tikiladi tong,
So'rар: "Yuzlaringni chayadimi sut?"
Uni esa qynar tobora qattiq
Ong-u shuuriga sanchilgan sukut.

Tuproqning sog'inchi yashaydi, shaksiz,
Ko'nglining ming bitta hujayrasida.
Shundanmi, kibor va mag'rur nigohi
Mavjlanib turadi mung daryosida..

Uning ko'ngli – osmon,
Ko'plar nazdida...



**Nurmuhammad
ABDUZOIROV**

Yomg'ir haqida qo'shiq

*Yomg'ir – vujudingda uyg'onar titroq,
Yodingga quyilar olis xotira.
Shunday go'zal kunda yomg'irdan chetroq
O'zligingdan ketging kelmaydi sira...*

*Samoga boqasan yoyib quloching,
Unutib ming yillik alamlarni-da.
Yuzlaringdan o'pib, silabon soching
Marjonlar ezilar qadamlaringda.*

*Ko'zingdan sirg'alar tomchi-tomchi yosh,
Olamga hayqiriq solgung tiz cho'kib.
Yomg'irlar ko'ksiga qo'yging kelar bosh,
Yomg'irlar singari ko'z yoshing to'kib...*

*Yomg'irlar ostida ma'yus va g'amgin,
Kimmadir kutgaysan sog'inib, ilhaq.
Qaragin, yomg'irlar yig'lasa hamki,
Tovushida yangrar kulgu va chaq-chaq.*

*Sen o'zga muhitdan izlama panoh,
Kuylagin yomg'irga sherikligingni.
Axir faqat o'sha yomg'irlar goh-goh
Yodingga soladi tirikligingni...*

Yomg'irlar ko'ksiga qo'yging kelar bosh

Baribir

*Menga to'rt fasl ham farqsizdir butkul,
Menga begonadir qonun va mezon.
Xohlasam, kuz chog'i yozib qo'yib gul,
Xohlasam, bahorda bo'laman xazon...
Men shunday devona, hayoti hazin,
Sog'inish, sevishdan yot tashvishim yo'q.
O'zganing men bilan ishi bo'lmasin,
O'zgalar bilan-da mening ishim yo'q...
Men uchun dunyoni suv bossa ne g'am,
Barchasi bir bo'lib zo'r kelmaydimi...
Ming asr ichinda to'lmanagan bir kam,
Suv bilan bo'lsa ham bir to'lmaydimi!
Hurlarning labida tutgan bolidan,
Lazzat topolmagan inson – haykaldir.
Kimlarning ayshi-yu gul visolidan,
Kimningdir hijroni menga afzaldir.
Bor-u yo'qligini unutgan tushkun
Darveshlar tengiman, ulardan-da xor.
Baribir bu hayot oddiy bir tush-ku,
Xudojon, kel meni uyg'otib yubor!*

* * *

*Yovqur jangchi bo'lmoqchi edim,
Yog'iylar ko'ksiga tig' urgan askar.
Telbalikka, mardlikka moyil,
Yuragim qaqlashar...
O, Najmiddin Kubrolar yonib,
Jonin fido aylagan paytda –
Tug'ilgan bo'lsaydim, yov ko'ksin yorib,
Haydab chiqarardim Vatandan.
Topilmaydi durustroq g'anim,
Yig'layman, ishlabon qo'l uchi bilan
Alam qilar piyoz to'g'rayotganim
Amir Temur qilichi bilan...*



**Gulbahrom
XO'SHAYEVA,**
uyg'ur yozuvchisi

ALVIDO, MENING BAHORIM

(*Hikoya*)

*E*rtalab, bekatda avtobus kutib qolganim uchun ishxonaga biroz kechikib keldim. Saidjon hali kelmagan ekan. Xonamga kirishim bilan eshikni kimdir taqillatdi.

Xonaga kirib kelgan qizni ko'rib, negadir yuragim jimirlab ketdi. Chunki u juda ham Bahorgulga o'xshar edi. Bahorgulnikiga o'xshaydigan katta, chiroyli ko'zlar, qop-qora quyuq qosh-kipriklar, oppoq tiniq yuz... "Tavba, shunchalik ham onasiga o'xshaydimi? Uni ilk marta ko'rmaganimga ham mana ikki yil bo'libdi. Bu arada u bo'y yetib yanada go'zallashibdi...", deb xayolimdan o'tkazdim.

– Kechirasiz, dadam biror joyga chiqqanmidi, – dedi qiz salomlashgandan so'ng biroz o'zini noqulay sezib.

– Keling, qizim, Saidjon hali kelmadi. Kutib turing, kelib qolar, – deb kursiga o'tirishni taklif etdim. Bu Saidjonning qizi – Muqaddas. Yuzidan g'amginlik, ko'zlarida yosh qalqib turgan qizni ularning oilasidagi qayg'uli kunda, to's-to'polonda ko'rgan edim. Hozir shu onda, uning miskin ko'nglini olish uchun biror so'z topa olmay ovoraman.

– Shoshilayotgan edim. Qahhorni maktabiga olib borishim kerak... Dadam ertalab uydan chiqib ketgan edi. Ishga ketganmikan deb o'ylagandim...

– Biroz kuting, hozir kelib qolar. Biror narsa kerakmidi, Muqaddas? Balki yordamim tegar?

– Yo'q, rahmat. Onamning hujatlari orasidan manavi xatni topib olgan edim, – uning qo'llari titrab, sumkasidan qalin xatjild chiqardi. – Dadamga yozgan ekan... Kechga qadar sabrim chidamay, olib kelgandim...

Uning ovozi har bir so'zni aytganda titradi. Hozir uni yupataman deb yig'latishi tayin edi. U xatni menga uzatgan chog'da ko'zlaridan yosh qalqidi. "Essiz, mana shu norasidaning dard-alamga ko'milib ketganligini! Ey Rabbim, shu qizga rahming kelsa bo'lmasmidt!" Yurak-bag'rim ezilib, titroq bosdi-yu, lekin o'zimni zo'r-bazo'r tutib: – Muqaddas, qo'ying, yig'lamang. O'zingizni urintirib qo'yasiz. Dadangizni, ukangizni ehtiyot qiling. Sizni bu holda ko'rib, dadangiz ham betob bo'lib qolsa, nima qilasiz? – deb ko'z yoshini artib qo'ydim.

U cho'chigandek darhol menga qaradi. Ehtimol, dadasingin betob bo'lib qolishidan qo'rqiб ketgan bo'lishi mumkin. Muqaddas yuz-ko'zini artib, o'rnidan turdi-da:

– Opajon, mana shu xatni dadamdan ilgari o'qib qoldim. U meni kechirar. Onamning so'nggi xatini qo'limga olib, uni o'qimasdan turolmadim. Iltimos, siz ham o'qib chiqing.

Ehtimol, dadamga hozircha ko'rsatmay turarmiz.

– Mayli, Muqaddas, men xatni o'qib ko'ray, lozim bo'lsa, keyinroq berarmiz, – dedim uni kuzata turib.

Muqaddasning gapidan so'ng xatni o'qishni ham, Saidjonga berishni ham, bermaslikni ham bilmasdum. Onasidan ayirlgan qizning g'amgin qiyofasi, dadasidan xavotirlanishi mening ham qalbimni ezdi. Men yaxshi bilgan bu oila boshiga tushgan og'ir kunlar ko'z oldimdan birma-bir o'ta boshladi.

* * *

Bu idoraga kelgan dastlabki yilim Saidjon shu bo'limda ishlar edi. U paytlarda Muqaddas hali 4-5 yashar qizaloq edi.

Bahorgul Muqaddasni yetaklab tez-tez bizning yonimizga kirib kelardi. Baland bo'yli, ozg'indan kelgan, iliq tabassumli go'zal ayol bilan til topishib qoldik. U juda oqko'ngil, kamtarin, mehribon va mehmondo'st edi.

– Siz qanday baxtli inson ekansiz, Saidjon. Bahorguldek qizning boshini aylantirib olibsiz, – deb ba'zida hazillashib turar edim.

– Siz ham shunday deyapsizmi? Menga yaxshiroq qarang. Men o'zim shunday kelishgan yigit bo'la turib, Bahorgulning qo'liga qanday qilib tushib qoldim, deb hayron bo'lib yuraman, – deb u ham hazilimga hazil bilan javob qaytarar edi. Haqiqatda esa ular uzukka ko'z qo'ygandek mos edi. Keyinchalik ularning o'g'li Qahhop tug'ilib, quvonchi ustiga quvонch qo'shildi. Saidjon orzu qilgan o'g'lining shirin qiliqlari bilan oy va yillarning o'tib ketganini ham sezmay yurdi. Bahorgul esa oilasidagi eng qimmatli insonlarining ko'nglini olishga intilardi.

Saidjon oqko'ngil, xushchaqchaq har qanday ishni puxta bajaradigan, qo'lidan kelsa, barchaga yordam berishga tayyor bo'lganligi uchun jamoamizda obro'-e'tiborli edi. U ishxonaga hamisha xush kayfiyatda kelardi. Buning sababi uning oiladagi baxtli hayoti

ekanligini tushunardim va chin ko'nglimdan ularga baxt tilardim. Hayot shu tarzda davom etar, Saidjon ham kundalik tashvishlari bilan band edi.

O'tgan yil kirishi bilan Saidjonning kayfiyatida biroz o'zgarishlar yuz bera boshladi. Doimo xush kayfiyatda yuradigan bu inson endilikda gap ko'tara olmaydigan, biroz jizzakiroq bo'lib qolgandi. Negadir ishga kechikib keladigan va ertaroq ketadigan bo'lib qoldi. Bu holdan hammamiz hayron edik. Shunday kunlarning birida:

– Saidjon, sizga nima bo'lyapti? Biror ko'ngilsizlik bo'ldimi? – deb so'radian.

– Yo'q. Hammasi joyida, – dedi u avvaliga gap qilgisi kelmagandek. Keyin biroz o'ylanib turib:

– Bahorgulning salomatligi yaxshi emas... Kasalxonaga tushib qoldi, – deb qo'shib qo'ydi. Men esa inson bolasining birda betob bo'lib, birda sog'ayib ketishini odatiy hol deb: – Betob inson tuzalib ketadi. Buning uchun juda qayg'urmang, undan ko'ra idishlarni yuvish, taom pishirish og'irlik qiyapti, deng, – deb hazil aralash ko'nglini ko'tarmoqchi bo'ldim.

U menga biroz qarab turdi-da:

– Albatta, tuzalib ketadi, tuzaladi, – deb shoshilinch tashqariga chiqib ketdi. Vaqt shunday o'taverdi. Hash-pash deguncha kuz o'tib, qish ham yetib keldi. Saidjonning yuzidagi tabassum, xushchaqchaqlik uzil-kesil yo'qolgan, ikki-uch kunlab ishga kelmayotganligi, hamisha uyquga to'ymay yurgan odamdek qoboqlari shishib yurishiga ko'nikib ham qolgan edik. U bo'lar-bo'lmas gaplarga tutoqib ketadigan, ish yuzasidan berilgan ba'zi savollarga ham yoqinqiramasdan javob qaytaradigan bo'lib qolganligi uchun, undan biron narsa so'rashga ham botina olmay yurdik. Ilgari Bahorgul to'g'risida so'z ketgudek bo'lsa, ochilib-yayrab ketadigan Saidjon hozir u to'g'risida so'zlamaslikka va so'zni boshqa mavzuga o'zgartirishga tirishardi.

Har kim o'z tirikchiligi bilan bo'lib, Saidjonning bunday holatini Bahorgulning ahvoli bilan bog'liq ekanligini, doktorlar unga rafiqasi sog'ayib ketishi dargumon ekanligini aytganini biz qaydan bilaylik. Shifokorlar chiqargan "og'ir hukmi" bilan kelisha olmay, Bahorgulni tabib, ekstrasens, mulla deganlarning hammasiga ko'rsatib, uni "o'lim" dahshatidan saqlab qolish uchun kurashayotgan vaqt ekan.

U deb, bu deb yurib, bahor fasli ham yetib keldi. Kun anchayin isib, tabiat gul-u yaproqlar bilan yashara boshlagan vaqt qarindoshlarimizdan biri kasalxonaga tushib qolib, shanba kuni uni ko'rib kelish uchun otlandim. Kasalxona hovlisiga endigina kirib kelgandim, ro'paramdan bir ayolni opichlab ko'tarib kelayotgan odamga ko'zim tushdi. Unga yo'l berish uchun chekkaga o'tdim va ko'zlarimga ishona olmadim. Oldimda Saidjon turardi.

Men hayajonlanganimdan:

– Sa... – deb og'zimni ochishim bilan u yalingansimon "gapirmang" deb ishora qildi. Uning ko'zlarida yosh... Bu ko'rinish menga shu darajada ta'sir qildiki, butun badanim titrab jonom chiqib ketgudek, uzoq vaqt o'rnimdan qo'zg'alolmay qoldim. "Saidjonnini shu qadar o'zgartirib yuborgan mana shu dard ekan-da... Bahorgulni betob deyishga tili bormay, yomon so'zlardan asrab, hamma dardini ichiga singdirib yurgan ekan-da" degan o'ylar va boyagi ko'rishish mening ko'nglimni alamzada qildi.

Dushanba kuni Saidjon ishga kelmadи. Yana ikki kundan so'ng esa bizga Bahorgulning vafoti haqidagi sovuq xabar keldi. Bu xabar Saidjon bilan Bahorgulni yaxshi biladiganlar uchun musaffo osmonda chaqmoq chaqqandek ta'sir qildi. Olamdan o'tgan insonni so'nggi manzilga uzatish marosimida jamoa bo'lib qatnashdik. Shu kunlarda ularni biladigan har qanday odam chuqur qayg'urish bilan motamda bo'ldi. Qarindosh-urug'larning, qizi Muqaddasning, hatto kichkinagini Qahhorning

hasrat bilan bo'zlashiga chidab turish og'ir edi. Saidjon esa bukchayib, bo'lib o'tgan voqeaga hali-hanuz ishonmay, hatto nima bo'layotganini tushunmayotgandek yurar, bundan atrofdagilarni tashvishga solar edi. Yurt mo'tabarları Alloh taoloning amriga qarshi chiqish og'ir gunoh ekanligini, erkak kishining har qanday vaziyatda ham sabrli bo'lishi kerakligini yodga solib, unga tasalli berardilar.

Olganning ortidan o'lib olish mumkinmi? Urf-odat, rasm-rusm bo'yicha barcha marosimlar o'tdi. Saidjon ikki farzandi bilan qoldi. Tirik bandalar hayotni davom ettirmog'i darkor. Bu ham hayotning rahmsiz qonuniyati... Qayg'uli kunlar o'tib, qiyinchiliklar ortda chekinayotgan kunlarning birida Saidjon g'amgin holda xonaga kirib keldi. Birga ishlagan yillar davomida u bilan haqiqatdan ham aka-singildek bo'lib qolgan edik. U hech narsa demasa ham, bir yil ichida yig'ilib qolgan dardini ko'zidan oqayotgan alamlı yoshlari birma-bir bayon qilayogandek edi.

– ... Doktorlar bir necha bora tekshiruvdan o'tkazganlaridan keyin ahvolni menga tushuntirgan edilar. Ammo men ularning so'zlariga quloq solmay, uning hayoti uchun kurashni davom ettirdim. Har qancha og'ir ahvoldan ham mening Bahorgulga bo'lgan his-tuyg'ularim ustun keladigandek, qiyinchiliklarni hech narsaga qaramasdan yengib chiqadigandek umid bilan yurdim. Doktorlardan Bahorgulning hayotini saqlab qolish uchun barcha imkoniyatlaridan foydalanishini so'rab iltimos qildim. Afsus, mening tirishganlarim uni bir necha oy yashashigagina yetdi, xolos... Nima uchun? Nima uchun bu bedavo kasallik mening Bahorgulimga yopishdi, degan savolga javob izlab qanchadan-qancha tonglarni ottirdim. Qisqasi, uni saqlab qola olmadim...

Saidjonning tortgan ohlarining oxiri yo'qdek edi. Men uning busiz ham tirnalayotgan dilini yana-da yaralamaslik uchun Bahorgul to'g'risida hech narsa

so'ramaslikka, iloji bo'lsa, gapni boshqa yoqqa burishga harakat qildim.

U ancha vaqtgacha sukut saqlab, ko'zlarini bir nuqtaga qadalib qoldi. Undan keyin:

– Yaqinda Bahorgulni kasalxonadan uyg olib ketayotganda uchrab qolganingizda, uning biror tanish odamning ovozini eshitib, o'z ahvoldidan xijolat bo'lmasligi uchun siz bilan so'zlasha olmagan edim. So'nggi ikki kun ichida uning tomirlaridan yuborilgan osma ukollar ham yurmay qoldi. Ko'zlarining nuri o'chib, hatto o'midan qo'zg'alishga ham madori qolmagan edi. Faqat shu chog'da mening Bahorimning so'nggi damlari ekanligiga iqror bo'lishdan boshqa choram qolmadi. Men qanchalik achchiq bo'lmasin, ammo haqiqatdan qochib qutula olmadim, afsus. Nima deb uni uyg olib ketishimni bilmasdan garang bo'lib yurgan vaqtimda, uning o'zi menga bolalarimizning yonida biroz bo'lgisi kelayotganligini aytib pichirladi.

– Albatta, dam olish kunlari uyda bo'lganingiz yaxshi, – dedim va mashina chaqirishga intildim. Kasalxona bilan uyimizning oralig'i uncha ham yiroq emasdi. Taksiga olib chiqish uchun Bahorgulni qo'limga olar ekanman shodligiga qaraganda qayg'uga to'lgan bu olamdan voz kechgim kelib ketdi. Shu kunga qadar orzu qilgan shirin xayollarim, Bahorgul bilan birga o'tkazgan ajoyib baxtli onlarim ko'z oldimda meni xonavayron qilib, ko'kka sovurilgandek bo'ldi. Chunki bir yil avval qizil guldek ochilib turgan Bahorimda namador, na ko'rimlik qolmagan edi. Xudoning menga Bahorim bilan vidolashish uchun bergen so'nggi imkoniyati ana shu xilda kechgan edi. Bahorgulimning shusiz ham ezilgan tanasini og'ritib qo'ymaslik uchun uni avaylab ko'tarib, o'zimni bilib-bilmay kelar edim. O'zimni tutishga qanchalik urinmay, ko'zimdagи yoshlаримни to'xtatishга ojiz edim. Yo'l bo'yi yaratgan egamdan komil shifo so'radim. Ammo xudoyim bergen nasibasi tugagan ekanmi... O'shanda Bahorimning

tanasi pardek yengil, qo'l toliqturgidek vazni qolmagan edi...

– O'zingizni bosing, dedim-ku, Saidjon. Bahorgul sizga oltindek ikki yodnomaga qoldirib ketdi. Ularni katta qilish endi sizning yelkangizda. Bolalarni ham o'ylang, – deb uni tinchlantirmoqchi bo'ldim.

– Muqaddasni ko'rsam o'zimni gunohkordek sezaman. Chunki uning oldida yolg'onchi bo'lib qoldim. Onasi... U "onasi o'lgandan keyin" degan so'zni aytta olmadi. Saidjon yana bir pas chekkasini qattiqroq bosib o'tirdi va sekin ovozda so'zini davom ettirdi.

– Muqaddasning o'n besh yoshga to'lgan kuni edi. Bahorgul kasalxonada. Ahvoli kundan-kunga og'irlashib borayotgan vaqt. Kayfiyatim qanday ekanligini tasavvur qiling. Taqdir menga bolalarga onasining ahvolini yaxshi deb aytishga, Bahorgulning oldida esa kulimsiragan holda ertaklardagi singari "baxtli hayot kechirish" kabi so'zlarni so'zlash kabi og'ir vazifani yuklagan edi. Faqatgina kechgi payt yolg'iz xonamga kirgandan keyin budardlarimni singdirish uchun joy topa olmay, arosatda bo'lib, tunni qanday o'tkazganligim Alloha ayon.

Bir kun avval Bahorgulning yoniga borgan edim. U "Muqaddasning tug'ilgan kunini men borligimdagidek bayramona nishonlab berishga harakat qiling. O'zi men tufayli boshqacha bo'lib qoldi. Biroz bo'lsa-da, ko'ngli ko'tarilsin", deb iltimos qilgan edi.

U kunlari mening ko'nglimga bayram sig'mas edi. Har holda ertaroq turib, dastirxon tuzatmoqchi bo'ldim. Muqaddas turishiga qadar uning ko'nglini ko'taradigan nimadir taylorlamoqchi bo'ldim... Mehmonxona tomonga keta turib, uning yotoqxonasi oldida to'xtab koldim. Eshik qiya ochiq ekan. Muqaddas esa xo'ngragan holda yig'lab yotardi. Uning ko'nglini olish yanada qiyin bo'lishi ma'lum edi. Har holda bor g'ayratimni ishga solib, uning oldiga kirdim. Asta yaqinlashib, boshini siladim.

– Bugun sizning bayramingizku, tentak qiz. Shunday kunda ham odam yig'laydimi? Tezroq ko'zingizdagи yoshni artib, qanday sovg'a xohlappingizni aytинг. Onangiz o'zingiz xohlagan narsani olib beraylik degan edi. Qani tezroq bo'ling, – deb tamoman xush kayfiyatda ekanligimni bildirmoqchi bo'lib, bor kuchimni yig'dim. Muqaddas boshini ko'tarib:

– Rostdan ham xohlagan narsamni bajarasizmi, dada? – deb so'radi o'pkasini bosolmay. Men uning ko'nglini olish yo'lini topganimdan xursand bo'lib:

– Albatta, qizim, aytинг. Bugun sizning har qanday tilagingiz men uchun qonun. Qani, dadangiz mard vaqtida so'ravoling, – dedim.

– Onamni davolab bering, jon dada. Yolg'iz tilagim shu, – dedi u yolvorgandek.

Ey Allohim... Mening tilim tortilib, nafasim qisilgandek bo'lib, biroz turib qoldim. Tavba, bir yil avvalida erkalik qilib, birda uni, birda buni so'rab, ovora qilib yurgan qizimizning norasida qalbini bir zumda g'am-qayg'u bosgani yuragimni xanjar bilan tirmab olgandek sezildi.

– Unday bo'lsa tilagim bajarildi deb hisoblayvering. Sababi, onangiz tez kunda tuzalib chiqadi. Bundan boshqa narsa so'rang, so'ramasangiz, kechikib qolasiz. Men ayniб qolishim mumkin, – degan bo'lib, unga yolg'on va'da berdim. Uning miskin chiroyi o'zgarib, ko'zlarida umid uchqunlari paydo bo'lgandek bo'ldi-yu, darhol yana g'amgin holga tushib goldi.

– Unday bo'lsa onam nima uchun o'rnidan turolmay qoldi?

U yana menga termulib qaradi.

– Bu tabiiy hol. Esingizda bo'lsa oxirigi marta chet eldan olib kelgan dorilarni doktorlar: "Bu nihoyatda o'tkir dori. Avvaliga organizmni zaiflashtirib, undan so'ng davolaydi", demaganmidi... – dedim bu "ertakni" yodimga kelganligidan xursand bo'lib. Muqaddas o'midan deyarli sakrab turdida, kichik vaqtidagidek bo'ynimni qattiq quchoqlab:

– Rahmat, dadajon, bu sovg'angizni umrbod esdan chiqarmayman.

U kuni Qahhorni ergashtirib Bahorgulning oldiga bordik. Eng ta'sirligi, onasi, xuddi men bilan kelishib olgandek, bizni o'rın-to'shagini yig'ib qo'yib kutib o'tirgan ekan. Bahorgulning oyoq-qo'lli titrab, zo'r-bazo'r turganini bilib turardim. U o'zining so'nggi damlarida ham onalik burchini ado etib, ahvolining og'irligiga qaramay, bolalarini o'ylayotganligini ko'rib, ichichimdan ezilardim...

Yanada dahshatlisi, Muqaddasning tug'ilgan kuni o'tib bor-yo'g'i besh kungina yashadi, xolos...

Muqaddasga bergen va'dam ana shunday xotimaga ega bo'ldi. Uning ko'ziga tikilib qarashga, hatto biror og'iz so'z aytishga botina olmay yuribman. Ha, uning yig'isi tugamasligi u yodqa tursin, aksincha kundan-kunga kuchayib borayotgandek bo'lyapti, menga...

Men Saidjonning yuragidagi yarasi qanchalik chuqur ekanligini sezsam ham, uning ko'nglini olishga harakat qilar edim. Ammo u o'z xayollari bilan bo'lib, menga quloq solmasdi. Bir pasda jim bo'lib qolardi, bir pasda esa Bahorgul to'g'risida to'xtamay so'zlardi.

– Ey, Xudo! Bahorgul meni tashlab ketishi xayolimga ham kelmagan ekan. Balki, u bilan o'tkazayotgan umrimni abadiy deb o'ylagan bo'lsam kerak.

Bizning birkalikda hayot kechirayotganimizga o'n to'rt yil bo'lgan kun edi. Bu kun biz uchun alohida nishonlanadigan bayram edi. Odatdagidek Bahorgulga sovg'a tayyorlab qo'yib, uyga qaytmoqchi bo'lib turgan edim, xonamga ikki do'stim kirib keldi. Ular bir do'stimizning bizni uyida kutayotganligini aytib, meni ham chaqirishdi. Ahvolni tushuntirishga harakat qildim. "Voy-bo', bor-yo'g'i yarim soat kechikarsan. Faqat pivo ichib qaytamiz. Ungacha Bahorgul qochib ketmaydi-ku" deb turib olishdi. Men dastlab har besh minutta soatga qarab o'tirgan edim. Avvaliga pivo, undan keyin esa kuchliroq

ichimlik ichib soat o'n ikki bo'lib ketganini ham sezmay qolibman. Men peshonamga bir urib, uyga tomon yugurdim. Bahorgul dasturxonni tuzatib, meni kutib o'tirgan ekan. Yig'idan qizargan ko'zlirini ko'rib, darhol ko'nglini olmoqchi bo'lib, sovg'amni topshirishga intildim. Eng uyatli joyi, unga atab olgan chiroylar guldaстam do'stимning uyida, qimmatbaho atirming qutisi o'zimda, atirming o'zi esa qayergadir tushib qolgan ekan. Bahorgulning kayfiyatini tasavvur qilishingiz mumkin!!! Men undan ming bor uzr so'radim, albatta. Bu aybimni yuvish paytini kutib yurdim. Falakning gardishini qarang. Men navbatdagi bayramimizga o'zim dasturxon tuzatib, alohida tayyorgarlik ko'rmoqchi bo'lib yurganimda, Bahorgul kasalxonaga tushib qoldi. Uni kasalxonada tabriklashimga to'g'ri keldi. Bu yili esa... bu yili men yana uning ko'nglini ololmadim. Chunki ana shu menga baxt hadya qilgan kun kelgunga qadar men Bahorimni umrbod yo'qotdim...

Xayolimni telefonning jiringlagan qo'ng'irog'i bo'lib qo'ydi. "Voy xudoyim-ey, peshinga ham oz vaqt qolibdi-ku". Saidjondan hali ham darak yo'q. Hali ishni boshlaganum yo'q. Muqaddas olib kelgan xat qo'limda turar edi. Biroz o'ylangandan so'ng qolgan ishlarning hammasini peshindan keyinga qoldirib, Bahorgulning yozgan oxirgi xatini o'qib chiqishga qaror qildim. Haqiqatan ham Saidjon es-hushini yig'ib olgunga qadar xat to'g'risida og'iz ochmay turganimiz to'g'ri bo'lsa kerak. Har holda o'ziga atalgan bu qimmat yodnomani undan avval o'qiyotganim uchun meni kechirar va to'g'ri tushunar, deb o'layman.

"Qadrdom Saidjon! ... deb boshlabdi Bahorgul xatini. – Men bu so'zni siz bilan birga o'tkazgan yillar ichida biror marotaba sizga qarata aytmagan ekanman. Bu aytgim kelmag'anligidan emas, balkim borliq

hayotimda sizning menga bo'lgan barcha yaxshi munosabatlaringizga binoan shu xilda oddiy va qimmatli so'zlarini aytgim kelsa ham, o'zimda hech jur'at topa olmagan edim. Yolg'on dunyoning bunday alomatini ko'rmaysizmi! Men jur'at topib, farzandlarimiz ancha ulg'ayib, keyingi hayotimni faqat sizga bag'ishlay degan chog'da bu ajoyib so'zlarim yana ichimda qolib ketadiganga o'xshaydi. Chunki bu so'zlar sizga yetgunga qadar, afsus, men bu bevafo dunyo bilan vidolashadiganga o'xshayman. Ha, azizim, bu dunyo ana shunday yolg'onchi ekan. Siz ahvolimni mendan yashirishga harakat qilayotganingizni yaxshi sezib turibman. Men uni sizning chiroyingizdagи muhabbatga to'lib-toshgan tabassumingiz ketib qolganligi, ko'zlariningizdagи mehr-shafqat sochilib turgan nurlar o'chgan kundan boshlab sezgan edim.

Ammo siz bu holatingizni menga bildirmaslik uchun tirishiб, ko'zingizda g'am-anduhingizni kulimsiragan holda yashirar edingiz. Har safar kelganingizda yaxshi umidlar bilan o'zingizni ovutar edingiz. Meni bir daqiqa ajoyib orzularga ko'mib tashlardingiz. Qiziq yeri, ba'zi hollarda so'zlariningizga haqiqatdan ham ishonib qolar edim. Lekin sizning ko'zlariningizda yashiringan qayg'u-alamni o'qib, yanada o'z holimga qaytar edim. Siz meni, men esa sizni bir qaraganda tushuna olishimizni unutganga o'xshaysiz, hayotim qahramoni. Men ham sizning ko'nglingizga ozor yetkazmaslik uchun, o'zingiz tasvirlagan baxtli hayotda besh kun bo'lsa-da, yashashni orzu qilishga bor kuchimni yig'ib tirishdim. Xayolimda sizning issiq kaftlariningizga qo'limni qo'yib, chiroylar gullar ochilgan bog'larda, suvlar sharqirab oqqan tog'larda, lipillab yoqqan yumshoq qor ostida yana yurishni orzu qildim. Endi farzandlarimiz xususida aytsam. Ulapning barcha og'irchiliklarini ko'tarish endi yolgiz sizning bo'yningizga tushadi. Ularni xafa bo'lishiga yo'l qo'ymasdan katta qilib, qatorga qo'shishga va bu yo'lda o'zingizni ehtiyot qilishga majbursiz. Muqaddas

o'n beshga to'ldi. Bugun uning tug'ilgan kuni. Qizimizning qalbi o'ta nozik, osongina azoblanadiganini yaxshi bilasiz. Ayniqsa, bu yil u ko'p yig'laydigan bo'lib qoldi. O'tgan yili tug'ilgan kunida: "Do'stlarim kelmoqchi edi, ammo sizlar e'tibor qilmadilaring", – deb arazlab qolgan edi. U chog'da men endigina kasallikni boshdan o'tkazayotgan vaqtlarim edi. Unga "Qizim, bu yilcha do'stlarining kelmay tursin, mening sog'ligim yaxshi bo'lmayapti, kelgusi yili o'n beshga to'lasiz, ana shu chog'da o'zim chiroyli dastirxon tuzatib, tug'ilgan kuningizni bayramona o'tkazib beraman", – deb va'da berib yuborgan edim. Bu yilgi ahvolim o'zingizga ma'lum. Har holda ko'z nurimning kayfiyati buzilmasin deb yonimdagilarning yordami bilan o'rinnko'rpamni yig'ib, Muqaddasni kutib o'tirgan edim. Peshinga yaqin siz ikkala farzandimizni – Muqaddas bilan Qahhorni ergashtirib kirib keldingiz. Shu kuni oramizda ko'nglidagi gaplarni yashirmsandan so'zlagan faqat Qahhop edi...

– Ona, siz yaqinda barcha fanlardan "besh" baho olsang, uyg'a chiqib ketaman degan edingiz-ku. Birta fandan "to'rt" olib qoldim. Ikki-uch kun ichida uni ham tuzataman. Shu chog'da dadam ikkalamiz sizni uyg'a olib ketamiz, – deb xavotirda edi.

– Albatta, qo'zichog'im. Ikki-uch kundan keyin uyg'a chiqaman, – deb uning peshonasidan o'pib, qo'liga shirinliklardan tutqazib qo'ygan edim. Ha, Muqaddas ikkalanglar... Ertalabdan beri ko'z yoshlarininglarning qurimaganini, qovoqlaring shishib ketganini mendan yashirmoqchi bo'lib, bir tog'dan, bir bog'dan so'zlamoqda edinglar. Anchadan beri Qahhor mening yonimni bo'shatishini kutayotgan Muqaddas:

– Yaxshi bo'lib qolibsiz-ku, jonom ona, – deb mening bo'ynimni quchoqladi. Men uni bag'rimga to'ymay bosib turaverdim. Chunki bu mening qizimni bag'rimga so'nggi bora bosayotganligimni u bilmasa ham o'zim

yaxshi sezib turar edim... Uning qayg'uga to'la yuragining tez-tez urishi, menga ko'rsatgisi kelmagan ko'z yoshlarining yurak-bag'rini yuvib, ichki a'zolarini o'kintirayotganini, o'pkasini hali ham bosa olmay, asta intiqayotganligini sezib, bu siz ham ezilayotgan yuragim yana-da ezilib ketdi.

– Tug'ilgan kuningiz muborak bo'lsin. Xohlagan sovg'angizni so'rang, qizim. Dadangiz aytganingizni olib beradi, – dedim zo'rg'a pichirlab.

– Rahmat, ona. Dadam eng qimmat sovg'a olib berishga va'da berdi, – deb sizga qaradi u.

– U nima ekan, aytng, men ham uni bilishga qiziqayabman, – deb uning ko'nglini ko'tarmoqchi bo'ldim.

U mening ozib ketgan qo'llarimni kaftiga olib turib:

– Sizni... Sizni tuzatib beraman deb va'da qildi, – deb sizga umid bilan termuldi mening sodda qizim. Siz esa og'ir gunoh qilib qo'ygan odamdek Muqaddasga ham, menga ham qarashga botina olmay ming bir hasratga to'lgan ko'zlariningizni chetga oldingiz...

– Men, siz hamisha biz bilan birga bo'lishingizni xohlayman, ona, – deb buloqdek ko'zlarini yana menga qadadi. Qunduzimning yashirib ovora bo'layotgan hasratli yoshlari oxiri tashqariga chiqib tindi. Anchadan beri tizilib turgan tomchilar endi uning qop-qopa uzun kipriklari oralab, orqa-orqadan to'kilmoqda edi.

...Bu vaqtagi hissiyotimni sizga aytib, ovora bo'lmay, Saidjon. Siz qizimizning armonga aylanib borayotgan orzusi mening so'nggi madorimni ham uzib tashlash oldida turganini darhol tushindingiz.

Oyoq-qo'lim jonsizlanib, ko'zlarim korong'ilashib: "Ey, xudoyim, bugungi kunda, mana shu norasidalirimning yuragini ezmay turgin. Shularning ko'z oldida yiqilib tushmasligim uchun o'zing madadkor bo'lgan, Ollohim... Undan so'ng mendan omonatingni olsang ham mayli...", – deb turishimga:

– Bahorgul, siz charchab qolgandirsiz. Biroz yotib dampingizni oling, – deb o'rnimga olib boardingiz. Sizga bu ishingiz uchun juda ham minnatdor bo'ldim, Saidjon. Har doimgidek siz yana o'z vaqtida menga yordamga keldingiz.

...Keyingi ahvolim shunday tushunarli edi. Bolalarni kuzatib qo'yib, bir bahona bilan yana qaytiq kirdingiz. Doktorlarni chaqirib, ukol qilib qo'yishni iltimos qildingiz.

– Bugun sizning yoningizda qolay dedingiz, – qo'llarimni silab turib. Ammo ularning bugun

onasi hayot chog'idagi eng so'nggi bayrami ekanligini bilib:

– Uyga boring, Saidjon. Muqaddas... Muqaddas uchun uyga boring, – dedim pichirlab. Siz mening ko'zimdagи yoshni kaftlaringiz bilan artib qo'ydingiz, sochlарimni tartibga soldingiz. Siz aynan bugun farzandlarimni so'nggi bora bag'rimiga bosib xayrлаshganligimning guvohи bo'lган edingiz va bu ahvolni o'zingiz ham bilib turardingiz... Albatta bilardingiz...



Oh, Saidjon, men siz bilan baxtli hayot kechirdim. O'tgan safardagi bayramimizda kasalxonaga katta savatda bir quchoq gul ko'tarib kelgan edingiz. Faqat uGINA emas, barmog'imga tilla uzuk, qulog'imga esa zirak taqib qo'ydingiz. Gullar orasida esa "Hayotimning bahori bo'lgan Bahorgulimga!" degan so'zlar yozilgan tabriknoma turardi. Yonimdag'i palatadoshlarim mening naqadar baxtli inson ekanligimni har kuni aytib, mening ko'nglimni ko'tarishar edi. Siz har qanday bayramlarda ana shunday diqqat ehtiromingiz bilan meni kaftingizda ko'tarib yurdingiz, men buni peshonamdag'i tugamas baxt bo'lsa kerak deb o'ylagan ekanman. Bu dunyoning naqadar vafosizligini bilmay qolibman... Qisqasi, siz tanlagan "bahor" yaproqlariga ega bo'lomagan "kuz" bo'lib chiqdi (hazil).

Rostini aytSAM, eng og'ir vaziyatda ham inson o'zini qanday tutishi kerakligini sizdan o'rgandim.

Saidjon! Mening xat yozishga madorm qolmaganligi yozuvimdan ham ko'riniB turgandir.

Saidjon farzandlarimiz avvalambor Ollohga, keyin sizga omonat. Qahhor hali kichik, o'zin bilan ovora bo'ladi. U siz bilan birga yurib, unchalik ayriliqni sezmay qolishi mumkin. Ha, Muqaddas... Muqaddasni desam, yuragim ezilib ketadi. Iltimos, qizimizga yor-yo'lak bo'ling. Ko'zidan yosh chiqmasligiga harakat qiling. Yolg'iz qolishiga yo'l qo'y mang. Onasidek bo'lishga xarakat qiling.

Mendin rozi bo'linglar, qadrondalarim. Siz menga eng vafodor va qadrond yor bo'ldingiz. Haqiqatni aytSAM, bir necha kecha sizdan ayrilish oson bo'lishi uchun "Sendan ayrilish men uchun hech gap emas" deyish uchun bahona izlagan edim. Tavba, siz qanday insonsiz!!! Hayotimda meni qattiq ranjitgan vaqtningizni topa olmay ovora bo'ldim... Sizdan iltimosim, bandachilikda bilim-bilmay ranjitib qo'yan, qalbingizga ozor yetkazib

qo'yan onlarim bo'lsa, meni kechiring. Faqat boshingizni baland tuting. Qaddingiz egilmasin. Hech qachon tushkunlikka tushmang. Chunki bolalarga endi siz yolg'iz javobgarsiz. Yodingizda bo'lsin – men sizdan ikki dunyo roziman.

Alvido, Saidjon, tayanchim mening! Vafosizligim uchun meni kechirgaysiz ... Bahorgul".

Xatni o'qib bo'lgunga qadar ko'zimdan to'kilgan yoshlar o'pkamni qon qilib yuborganini sezmay qolibman. Bu tengsiz dunyo ikki yaxshi qo'shilsa, ortiq bilib, ayirib tashlashning amalini qiladiganga o'xshaydi... Bu ikki qalbning bir yil davomida tortgan azob-uqubatlarini men ham birga tortgandek bo'ldim. Yuz-ko'zlarimni yuvib, sal o'zimga kelib olishimga Saidjon kirib keldi. Albatta, u hech narsadan xabari yo'q edi. Mening bilan sust salomlashib, o'rniga o'tirdi. Chiroyi so'lg'in.

– Bahorgulning oldiga borib keldim, – dedi u biroz jim o'tirgandan so'ng. – Tavba, u yerni osongina o'ziga makon qilib olganligiga hayronman...

U mozorga borib, Bahorgul bilan gaplashib kelganini uning ko'rinishidan bilsa bo'lardi. Men hozircha xatni ko'rsatishning hojati yo'qligini sezib, uni yanada nariroq yashirib qo'ydim.

* * *

Ertasi kuni men ishga kelsam bo'limda Saidjon o'tirgan ekan. Eshikdan kirishim zahoti men bilan so'rashmay:

– Xatni menga bering, – deb yonimga keldi.

– Voy, yaxshimisiz, Saidjon, nima xat u, – vaqtini cho'zmoqchi bo'ldim. "Muqaddas aytib qo'yganga o'xshaydi" deb o'ylab.

– Yaxshimisiz. Xafa bo'lmasdan xatni bersangiz, – u, xuddi biror bir shirinlik olishni kutayotgan kichik boladek, toqatsizlanayotgan edi. Boshqa chora yo'qligini sezib, xatni uzatdim, undan keyin uni bir pas "Bahorgul bilan" o'zini qoldirib, o'zim qo'shni bo'limga

chiqib ketdim. Oralab “Saidjon bechora nima bo’layotgan ekan?” deb o’ylab qolaman.

Kimdir:

– Sizni bir qiz izlab yuribdi, – deb chaqirdi.

Bo’limga kirsam Muqaddas yolg’iz o’tiribdi.

– Dadam yana yo’qmi? – dedi u tashvishlangandek bo’lib. Men ahvolni tushuntirdim. Saidjonga esa, Qahhor “opam uydan bir xat topib oldi. Menga o’qib ber desam, rozi bo’lmasdan o’zi o’qib yig’ladi. Keyin, “bu dadamning xati, ishiga olib borib beraman deb olib ketdi” deb aytgan ekan. U Muqaddas maktabda bo’lganligi uchun, darhol xatni menda ekanligini tushinibdi. Uning sababi, mening kecha o’zimni o’zgacha tutib yurganimni ko’rib, u:

– Sizga nima bo’ldi, – deb bir necha marotaba so’ragan edi. Men unga javob bermay, xuddi uni birinchi marta ko’rayotgandek, “odam bolasining ichida qanchalik ko’p sir yashiringan. Shuncha yil birga ishlab ichingizda nima borligini bilmagan edim. Bahorgulning boshiga qo’ngan baxt qushi ekansiz. Chora yo’q, taqdir sizlarga juda ham vafosizlik qilibdi...”, degan o’ylar bilan unga qaragan edim.

– Hozir u bo’limda yo’q. Qayerga ketgandir? – dedim andisha bilan.

– Men bilaman. U onamning yoniga ketgan. Bugun... bugun ularning bayrami edi, – dedi Muqaddas g’amginlashib.

Endi yodimga keldi. Saidjonning stoli ustida bir savat gul turar edi. Xat to’g’risidagi gap bilan bo’lib, unga unchalik e’tibor bermagan ekanman.

– Men dadamning yoniga boray. – dedi Muqaddas.

– To’xtang, yolg’iz qanday borasiz. Men ham siz bilan birga boraman, – deb kiyimimni kiydim.

* * *

Bu paytda Saidjon bir qo’lida xat, bir qo’lida gul tutib, Bahorgulning qabri oldida zir-zir titrab, o’tirardi.

– Bahorgul! Bahorgulim mening, bugungi kunni yoddan chiqardingizmi? Umrimizning to so’nggi daqiqasigacha yaxshilikni ham, yomonlikni ham birga baham ko’ramiz, deb qasam ichmaganmidik. Meni ne holga solib ketdingiz? Maqsadingiz meni bir chimdim tuproqqa qaratib zorlantirishmidi? Men bu qisqa hayotda sizga yaxshilik qilib ulgura olmagan edim. Nima qilganim uchun mendan rozi bo’ldingiz? Qo’limdagি oltinimni saqlay olmay, tuproqqa ko’mib qo’yganim uchunmi? Nima uchun? Bugungi kun ham biz uchun bayram edi-ku. Sizga olgan gulim nima uchun tuproq ustida yotadi?

Hayotimning bayrami o’zingiz edingiz-ku. Meni motamda qoldirib, qayerlarga ketdingiz? Mening zorimni eshitayapsizmi, ochilish o’rniga xazon bo’lishga shoshilgan fig’onim? Bugun ham odatdagidek kuttingizmi, mening bahorda qolib, bahorda ketgan, go’zalim...

Muqaddas tizzalanib o’tirgan dadasini ko’rib, unga qarab yugurdi.

– Dada, jon dada. Turing, men sizni juda yaxshi ko’raman. Men sizni onam kutganga o’xshab kutaman, men endi yig’lamayman... – deb o’rnidan turg’azdi.

Ota-bola ikkovlon quchoqlashgan holatda ancha turdilar. Men ularni ovutishga qurbim yetmasligini bilib, ancha yiroqlab ketgan bo’lsam ham, qulog’imga ularning yig’isi uzoq vaqtga qadar eshitilib turdi...



Aleksandr PUSHKIN

Ko'nglimdagi yangrar tilimdan...

TUNGI UYQUSIZLIK PAYTIDA YOZILGAN Sh'E'R

Chiroq o'chik, yotaman bedor,
Qorong'ulik, borliq uyquda;
Chiqqillashi soatning beor,
Davom etar raxon, osuda.

Eshitilar qismat ta'biri,
Mudrayotgan sokin tunimda;
Yo sertashvish sichqon dupuri...
Hadik paydo qilar ko'nglimda!?

Qaydan keldi, hadik faromush,
Maqsading ne, ey sirli ta'bir?
Unut bo'lgan tanami noxush,
O'tgan kunning alamimi bir?

Yana mendan nima istaysan,
Chorlovmi bu yoki bashorat?
Men ham anglamoqni istayman,
Mazmuningni istayman hayot!

1830

* * *

Kuylamagin, dilbar, yonimda
Gurjistonning hazin qo'shig'in:
Bu ohanglar solar yodimga
O'zga joylar, dengiz og'ushin.

Afsus, solaverar xotirga,
Sening shafqat bilmas xirgoying -
Dashtni, tunni - oy yorug'ida
Yiroqdagi g'amzada oyni!

Seni ko'rsam mudom unutgum,
O'sha aziz, nozik sharpani;
Sen kuylaysan - yodimga olgum,
Tasavvurga sig'mas qolgani.

Kuylamagin, dilbar, yonimda
Gurjistonning hazin qo'shig'in:
Bu ohanglar solar yodimga
O'zga joylar, dengiz og'ushin.

1828

DO'STLARIMGA

Rad etaman, emasman maddoh,
Hukmdorga maqtovim dildan:
Men bemalol qilurman ogoh,
Ko'nglimdagi yangrar tilimdan.

Men shunchaki sevoldim uni
G'ayratli – u, hukmi –adolat.
Jonlantirdi g'ayrat-la Rusni,
Urushlarda va chekib zahmat.

Faqat yosendir, qaynoqdir qoni,
Biroq taxtning ruhi begona.
Jazolarkan aybdor zotni,
Achinish xos dildan, shohona.

Quvg'inlarda kechardi umrim;
Hijron yuki ezardi zimdan.
Quchoq oolib uzatdi qo'lin,
Siz bilanman, quvonay kimdan?!

Qadrladi ilhomimni ham;
Erkni berdi tafakkurimga,
Baxtiyorman, xushnudman biram,
Arzimasmi tashakkurimga!?

Maddohmishman! Bekor gap, do'stlar,
Maddoh shohga tilar falokat.
Hukmdorning hukmidan izlar,
Karomat-u tekin daromad.

U aytadi: nafratlan eldan,
Tabiatning rad et sasini.
U aytadi: ma'rifatlidan-
Ko'rmagaysiz bo'ysunmasini!

Falokatdir maddoh va malay
Taxtga yaqin bo'lsa qay yurtda.
Yaratganning soyasi atay
Ham tutsa gar boshin sukutda.

* * *

Qurban qilay xotirang uchun:
Ilhomimning jarangdor sozin,
Ham bokira qiz ko'z yoshin,
Ham rashkimning shubhasin butun;

Quvg'inlig-u shuhrat shavqini,
Go'zal tafakkur yog'dusi ila,
Ham qasosni, isyon orzusin,
Iztirobning achchiq zavqi-la..

1825

ShOIRGA

Shoir! Ixlos qilma, xalq muhabbatı,
O'tar tantanovar maqtovday tansiq.
Kutar nodon hukmi, omma nafrati,
Ammo sen bardam bo'l, xotirjam, bosiq,

Shohsan: yagonasan, Ozodlik yo'lingda
Borgin, qayda bo'lsa erkin tafakkur.
Bekam bo'l, hosil bersin fikrlaring hur,
Mukofotlar kutma, mardlik qo'lingda.

Borliq – o'zingsan, o'zing oliv hakam,
Eng talabchansan, baho bobida ham.
O'zing rozisanmi, zukko sanatkor?

Rozisan? Unda mayli olomon so'ksin,
Otashdon mehrobga tuproqlar to'ksin,
Taxtingni silkitib go'dakdek nochor!

1828

Eshqobil VALI tarjimasi



Farhod Musajonov asosan bolalar, o'smirlar uchun asarlar yozdi. Uning har bir satrida bolalarga xos beg'uborlik, soddalik, samimiylik silqib turadi. Shu boisdan ham bitiklari ko'ngillarga oson va tez singib ketadi.

Luqmon BO'RIXON,
yozuvchisi

>> Farhod MUSAJON <<



1933-yilning 19-dekabrida Toshkentning O'qchi mahallasida tug'ilgan. 1956-yili Toshkent davlat (hozirgi O'zMU) universiteti Sharq fakultetining eron-afg'on bo'limida tahsil olgan.

Yozuvchining “Daradagi qishloqda” nomli birinchi hikoyasi 1956-yil “Sharq yulduzi” jurnalida, shu nomdag'i birinchi hikoyalar to'plami esa 1959-yilda chop etildi. Shundan so'ng adibning “Oftobni quvalab” (1963), “Bahor nafasi” (1964), “Bo'sh kelma, Aliqulov!” (1965), “Bir qultum buloq suvi” (1972), “Dushanba, nonushtadan so'ng” (1974), “Sunbula”, “Bog' ko'chamni qo'msayman” (1977), “Himmat” (1984), “Bog' ko'cha” (1987), “Qilich va soz” (2000), “Lafz” (2003), “Kuymagan jonim manim”, “Ekran yulduzi” kabi o'ttizga yaqin qissalar va hikoyalar (jumladan, bolalarga bag'ishlangan) kitoblari dunyoga keldi. Bulardan tashqari adib “Oq kabutar”, “Talvasa”, “Tomosha davom etadi”, “Imtihon” kabi pesalar, “Jazirama oftob ostidagi uy”, “Birovning boshi”, “Ko'zlarim yo'lingda”, “Huvaydo”, “So'nmas ziyo”, “Sensan sevarim”, “Men senga zor”, “Askiya”, “Qiziqchi” kabi badiiy filmlar, “Afyun iskanjas”, “Haziniy”, “Xizmatingizga hozirman”, “Vatan ishq” kabi yigirmadan ortiq hujjatli filmlar ssenariylari muallifi hamdir. Uning bir qator asarlari xorijiy tillarga tarjima qilindi.

Farhod Musajonov 2000-yili “Mehnat shuhrati” ordeni va 2011-yili O'zbekiston xalq yozuvchisi unvoni bilan taqdirlandi. U 2013-yilning 28-mayida Toshkent shahrida vafot etdi.

Kavsar Turdievaning bolalar uchun yozilgan asarlarini o'qir ekansiz, shoiraning beg'ubor qalb sohib ekanini sezmaslik mumkin emas. Zero, bolalarga yozish uchun bolaga aylanmoq lozimdir. Shoira she'rlarining har satrida bolalar ruhiyati, ularning cheksiz xayolot olami, tasavvur dunyosi, o'quvchi ruhiy kechinmalarining singdirib yuborilishi kitobxonni asar qahramoni o'rnidagi tasavvur qilishiga turtki bo'ladi. Bu esa bolalar uchun juda muhim omildir.

Dilorom TO'RAEVA,

filologiya fanlari bo'yicha falsafa doktori (PhD)



» Kavsar TURDIYEVA «

Bolalar shoirasi Kavsar Turdiyeva 1958-yil 6-avgustda Toshkent shahrida ziyyoli oilasida tug'ildi.

1975-yili Chilonzor tumanidagi 201-maktabni oltin medal bilan tugatdi va ToshDU (hozirgi O'zbekiston Milliy universiteti)ning jurnalistika fakultetiga o'qishga kirdi. So'ng Leningrad davlat universitetida o'qishni davom ettirdi (1981).

Kavsar Turdiyeva O'zbekiston Fanlar akademiyasi Alisher Navoiy nomidagi Til va adabiyot instituti aspiranturasida tahsil oldi. Toshkent pediatriya-tibbiyot institutida o'qituvchi bo'lib ishladi. Hozir shu institutda kafedra mudiri lavozimida xizmat qiladi. Kavsar yoshligidan bolalar adabiyotiga qiziqди. Ilk she'ri o'quvchilik yillari "Tong yulduzi" gazetasida bosildi. Birinchi kitobi "Varrak" 1983-yili nashr etildi. Shundan so'ng "O'ynayapman, o'ylayapman" (1987), "Qush bo'lib uchgan ona" (1994), "Raqamlar bo'ylab sayohat" (2002) kitoblari bosmadan chiqdi.

Bolalar dramaturgi sifatida "Toshkesaklar mamlakatida" degan sahna asarini yaratdi. U Samargand qo'g'irchoq teatri tomonidan sahnalashtirilib, qo'g'irchoq teatrlar festivalida 1-o'rinni oldi.

"Botu nidosi" (2004), "Mitti qo'g'irchoqboz" (2007), "Quvnoq alifbo olamiga sayohat" (2008), "Sog'inchilar sochilgan bekatda" (2011), "Dunyon saqlang, bolalar" (2012) kabi va boshqa she'riy to'plamlari o'quvchilar qo'liga yetib bordi.

Kavsar Turdiyeva ssenariychi sifatida faol ishlamoqda. Chunonchi, "Zumrasha" (1997–2001) kinojurnalida uning ssenariylari asosida o'nga yaqin lavhalar suratga olingan. U ikki yuzdan ortiq qo'shiqlar muallifi, o'zbek va rus tillarida ijod qiladi. K. Chukovskiy, S. Marshak, L. Barbas, R. Farhodiy she'rlarini o'zbek tiliga tarjima qilgan.

2009-yilda adabiyot yo'naliishi bo'yicha "Eng ulug', eng aziz" tanloving g'olib bo'lidi. 2010-yil yakunlari bo'yicha "Bolalarning sevimli shoirasi" nominatsiyasini qo'lga kiritdi.


Tibbiyot oliy o'quv yurtlarining rusiyabon talabalari va hamshiralik fakulteti uchun "O'zbek tili" darsligi (2006, 2007), rus tili fanidan "30 shagov k russkomu yazýku" (2010) kitobi muallifidir.

Kavsar Turdiyeva adabiy-ijtimoiy faoliyatini uchun 2001-yilda "Shuhrat" medali hamda 2019-yili O'zbekiston Respublikasida xizmat ko'rsatgan yoshlar murabbiyi faxriy unvoni bilan taqdirlangan.

Yakshanba

kun kampircha...

(Hikoya)



Vasiliy ShUKShIN

Rus tilidan
Saidjalol
SAIDMURODOV
 tarjimasi

Qachonlardir uning ketmoni uchgandi. Urush qo'pgan zamon edi. Qishloq kezib, qo'shiq kuylardi. Uni ramaqijon, lekin joni qattiq, ziqna va shang'i Matryona Kondakova yetaklab yurardi. U Matryona Kondakovani xotinjon deb atardi.

Ko'pincha u qishloq do'konni bo'sag'asida o'tirvolib, qo'shqator barmoqbosdili rus garmonini chiqazar, tizzasiga qo'yvolib hafsalá bilan uzoq sozlar, yelkasidagi tasmani to'g'rilab olardi... U, albatta, artist edi. Tinglovchilarni shaylar, ko'nglini iydirardi. Tinch-xotirjam o'tirardi. So'qir ko'zlari (u tug'ma ko'r edi) allaqayoyqlarga, olis-olislarga "tikilardi". Mana shu daqiqalarda uni kuzatish qiziq edi. Matryona huda-behudaga tantanali tomoshani buzaverardi – timirskilanib, chaqa-pul tashlash uchun zinaga alyumin do'lchan ni qo'yar, negadir gul dor kashmiri sholro'molni yarashsa-yarashmasa – axir, yosh qizcha emas – boshiga tashlab olardi... Matryonaga ko'p ham e'tibor berishmasdi. Ganyaga nazar solishardi. Kutib turishardi. U esa asta, sipogina yo'talib olardi-da, boshini salgina xam qilib, yolg'iz o'zingga ko'radigan olislarga "tikilgancha", boshlardi...

Ancha-muncha qo'shiq bilardi. Hammasi urush, zindon, yetimchalar, daydilar haqida bo'lardi... Orasida "diniy"lari ham chiqib qolardi, biroq ortidan "qizil" qo'shiqlar yangrardi. Yoqmasa, iltimos qilishardi:

– Gan, oyoqsiz haqidagini boshla.

Ganya mehribon Xudojondan aqalli tushida bo'lsayam oyoqchalar ato etishni so'ragan, yurish qanaqa bo'lishini bilishni juda-juda istagan oyoqsiz (qizaloq) haqidagisini kuylab ketardi...

Xotin-xalaj hiqillashga tushardi.

Matryona ham kashmiri sholro'molining bir uchiga ko'zyoshlarini artib olardi. Kim bilsin, balki jo'rttaga qilgandir. U ilonning yog'ini yalaganlardan edi.

Ganya "sibmaxlag"chilar (Sibir lagerlari mahkumlari) haqida, qochishni eplagan surgun haqida kuylardi; o'sha qochoq qochishga qochibdi-yu, qayoqqa borishni bilmay boshi qotibdi, chunki xotini –

suyuqyoq bittasiga ilakishib,
dom-daraksiz yo'qolgan ekan-da.

Keyin "moviy, odmi
durracha"ni kuylardi...

Damlari ichiga tushib
tinglashardi. Ganya past, bo'g'iq
ovozda aytar, ba'zida (avjiga
chiqqanda) birdan jim bo'lib
qolar, faqat soziga zo'r berar,
so'ngra yana davom etardi.
Qo'shiqlari har xil bo'lardi.

*Yakshanba kun kampircha
Zindon sari yo'l oldi.
Och qolgandir o'g'ilcha,
Tugun qildi, "oh" soldi.
Ganya yiroqlarga
"tikilgani", yuzi qayg'uli va
jiddiy tusga kirgani uchunmi,
kampircha turma darvozasiga
yaqinlashgani, tugunchasida
ul-bul: bir tishlam moy,
bo'g'irsoq, tuxum, lattaga
o'ralgan tuz, bir shisha sut
borligi ko'riniib ketardi go'yo...*

*Tugunni ber, okasi,
Yo'lda hamma gap qotdi –
Zindonband ko'p, nechasi
Ochligidan tosh qotdi.
Xotin-xalaj, qari-qartang,
bola-baqra bularning barchasini
o'zlaricha tushunishardi
– u yoqda boyaqishlar
ko'pliginiyam, ochlikdan tirishib
qolishlariniyam. O'sha bechora
"o'tirgan"ga, kampirning o'g'liga
"rizq"ini yetkazishlarini chin
dildan istashardi – ozgina
bo'lsayam qorniga biron nima
tushsin, chunki ahmoqqayam
ayonki, avaxtada o'zi emas.
Ammo...*

*Dedi qo'rchi yoyilib:
"O'g'ilginang gum bo'ldi.
O'tgan kunda otolib,
U dunyoga yem bo'ldi".*



Bo'g'izga alam-dog' tiqilib qoladi.
Odamni o'kirib yuborgisi keladi...
Ganya anglab turardi buni. Ammo
miq etmasdi. Faqat mis qirrali eski
garmonigina sado beraverardi. Keyin
esa:

*Ortga qaytdi kampircha
Zindondan bosh eggancha...
Bilmas endi hech kimsa
Yurakdag'i dog' qancha.
Qanaqasiga bilishmasin
– bilishardi! Ko'z yoshi qilib
olishardi-da, do'lchaga beshtalik,
o'ntalik, yigirmataliklarni
tashlashardi. Matryona kim qancha
berayotganini hushyor kuzatib
turardi. Ganya bo'lsa garmonini*

quchoqlab o'tirar,
hamon o'zining
olis, noma'lum
sayxonliklariga
"tikilgani tikilgan"
edi. Bu nigohlar
g'alati edi,
tushuntirib bo'lmas
dahshatli, yurakni
ezadigan.

Keyin urush
tugadi. Omon
qolgan erkaklar
qaytib kelishdi...
Qishloqqa jon kirib,
gavjumlashdi. Radio
o'tkazishdi, patefon
olib kelishdi – Ganya
endi ortiqchaday
tuyuldi. Matryona
ikkovi kezinishdan
to'xtashmadni, lekin
uni baribir berilib
tinglashmasdi. To'g'ri,
sadaqa berishardi,
shunday – rahm
qilib, ko'zi ojiz odam,
amal-taqal bo'lsayam
tirikchiligi o'tsin, deb.
Keyinroq Ganyani
qishloq idorasiga
chaqirishib:

– Senga nafaqa
tayinlaymiz. Endi
sang'ib yurmagan, –
deb uqtirishdi.

Ganya
anchagacha raisga
yonlamasiga qarab,
og'ziga talqon solib
o'tirdi. So'ngra:

– Himmatli
hukumatimizga
rahmat, – dedi-yu,
ketdi.

Shundayam sandiroqlashni qo'ymadi, faqat uzoqroqqa, o'sha "isqoti radio" o'tkazilmagan yerlarga boradigan bo'ldi.

Ammo qancha uzoqqa borsa, shuncha battarlashaverdi. Yosh-yalang hatto ularning ustidan kulishgacha bordi.

– Siz, amaki... ko'zga yosh keltirvoryapsiz-ku. Sho'xrog'idan chalsangiz bo'lmaydimi?!

– He, zang'arlar, – dili og'ridi Ganyaning. – Eh, ko'p narsani tushunasانلار-da!

Shartta garmonini yig'ishtirib, qopchig'iga solardi-da, Matryona bilan yana olg'a ketishardi... Lekin borgan sari ahvol chatoqlashaverdi.

Shundan keyin Ganya daydishni bas qildi.

Matryona ikkovlon tog' etagidagi choqqina kulbada turishardi. Matryona polizda kuymalanardi. Ganya nimaga unnashni bilmasdi. Ichadigan odat chiqardi. O'zlarining yerlarida Matryona bilan it-mushuk bo'lib olishardi.

– Nafsingga o't tushsin! – shang'illardı Matryona. – Ichib ado qilasan nafaqangni, keyin ikki barmog'imizni burnimizga tiqb o'tiraveramizmi?! Xumkallang ishlaydimi o'zi yoki umuman ilma-teshik bo'p ketganmi?

– Yum og'zingni, – do'q qildi Ganya. – Umuman ochma!

– Kapgir bilan boshingga bir tushiraman – ochish qanaqaligini ko'rasan o'shandal.. Shayton olgur, ko'rsoqqa.

Ganya dokadek oqarib ketdi.

– Sen mening soqqalarimga til tekkizma! Nurdan ajratgan senmassan meni, kim qo'yipti senga bu gaplarni valdirashni!

Ganya allanechuk tajanglashib qoldi. U-bu joyga, to'yga aytishsa, bosh tortadigan bo'ldi.

– Men sizlarga masxarabozmasman, yallama-yorim qilishlarine uchun ting'ir-ting'ir chalib bergani. Uqdinglarmi? Endi patefonlaring bor – o'shaning nog'orasiga o'ynayveringlar.

Bir safar qishloq idorasidan yosolar kelib-ketishdi (aftidan, Matryona halloslab borib shikoyat qilgan), yurak yutib og'iz ochishdi:

– Siz shunaqa bir... ko'zi ojizlar jamiyatni borligini eshitgandirsiz...

– Ana o'shaqqa borib yozilinglar, – dedi Ganya. – Menga shu yer ham bo'laveradi. Anavi... mening... unga aytib qo'yinglar: yana bir marta idorama-idora chopadigan bo'lsa, oyoqlarini sindiraman.

– Nega shunaqasiz-a?

– Qanaqa?

– Sizga yaxshi bo'lsin deyilyapti, axir...

– Men esam istamayman! Ular istashsa, men istamayman! Shunaqaman... nokas tug'ilganman, o'zimga yaxshilikni ravo ko'rmayman. Nafaqamni to'lab turibsizlar, shunisiga rahmat. Ortiq hech vaqo kerakmas sizlardan menga. O'sha jamiyat-pamiyatlaringda balo bormi menga? Paypoq to'qib, radio eshitib o'tiramamni?.. Rahmat! O'shaqdagilarga mendan boshim yerga tekkuncha ta'zimimni yetkazib qo'yinglar.

...Faqat bir marta Ganyaning ko'ngli orziqib ketdi, jon kirganday bo'ldi, yosharib ketganday tuyuldi hatto...

Shahardan allaqanday odamlar – uch kishi kelib so'rashdi:

– Gavrila Romanich Kozlov shu yerda yashaydimi?

Ganya sergaklandi.

– Nimaydi? Jamiyatga borish uchunmi?

– Qanaqa jamiyat?.. Siz ko'pgina qo'shiq bilarkansiz, bizga aytishdi...

– Xo'sh?

– Bir eshitsak degandik. Yozib olsak bo'lardi...

– Nega? – o'smoqchiladi Ganya.

– Biz xalq qo'shiqlarini yig'amiz. Yozib olamiz. Qo'shiqlar o'lmasisligi kerak...

Shunday so'zlarni aytgan tilingga shakar, shaharlik!.. Ganya dik etib o'midan turdi, ma'nosiz ko'zları pirpirab ketdi... Ko'zyoshlarini tiyolmadi, quyilib kelaverdi, odamlar oldida yer yorilmadi-yu, kirib ketmadi. Keyin qovog'ini uyib, yo'talib qo'ydi, anchagacha churq etolmadi.

– Bizga kuylab berasizmi?

– Kuylab beraman.

Bo'sag'aga chiqishdi. Ganya zinapoyaga o'tirvoldi, tag'in garmonini tizzasiga qo'yvolib hafsalá bilan uzoq sozladi, yelkasidagi tasmani

yaxshilab to'g'rilab oldi. Yana yiroq-yiroqlarga "tikildi", yuzida tantana va jiddiyat balqidi. Mung va nafislik ham.

Erta kuzakning to'kin-sochin kunlaridan biri, yerda tinchlik-osoyishtalik, tanni yayratar iliqlik hukm surmoqda. Qishloqda yosh-u qari karam kesishga, kartoshkani o'raga ko'mishga, tomorqalarda ekin-tikin moyalarini quruqligida yoqishga shoshib, ish qaynayotgan mana shunday rohatijon kunda hech kim Gavrila Romanich Kozlovnikida bugun shodiyona ekanini bilmasdi.

Tomorqadan Matryona yetib keldi.

Qo'shni Yegor Anashkin chetandevorga suyanib oldi... Bo'sag'aga allaqanday chambaraklar qo'yib, qo'llarida yondaftar bilan Ganyani eshitishga taraddudlanib turgan shaharliklarga angrayib qolishdi.

– Boshlanishiga munglisidan bo'lsinmi yoki turma haqidagisidanmi? – so'radi Ganya.

– Istanaganingiz.

Ganya qo'shig'ini boshlad... O'h, kuylagandayam, shunday kuyladik! Avvaliga oyoqsiz qizcha haqidagisini aytib ko'rdi. Nima deyisharkin, deb to'xtadi. Zo'r zavq bilan yiroqlarga "tikildi".

– Bironta, haligi... jiddiyrog'idan... Yo'q, buyam yaxshi! Lekin... bironta haqiqiy dardlisidan bo'lsin...

– Nahotki, oyoqsiz qolish dard bo'lmasa? – hayronlandi Ganya.

– Dard, dard, – ko'na qolishdi. – Xullas, istaganingizni kuylayvering.

– Mitrofan mozor joyda

Ota qizin shart otdi, –

qo'shig'ini kuylay ketdi Ganya. Ich-ichidan to'lib-toshib, qoyillatib kuyladi.

– Bunisini bilamiz, eshitganmiz, – deb shartta to'xtatishdi uni.

Ganya elovlandi.

– Bo'lmasa, qanaqasi?

Shu joyida uch shaharlik o'zaro bahslashib ketishdi: biri qatorasiga yozish kerak, desa, ikitiasi, nega ekan, deb oyoq tirab turib oldi.

Ganya zo'riqib eshitib turdi. O'sha-o'sha

olislarga "tikilib" qoldi – aftidan, uni tinglab, bahslashgan emas, hiq-hiq yig'lashgan damlarni tasavvur qildi.

– Turma haqidagisiyam bor, devdingiz. Qani. Bir eshitaylik.

Ganya garmonni yoniga qo'ydi. Tutatib chekdi.

– Turma – yomon gap, – dedi. – Xudo ko'rsatmasin. Nima qilasizlar-a?

– Nega, axir?!

– Yo'q, yaxshilar, yetar. O'yin-kulgi qildik, shuning o'zi yetadi. – Yana-tag'in teskari to'nini kiyib oldi Ganya.

– Odamlar iltimos qilishyapti, axir! – tumshuq suqdi Matryona. – Namuncha o'zingni taroziga solasan?

– O'chir! – cho'rt kesdi Ganya.

– Eshak, – dedi-yu, Matryona tomorqaga qarab ketvordi.

– Bizdan ranjidingizmi? – so'rashdi shaharliklar.

– Nega ranjirkaman? – hayron bo'ldi Ganya.

– Yo'g'-e. Nega ekan? Sizlarga qanaqa qo'shiq kerakligini bilmas ekanman, xolos. Bor-yo'g'i shu.

Shaharliklar jomadonlarini yig'ishtirishdi, Ganyaga tashakkur bildirib, uch rubl berishdi va ketishdi.

Yegor Anashkin pastak chetandevordan oshib o'tib, Ganyaning yoniga cho'kdi.

– Rostdanam, nimaga tixirlik qilding? – qiziqsindi u. – Aytib beravermaysanmi, ko'proq tashlab ketisharmidi.

– Cho'chqalarining bogyapsanmi? – so'radi Ganya birmuncha sukutdan keyin.

– Boqishga-ku boqyapman, – xo'rsindi Yegor. – Endi qayoqqa gumdon qilishni bilmayapman jin urgurlarni. O'shanda boplاب laqillatishdi-da, bittasini besh puldan mish! Endi qayoqqa yetaklayman o'lgurlarni? Bozorgami – shundog'am mensiz tiqilib yotibdi ag'da, bir menmidim shunaqa...

Yegor tutun burqsitib, o'nga toldi.

– E, seni qara-yu, cho'chqavoz! – dedi Ganya birdan quvnab. – Ma, uchtalikni ol – borib bir shisha opke. Cho'chqalarining sog'lig'i... innaykeyin... g'am tortmasliging uchun ichamiz.

Sayohatga yolg'iz chiqmang

Mamlakatimizda har qachongidan ko'ra bugun ta'limga e'tibor katta. Buni umumta'lim maktablari o'quvchilari uchun mo'ljallangan yangi nomdagi darsliklarning nashr etilayotganidan yoki dars soatlardagi o'zgarishlardan ziyojolarimiz, umuman, ota-onalarning munosabatidan bilib olish mumkin.

O'quvchilarga yurtimizni yaqinroq tanishtirishning yana bir yo'li, vositasi darsliklar qatorida, albatta, ko'rgazmali qurollar hisoblanadi. Eng katta ko'rsatmali qurol bu, shubhasiz, muziylar hisoblanadi. Muzyilar yirik ilmiy-ma'rifiy va madaniy markazlardan biri hisoblanib, xalqimizning boy madaniy merosini, uning taraqqiyot bosqichlaridagi o'rnini haqqoniy aks ettirib turibdi. O'quvchilar bu manzilda darsliklardan olgan bilim va ko'nikmalarini mustahkamlashadi.

O'zbekiston davlat tabiat muzeyi o'quvchilarga eshik ochib turgan ana shunday ajoyib maskanlardan biri sanaladi. Muzey o'quvchilarga hamda keng omma o'rtasida tabiatni o'rganish, tabiatshunoslik sohasidagi bilimlarini chuqurlashtirishdan iboratdir. Muzeyga har yili minglab tomoshabin tashrif buyuradi. Farzandlarga yurtimiz tabiatini, noyob va nodir eksponatlarni avaylab-asrashga o'rgatish, boyitib borish, yaqindan tanishtirish, qishloq xo'jaligida erishilayotgan ilg'or yutuqlarni, tabiatda bo'layotgan hodisalarini, eng muhimi, insonlarning tabiatga bo'lgan mehrini shakllantirish va ularni tabiatimizni asrab-avaylashga o'rgatish har birimizning oldimizdagи muhim vazifadir.

Muzeyning entomologiya za[jirasasi muzey tashkil topgandan boshlab vujudga kela boshladi. Bu 350000 dan ortiq hasharotlar namunasi bo'lgan Markaziy Osiyodagi eng katta entomologiya kolleksiyasidir. 1918-yili A.A.Mel tomonidan muzeyga in'om qilingan 1290 ta namunalardan iborat bo'lgan tropik kapalaklar kolleksiysi ham katta ahamiyatga egadir.

Zoologiya bo'limining za[jirasidagi umurtqali hayvonlar bo'limida 4000 ortiq noyob hayvonlar tulumlari, shu bilan birga, qushlar tuxumlari kolleksiysi, shuningdek, skelet va ho'l preparatlar saqlanadi. Ayniqsa, Qirol pingvini, Qoshiqburun, Vishildok oq qush, Glaukonoma kapalagi tashrif buyuruvchilar e'tibor markazidadir.

Darvoqe, sizni Tabiat muzeyi zallarida unutilmas sayohat kutyapti. Albatta, bu safarga yolg'iz chiqmang!

Munisa ShUKUROVA,
O'zbekiston davlat tabiat muzeyi mudiri



Muqovada:
"Bolalikka qaytib".

Nargiza Boymuradova
olgan surat.

Bosishga 10.10.2020-yilda
ruxsat berildi.
Qog'oz bichimi: 84x108 $\frac{1}{16}$
Nashriyot hisob tabog'i: 8
Obuna indeksi – **822.**
ISSN 0207-9137.
Jurnal 2007-yil 4-mayda
O'zbekiston Matbuot va
axborot agentligi tomonidan
№ 0253 raqami bilan
ro'yxatga olingan.

Tahririyatga kelgan
qo'lyozmalar taqriz qilinmaydi
va muallifga qaytarilmaydi.
Mualliflar fikri tahririyat
nuqtayi nazaridan farq qilishi
mumkin.
Jurnaldan ko'chirib bosilganda
"Yoshlik"dan olindi" deb
izohlanishi shart.

"SILVER STAR PRINT" MChJ
bosmaxonasida chop etildi.
Buyurtma № 48. Adadi: 600.
Toshkent shahri,
Uchtepa tumani,
22-mavze, 17-uy.